

## JNIÑU JEHNU JEE NI CASAHA TEE APOSTOL

### *Jeē ni jéjnūhun ya quiji Espíritu Santo*

<sup>1</sup> Amigo Teófilo, nuū tútu jeē ní tee ná xíhna gā ni castūhun ná nuū ni táca jniñu ní sáha Jesús, jíin táca jnúhun ni steén yā nde quiṽí ní quejéé yá ni sáha ya <sup>2</sup> te nde quiṽí ní ndaa ya cuanuhun yā andiví. Te nde ná tu ndaa ya quihīn yā, te ni sáha Espíritu Santo jeē ní ndacu ya jniñu nuū táca apóstol, tēe ni nacāji ya. <sup>3</sup> Te nuū ni jínu ni ndoho ya jeē ni jíhī yā, te uū xico quiṽí te tijni jínu ni steén ndijin yā maá yá nuū tée un jíjnáhan de, te súcuan ni cajini de jeē iyó ndáa jeē ní natecu yā. Te ni cahān yā jíin de siquī ndese ndácu Yaā Dios jniñu.

<sup>4</sup> Te ná cáhīn tútu de jíin yá, te ni cahān yā jíin ndihī de jeē ma quéndacoo de ini ñuu Jerusalén, chi áchí yá:

Condetu ró ndé quee Espíritu Santo jeē ni jéjnūhun máá Tátá rī Yaā Dios. Chi je ni cachi rī nuū rō jeē ni jéjnūhun ya quiji Espíritu Santo. <sup>5</sup> Chi Juan, jendaá jeē maá ndute-ni ni scuándute de ñayuu. Te róhó jíjnáhan ró, jecu na quiṽí te nájnūhun cuandute ró jíin Espíritu Santo, cúu jeē condee yā ini anuá rō, achí yá.

### *Jeē ní ndaa Jesús cuanuhun yā andiví*

<sup>6</sup> Yūcuán na te tēe cáhīn tútu jíin yá, ni cacajnúhún de ya:

¿A vijna te nasáha ní jéē ñáyuu ñuu yō Israel ndujéhnú i ndacu i jniñu nuū nación yō chí naún? áchí de.

<sup>7</sup> Te ni cahān yā:

Ma cúu cuni rō quivī chí cuíyā jeē cóo jeē ni sándaā maá Tátá rī, chí máá ñn-ni máá yá jini yā na quivī sáha ya. <sup>8</sup> Te jeē cúni rō cúu jeē quée Espiritu Santo te condee yā ini anuá rō jijnáhan ró. Yūcuán na te nihīn rō poder te nacani ró jnúhun ri ní ini ñuu Jerusalén, ní Judea, ní Samaria, nde ní cáhnu ñayiví, áchí yá jín de.

<sup>9</sup> Te ni ndihī ni cahān yā tāca jnúhun yáha. Te níni cájito de nuū yā, te ni ndaa-ni ya cuanuhun yā andiví. Te ni quee vicō ni jesi-ni nuū cuahán yā, te tuá ni cájito de ya. <sup>10</sup> Te níni cáhīn de cájito ndaa de ichi ándiví núu ní ndaa ya cuahān yā, te uū jnáhan ndajéhé yā cáñūhun ya sahma cuijín ní cajecuiñī yā xiin de jijnáhan de, te cájito ya nájnūhun tēe. <sup>11</sup> Te ni cacahān yā jín de:

Róhó tēe Galilea, ¿najehē cájito ndaa ró ichi ándiví? Chí máá Yáa Dios ni naquihin ya Jesús cuanuhun yā andiví, te suni súcuan ndiji ya nájnūhun cájito ró cuahān yā andiví, áchí yá.

*Jeē ní canacāji de Matías jeē nucuñī de nuū Judas*

<sup>12</sup> Yūcuán na te ni nanungoo de yucu jeē naní Olivos, cuanungoo de ñuu Jerusalén. Te ya-jni-ni íne yucu un jín ñuu Jerusalén, nájnūhun ñn kilómetro-ni, cūhva jeē ni jéhe ley permiso caca ñayuu quivī ndétátú. <sup>13</sup> Te ni ndivicoo de ini ñuu. Te ni ndacoo de cuarto xinī véhe nuū cáyūcu núu de. Te táca de cúu Pedro, Jacobo, Juan, Andrés, Felipe, Tomás, Bartolomé, Mateo, Jacobo sēhe Alfeo,

Simón jeē cúu jnáhan grupo cananista, jiín Judas ñani Jacobo. <sup>14</sup> Tāca tēe yáha, níni cándutútú inuú de cájicān tahu de jiín táca ñani Jesús jiín náná yā María jiín sava ga ñahan.

<sup>15</sup> Te ñin quivī te ni jecondichi Pedro nuū tācá hermano cácandíje. Te cáhiin nájnūhun ciento ocō ñayuu. Te ni cahān de:

<sup>16</sup> Hermano jijnáhan ní, ni squícu nahín jnúhun cáhán tutu iī jeē ni cáhān David nde jenahán ní sáha Espíritu Santo. Te jnúhun un ní cuu siquī Judas jeē ní yosnúu núū tēe ni cajñi Jitoho yō Jesús. <sup>17</sup> Te suu tēe un ní jica de jiín yó, te ni chindéé ñáhán jnáhan de jiín yó siquī jniñu ní jeni ya yohó. <sup>18</sup> Te ni cajeen ñin ñuhun jiín xúhun ní nihīn tēe un siquī jniñu neé ní sáha de. Te ni ñinga ndeyi de, te ni ndatā sáva chíji de, te ndihī yiti de ni jitē. <sup>19</sup> Te ni jitē jnúhun yáha núū tāca ñáyuu cáyūcú ñuu Jerusalén, te jeē yúcuan cúu jeē ní casnání i ñuhun ún Acéldama nuū yúhu máá i, jeē cuní cahān ñuhun jeē cúu cuenta niñi. <sup>20</sup> Chi súcuan je yósó núū tútu Salmo siquī Judas:

Vehe de na quéndōo iyú,

te ma cóndee ni ñin ga ñayuu ini vehe ún.

Te suni cáhán:

Jniñu ní condiso de na cóndiso ñinga tēe.

Achí.

<sup>21</sup> 'Núu súcuan te jini ñúhún jeē núcuñi ñin tēe lugar maá de jiín yó. Te tēe nucuñi jiín yó un, nacāji yó de mēhñu táca tēe ni cajica jiín yó táca quivī jeē ní jica máá Jitoho yō Jesús jiín yó. <sup>22</sup> Te tēe nacāji yó un cúu tēe jeē ni íyo de jiín yó nde quivī ní jendute ya ni sáha Juan, te nde quivī ní ndaa ya

cuanuhun yā andiví. Te tēe nucuññī jín yó na cúu de testigo jín yó jeē jé ni natecu yā, achí de.

<sup>23</sup> Te ni catee nuū de uū jnáhan tēe: Matías jín José jeē naní de Barsabás te suni naní de Justo.

<sup>24</sup> Te ni cajicān tahu de:

Tátā Yaā Dios, máá ní chi jíní ni ndese cáa ánuá tāca ñáyuu. Núu súcuan te jeē ndindúú téé yáha, stéén ni ndé ñin de cúu jeē ní nacāji ní. <sup>25</sup> Te condiso jñíñu de cuu de apóstol. Te naquihin de jñíñu ní stóo Judas, chi ni sáha de cuēchi te cuahān de lugar xeēn nuū cánuú quíhñ de, achí de.

<sup>26</sup> Yūcuán na te ni casáha de ñin sorteo te ni jinū Matías, te ni nucuññī de ni nduu de jnáhan ndihúxí ñin apóstol.

### *Jeē ní quee Espíritu Santo*

## 2

<sup>1</sup> Te máá quívī víco Pentecostés ni cahñin tútú ñáyuu cácandíje ñuu Jerusalén. <sup>2</sup> Te sanaa-ni te ni quejéé ññin vēji nde andiví nájnūhun tachī ññin quée, te tāca ñáyuu jeē cáyūcú ñni vehe un ní cajini sōho i jeē ññin ún. <sup>3</sup> Te ni cajito i nájnūhun yáñuhñun jeē ní cajitē núu te ni cacucōo xinī ná ñin ná ñin i. <sup>4</sup> Te ndihñ i, ni cunuú Espíritu Santo jín i, te ni quejéé i cácahñ i sññ sññ yuhu, ndese ni steén maá Espíritu nuū ná ñin ná ñin i cahñ i.

<sup>5</sup> Te ñuu Jerusalén, suni cáhñin ñayuu hebreo, yññuhñun núu Yaā Dios, jeē ní quijicoo i nde tācá nación ní cáhñu ñayiví. <sup>6</sup> Te jeē ni ññin súcuan te ni cacutútú cuéhē ñayuu ún. Te ni cunéé íñ ni i jínjáhan i, chi ná ñin ná ñin i ni cajini sōho i jeē téé ni canihñin Espíritu Santo cácahñ de jñūhun yuhu ññū

jicá nuū véji i. <sup>7</sup> Te ni canaa ni i cájito i te ni cacahān i:

¿A násūu téé Galilea cácuu tāca téé yáha jēé cácahān de tācá yuhu ñúū nuū véjicoo yó? <sup>8</sup> ¿Na vé ni cuu yāha núu súcuan? Chi ná ñn ná ñn yó cájini sōho yó cácahān de jnūhun yuhu ñúū nuū ní cacacu yó. <sup>9</sup> Chi vējicoo yó ndé tācá ñuu jicá. Sava yó véji nde Partia jíin Media jíin Elam. Te sava ga yō vēji yó ndé Mesopotamia jíin Judea jíin Capadocia jíin Ponto jíin Asia. <sup>10</sup> Suni nde Frigia jíin Panfilia jíin Egipto jíin tijni ñuu jeē íne nde yatā gā ñuu Cirene ñuhun Africa vējicoo yó. Te sava ga yō nde ñuu Roma vējicoo yó, te cáyūcu jínu-ni yó yáha. Te máá yó jeē véjicoo ñuu Roma, sava yó cácuu máá ñáyuu hebreo te sava ga yō cácuu ñayuu sín ñuu, ni cacandíje yó ndíquín yō ley ñayuu hebreo. <sup>11</sup> Suni nde Creta jíin Arabia vējicoo sava yó. Te cájini sōho yó jēé jíin jnūhun yuhu ñúū ná ñn ná ñn máá yó cácahān de tācá jniñu jéhnú ní sáha Yaā Dios, achí i.

<sup>12</sup> Te ndihí i chi ni canaa íi ni i cájini nahín i. Te ni candajnūhún i jíin jnáhan i:

¿Na vé cúu jeē ní cuu núu súcuan jeē cácahān de yuhu ñúū yō? achí i.

<sup>13</sup> Te sava i ni cacahān catá i:

Tuú chi jeē cánajini de, achí i.

### *Jeē ní nacani Pedro jnūhun nuū ñáyuu*

<sup>14</sup> Yūcuán na te ni candocuñí Pedro jíin ndihúxí ñn ga apóstol, te ni cahān jee Pedro jíin ñáyuu ún:

Níhín jnáhan ñuu yō hebreo, jíin ndihí níhín jēé cáyūcu ní Jerusalén, jnūhun yáha na chūhun ni ní jíjnáhan ní, chi cuni nahín ní cahān na jíin ní. <sup>15</sup> Chi

máá ná jijnáhan ná, nasūu jēē cājīni ná nájñūhun cájeni ni ní, chi sáá cahññ jenéhen cúu, te nasūu hora cánajīni ñayuu cúu. <sup>16</sup> Chi sa suhva squícu jniñu yáha nájñūhun ni cahññ Joel, tēe ni nacani jñūhun Yaā Dios nde jenahán, chi súcuan ni cahññ de:

<sup>17</sup> Achí Yáā Dios: Quiṽṽ sándñí na te tají rí Espíritu rī cunuú yá jín táca ñáyuu, te sēhe yí ró jín sēhe sñí ró, nacani i jñūhun ri, te táca téé lulí chi coto ndijin de jeē steén rī nuū de, te táca téé jéñu chi sáha ri jeē scóto jēni de.

<sup>18</sup> Te quiṽṽ ún chi tají rí Espíritu rī cunuú yá jín táca mozo rī, cúu tēe cúu ñahan, te nacani i jñūhun ri.

<sup>19</sup> Te ichi ándiví sáha ri jniñu jéñu jeē náā ni ñayuu coto i, te sáha ri jniñu jéñu ini ñayṽṽ jēē steén jeē cujéñu ri,

chi coo niññ jín ñúhñ jín ñúhmā nájñūhun vicō. Yūcuan cúu jeē sáha ri jeē cóo jñūndóho xeñ.

<sup>20</sup> Te nduu jnúú níāndii te ma cúndijin gā, te yoō coto cuéhé nájñūhun niññ. Yūcuán na te quee quiṽṽ jeē ndíji máá Jítóho rō Jesús.

Quiṽṽ ún coo cuehē jniñu jéñu, te cuni ndíhi ñayuu jeē quiṽṽ maá Jítóho rō cúu.

<sup>21</sup> Te táca ñáyuu jeē cahññ ndahú i jín yá te jnama ya i, áchí Yáā Dios.

Achí Joel ni nacani de jñūhun ya.

<sup>22</sup> Jeē yúcuan níhín téé ñuu yō Israel, cuni nahín gá ni jnúhun yáha jijnáhan ní. Ni steén Yaā Dios jeē ní tají yá maá Jesús, Yaā ní jehnu ñuu Nazaret, chi máá Yáā Dios ni jēhe ya jeē ni sáha Jesús jniñu jéñu

mēhñu maá ní, jíin jniñu jeē steén jeē cujéhnu ya, te jniñu un ní canaa ni ni ní cajito ní. Te je cájini vāha ní jéē súcuan ni cuu. <sup>23</sup> Te maá ní ni cajniñ ní yá, te ni cajendēca ní yá nuū tée xeēn ni cajehni de ya jicā cruz ni casáha ní. Te nde jíin tiempo je ni jini Yaā Dios jeē súcuan sáha ní jíjnáhan ní, chí súcuan je ni sándaā yā. <sup>24</sup> Te ni nastécu Yaā Dios Jesús te tuá ni cúu ya ndīyí, chí jnūhun xeēn jeē jihí ñayuu, tuá na vé cúu ga sáha jíin yá. <sup>25</sup> Chi nde jenahán suhva ni tee David jnūhun ndese ni cahān Jesús jíin Yáā Dios: Jíní na núū maá ní jeē cúu ní Jítóho ná, chí ní cáni

ndéé ní jíin ná,

chí ndéé ní ichí ndáváha ná, cúu jeē chindéé ñáhán ní sāña náváha coo ndeyí ni ná.

<sup>26</sup> Jeē yúcuan cúsiñ ni ná te cáhán na jnúhun siñ ni.

Jeē yúcuan ma nácani uhū ni na síquī jnúhun cuu ná.

<sup>27</sup> Chí ma cuáha ni jnúhun quendōo ánuá na lugar nuū cáyūcu ánuá ndīyí,

ni ma cuáha ni jnúhun tehyū ná, chí jéjníñu ná núū ní te maní ni jíin ná.

<sup>28</sup> Te ni steén ni núū na jéē nátecu ná,

te sáha ní jéē cusíñ teyí ni ná condee na jíin ní ní cáni.

Achí Jesús, ni achi David.

<sup>29</sup> Tāca níhín jíjnáhan ní, na cástūhun cájí ná nuū ni jnúhun jí yō David, chí tu ní cáhán de jnúhun yáha síquī maá de. Chí ni jihí de te ni quindūji de, te jíní yō nuū yíndūji de nde vijna. <sup>30</sup> Chí ni cuu de tée ni nacani jnūhun Yaā Dios nde jenahán. Te ni jini de jeē váha ni jejnūhun ya nuū de jeē chíji yucūn maá de quiñi Cristo, te condee yā mesa de ndacu ya jniñu nájñūhun ni ndacu de jniñu jeē ní

cuu de rey. <sup>31</sup> Te nde jín tiempo ni jini de jeē nátecu Cristo, te ni cahān de jeē anuá yā, ma ndóo lugar nuū cáyūcu ánuá ndīyī, ni yiqui cúñu yā ma tehyú.

<sup>32</sup> Chi Yaā Dios ni nastécu yā Jesús, te máá ná cácuu ná testigo jeē ní natecu yā. <sup>33</sup> Te ni ndujéhnū tucu ya ni sáha Yaā Dios jín poder yā. Te nde nuū maá Yáa Dios, Yaā cúu Tátá yā, ni nihīn Jesús Espíritu Santo, chí súcuan ni jejnūhun ya. Te ni tají Jesús Espíritu Santo, te suu ya sáha jniñu jeē cájito ní te cájini sōho ní vijna. <sup>34</sup> Te David, nasūu síquī maá de ní cáhān de tāca jnūhun yáha, chí tu ní ndáa yiqui cúñu de andiví. Chí síquī Cristo cúu jeē ni cáhān de suhva:

Máa Yáa Dios ni cahān yā jín Jítóho rī Cristo:

Cucōo ró ichi ndáváha rī jeē steén jeē cujéhnū ró.

<sup>35</sup> Te na sáha rī jeē quende rō poder tāca jéē cájito uhū rohó, áchí yá.

Achí David.

<sup>36</sup> 'Núu súcuan te ndīhi ní jéē cácuu yó ñayuu Israel, na cúni vāha ní jéē vēsú ni cajehni ni yá jicā cruz, te Yaā Dios ni jeni ya maá Jesús jeē cúu ya Jítóho yō te suni cúu ya Cristo, Yaā jnáma yóhó, áchí Pedro jín i.

<sup>37</sup> Te jeē súcuan ni cajini sōho i jnūhun yáha, te ni cajnahuhū ni anuá i. Te ni cacajnūhún i Pedro jín táca gá apóstol:

¿Te ndese sáha ná jíjnáhan ná núu súcuan? áchí i.

<sup>38</sup> Te ni cahān Pedro jín i:

Nacani ni ní jéē stóo ni cuéchi ní jíjnáhan ní, te cuandute ní jéē ní cacandíje ní Jesucristo, návāha cone cáhnu ni Yaā Dios nuū cuéchi ní, te cuāha Yaā Dios Espíritu Santo yā condee yā ini anuá ni. <sup>39</sup> Chí súcuan ni jejnūhun máá Tátá yō Yaā Dios nuū yō



jiín núū séhe yó, te suni súcuan ni jejnūhun ya nuū ñáyuu tāca gá nación, tācá i jeē cána ya i candíje i.

<sup>40</sup> Te jiín cuéhē gā jnūhun súcuan ni cahān cají Pedro, te ni stihví ni de i:

Nducú ndéyí ní jeē na cácu ní, chi jnahnū ndetū ñayuu casáha jniñu néé, áchí de.

<sup>41</sup> Yūcuán na te tācá i jeē ní cajetáhú jnúhun ni cahān de, ni cajendute i. Te quiví un ní nducuehē gā ñayuu cáccandíje, nájnūhun uní mil gā ñayuu. <sup>42</sup> Te ni cahīin nīhin i siquí jnúhun cástéén apóstol. Te inuú-ni cándajnūhun mánī i te cájicān tahú i, te in cáhnu-ni cáyeji i pan, nájnūhun ni steén maá Jítoho yō jeē núcūhun ni yō siquí yā.

*Ndese ni coyūcu ñáyuu jeē ní cacandíje jeē xihna ñúhún*

<sup>43</sup> Te ndihí ñayuu ni cayūhú i ni cajito i, chi cuehē jniñu jéhnū jeē steén jeē cujéhnū ya ni casáha tēe apóstol. <sup>44</sup> Te inuú ní cahīyo ni ñayuu cáccandíje, te ni cacuu inuú i tāca jéē cánevāha i. <sup>45</sup> Te ni caxícó i na-ni na vé cánevāha i, te ni casaja i xūhún un núū tāca jnáhan i, núū ndese jíni ñúhún in in i. <sup>46</sup> Te ndijnahan quiví ni candutútú i ini templo. Te manī ni cayeji cáhnu i pan tācá vehe jnáhan i nájnūhun ni steén yā, te ni cahīyo siñ ni i. <sup>47</sup> Te ni cacahān i jeē yóhoyo cújéhnū Yaā Dios. Te ndihí ñayuu ñuu un ní cajejnúhún i ñayuu cáccandíje. Te ndijnahan quiví ni jnama Jítoho yō sava ga ñayuu, te ni nduu inuú i jiín ñáyuu cáccandíje.

*Jeē ní nduvāha tēe ríngo*

### 3

<sup>1</sup> Te ñin quivĩ te máá cáhunĩ jehíni ni caa Pedro jíin Juan cuangoo de templo, chi hora un cájicān tahú jnáhan de hebreo. <sup>2</sup> Te cájendēca ñayuu ñin tēe caríngo nde quivĩ ní cacu de. Te tēe un ndéé de ndijnahan quivĩ yehyĩ templo jeē naní Hermosa, jícan de caridad nuū tāca ñáyuu quivicoo ini templo. <sup>3</sup> Te tēe un ní jito de nuū Pedro jíin Juan jeē véji de quivicoo de ini templo, te ni jícan de caridad nuū Pedro jíin Juan. <sup>4</sup> Te Pedro jíin Juan ni cajito vāha de nuū tēe ún. Te ni cahān Pedro jíin de:

Condēhe núū rĩ jijnáhan ri, achí de.

<sup>5</sup> Te máá tēe un ndétu tūhva de, ni jeni ni de jeē cuáha Pedro jíin Juan jecu xūhun núū de. <sup>6</sup> Te ni cahān Pedro:

Tú na xūhun plata ni xūhun oro cánevāha ri. Te íyó ñin jeē váha ga sáha ri jíin ró: jíin poder maá Jesucristo, Yaā ní jehnu ñuu Nazaret, cáhān rĩ jíin ró, ndocuiñĩ te caca ró, achí de.

<sup>7</sup> Te ni jni de ndaváha tēe ún, te ni ndonehen de. Te jehē de jíin súcūn jehé de ni nduvāha-ni. <sup>8</sup> Te ñin ni scānda de máá de ni ndocuiñĩ de, te ni quejé de jíca de. Te ni quivĩ de jíin Pedro jíin Juan ini templo, jíca de, cánda de, te nácuatáhú de nuū Yaā Dios. <sup>9</sup> Te ni cajini tāca ñáyuu jeē jíca de te nácuatáhú de nuū yā. <sup>10</sup> Te ni canacuni i de jeē maá de cúu tēe ni condee yehyĩ templo jeē naní Hermosa, ni jícan de caridad. Te ni canaa ni i ni cajito i, te ni cayūhú i cájito i jeē ní nduvāha tēe ún.

*Jeē ní nacani Pedro jnūhun ini corredor jeē naní Salomón*

<sup>11</sup> Te tēe ni nduvāha ún, tu siaá de Pedro jíin Juan. Te ni cacutútú-ni cuehē ñayuu nuū de ini corredor jeē naní Salomón, te ni canaa ni i cájito i. <sup>12</sup> Te ni jito Pedro jeē ní cutútú ñáyuu ún, te ni cahān de jíin i:

Níhín tēe ñuu yō Israel jíināhan ní, ¿najehē cánaa ni ni cájito ní jniñu yáha? ¿Najehē cájito ní núū ná te cájeni ni ni jēe maá ná jíināhan ná íyó poder na jēe sáha ná jēe nácaca tēe yáha? ¿Chí ní nduvāha de siquī jeē tēe cájica ndaā cácuu ná cájeni ni ní? <sup>13</sup> Tuú chi máá Yāa Dios jíi yō Abraham jíin Isaac jíin Jacob jíin táca gá jíi yō, ni sáha ya jniñu yáha návāha cuni ñayuu jeē cujéhnu Sēhe ya Jesús, Yāa jeē ní cajendēca ní núū tēe cácujuhnu. Te ná ni cuni Pilato jeē siaá de ya, te tu ní cájēhe ni jnúhun. <sup>14</sup> Te ni casquéhichī ni yá vēsú cúu ya Yāa ndaā, Yāa iī. Te sa suhva ñn tēe jéhni ndīyi ni cacahān ni jíin Pilato jeē na siaá de. <sup>15</sup> Te ni cacahān ni jēe na cúu Yāa jeē sáha jeē técu ndihini. Te Yāa Dios ni nastēcu yā Jesús jeē ní cuu ya ndīyi, te máá ná cácuu testigo jeē ní natecu yā. <sup>16</sup> Te tēe yáha jēe cájito ní te cánacuni ní de, ni candíje de jíin ná jeē iyó poder Jesús nasávāha ya de, te jeē yúcuan ní nasávāha ya de. Te jeē súcuan ni cacandíje ná ní sáha ya, jeē yúcuan ní nduvāha vāha de nájnūhun cájito ndihini ní.

<sup>17</sup> Te na cástūhun ná nuū ni jíināhan ní, je jíni na jēe maá ní jíināhan ní jíin tēe cácujuhnu nuū yō, tu ní cájecūhun ni ní, te jeē yúcuan ní cajehni ni yá. <sup>18</sup> Te súcuan ni squícu jnūhun ni cahān Yāa Dios nde jenahán jēe cánuú ndoho Cristo siquī cuéchi ñayuu, chi ni sáha ya jeē súcuan ni cacahān tēe ni canacani jnūhun ya nde jenahán. <sup>19</sup> Te na nácani ni ni jēe stóo

ni cuéchi ní, te nasāma ini ní, te quīvīcoo ní ndaha Yaā Dios návāha ndahva yā cuéchi ní. Te quee quiṽī jeē ndúsī ni ni sáha máá Jítóho yō. <sup>20</sup> Te natají yá Jesús ndiji ya, chi cúu ya Cristo, Yaā ní jeni Yaā Dios jeē jnáma ya yohó. <sup>21</sup> Te jíni ñúhún jeē cóo ya andiví ndé nasájeé yá tāca jeē iyó, nájñūhun ni cacahān tēe ndoo ni canacani jñūhun nde jenahán ní sáha Yaā Dios. <sup>22</sup> Chi suhva ni nacani jíi yō Moisés jñūhun nuū tāca jíi yō: Máá Jítóho yō Yaā Dios cani ya Yaā nacani jñūhun nuū rō jijnáhan ró, nájñūhun ni jeni ya ruhū. Te cuu ya ñn jnáhan ñuu yō. Te na chūhun ni rō tāca jnúhun jeē nácani ya ún. <sup>23</sup> Te núu ndé tée tú chuhun ni de jñūhun cahān yā, jnahnū ndetū de, te ma cúu ga de jnáhan ñayuu yā Israel, áchí Moisés.

<sup>24</sup> Te tāca tée ni canacani jñūhun nde jenahán, nde tiempo ni quiiji Samuel te ní gá nde vijna, suni ni canacani de jñūhun siquī tācá jniñu cúu quiṽī yáha. <sup>25</sup> Yucūn maá tée ni canacani jñūhun ya nde jenahán cácuu yó, te suni siquī maá yó jijnáhan yó cúu jeē ni sáha Yaā Dios contrato jíin jíi yō. Chi ni cahān yā jíin Abraham: Yucūn maá ró cane Yaā sáha jeē quéndōo ndetū tāca ñáyuu ní cáhnu ñayiví, áchí yá. <sup>26</sup> Te jeē ní nastécu Yaā Dios Sēhe ya, te ni quiiji ya nuū maá yó xíhna gā, návāha quendōo ndetū yō sáha ya, chi sama ya anuá yō jeē ma sáha ga yō jniñu neé, áchí Pedro.

*Jeē ní cajendēca de Pedro jíin Juan nuū tēe cácujeñhu*

## 4

<sup>1</sup> Te Pedro jíin Juan níni cácahān gā de jíin ñáyuu ún te ni quecoo tāca sūtū jíin tēe grupo saduceo, jíin

tée cácujuhnu nuū tée cándito templo. <sup>2</sup> Te yōhyo ni caquiti ni de siquī jeē castéén Pedro jíin Juan nuū ñáyuu, jíin jéē cánacani de jnūhun jeē nátecu ndīyī chi je ni natecu Jesús. <sup>3</sup> Te ni cajni ún de, te ni cachuhun ún de vecāa cone de nde cundijin inga quivī, chi je ni ini. <sup>4</sup> Te cuehē ñayuu jeē ní cajini sōho jnūhun ni cacahān Pedro jíin Juan ni cacandíje i. Te ni nduu nájnūhun uhūn mil jeē maá nene tēe jeē ní cacandíje.

<sup>5</sup> Te jeē ní cundijin inga quivī ún, te tēe cácujuhnu nuū ñáyuu hebreo jíin tēe jéhu cándiso jniñu jíin tēe cástéén jnūhun tutu ley yā, ni candutútú de ini ñuu Jerusalén. <sup>6</sup> Te suni ni candutútú de jíin Anás jeē cúu sutū cujéhu ga, jíin Caifás jíin Juan jíin Alejandro jíin táca gá jeē cácuu jnáhan sutū cujéhu ga ún. <sup>7</sup> Te ni candacu jniñu jeē na quíjicoo Pedro jíin Juan condichi de mēhñú, te ni cacajnūhún de:

¿Ndé ñn ni tejniñu róhó te ndese ni nihīn jniñu ró ní sáha ró jēē nduvāha tēe yáha? áchí.

<sup>8</sup> Yūcuán na te Pedro chi ni cunuú maá Espiritu Santo jíin de, te jíin poder yā ni cahān de jíin táca tēe ún:

Tāca nihín tēe cácujuhnu nuū ñūū yō Israel jíin táca nihín tēe jéhu cándiso jniñu, <sup>9</sup> vijna te cástíchí ni sáña síquī ñn jniñu váha ní casáha ná jéē ní nduvāha tēe cúhú yāhá. <sup>10</sup> Te na cástūhun ná nuū nihín jéē cácujuhnu ní, návāha suni cuni ndihi jnáhan ñuu yō Israel jeē jíin poder maá Jesucristo, Yaā ní jehnu ñuu Nazaret, ni nduvāha tēe índichi nuū ni yáha. Te suu ya cúu Yaā jeē ní cajehni ni jíicā cruz, te ni sáha Yaā Dios jeē ní natecu yā. <sup>11</sup> Jesús cúu nájnūhun yuū cimientu jeē quítuu vehe. Te

máá ní jijnáhan ní cácuu nájnūhun tēe cásáha vehe, te ni casquéhichī ni yá nájnūhun jeē cátejiyo ní yūū, chi tu ní cá candíje ní yá. Te ni sáha Yaā Dios jeē cúu ya nájnūhun yuū cánuú gá jeē quítuu vehe. <sup>12</sup> Te tú cuiti inga jeē cúu jnama yóhó, chi tuá na inga jeē kujéhnū ní jéni Yaā Dios ini ñayīvi yáha jéē cúu jnama yóhó, áchí Pedro.

<sup>13</sup> Yūcuán na te ni cajini un jéē Pedro jíin Juan jéhnū-ni cácahān de. Te je cájini jeē tú tūhva de, chi tēe súcuan-ni cácuu de. Te ni canaa ni cájito nuū de, te ni casáha cuenta jeē ní cajica de jíin Jesús. <sup>14</sup> Te cándēhe núū tēe ni nduvāha un, índichi de jíin Pedro jíin Juan, te tu ní cánihīn gā modo ndese ga cahān. <sup>15</sup> Yūcuán na te ni candacu jniñu jeē na quéndacoo sīn de yatā véhe juzgado te ndajnūhun máá jíjnáhan. <sup>16</sup> Te ni cacahān:

¿Ndese sáha yó jíin tēe yáha núu súcuan? Chi ni jite jnūhun yáha núū tāca ñáyuu ñuu Jerusalén jeē súcuan ni casáha de ñn jniñu jéhnū, te ma cúu cahān yō jeē tu íyó ndāā. <sup>17</sup> Te návāha ma cuité ga jnūhun yáha, na cúxeēn yō nuū de jeē ma cahán cuiti gā de jnūhun Jesús nuū ní ñn ñayuu, áchí.

<sup>18</sup> Te ni cacana ún de, te ni cacahān nīhin jíin de jeē ma cahán cuiti gā de jnūhun Jesús ni ma steén gā de jnūhun un núū ní ñn ñayuu. <sup>19</sup> Yūcuán na te ni cacahān Pedro jíin Juan:

Cani vāha ni ní te núu nújnahan ni Yaā Dios jeē stóo ná jniñu ní ndacu ya jeē sáha ná te cuandije ná máá na jniñu nándacu ní. <sup>20</sup> Chi ma cúu stóo ná jniñu jeē nácani ná jnúhun ní cajini sōho ná jíin jniñu ní cajito ná, áchí de.

21 Yūcuán na te tēe ni cacutútú un ní cacuxeēn tucu de nuū Pedro jíin Juan. Te ni casiáá de cuango de, chi tú cuiti na modo stóho de chi cáyūhu cájito ñayuu, chi siquī jníñu jéhnū ni cuu ún te ndihi i cácahān i jeē yóhyo cújéhnū Yaā Dios. 22 Chi tēe jeē ní sáha ya jniñu jéhnū jíin de jeē ní nduvāha de, víhyá gā uū xico cuiyā de.

*Jeē ní cajicān tahuñ ñayuu cácaandje*

23 Te ná ni casiáá un Pedro jíin Juan cuango de, te ni najinūcoo de nuū tāca gá jnáhan de, te ni cacachi de ndese ni cacahān sutū cácujehnū jíin tēe jéhnū cándiso jníñu. 24 Te jeē ní cajini sōho de jnūhun yúcuan, te inuú-ni ni cajicān tahuñ de nuū Yaā Dios:

Tátā Yaā Dios jeē cujehnū ní núū ndihi, máá ní cúu Yaā Dios ni sáha andiví jíin ñáyiví jíin mar jíin táca ndihi jeē iyó. 25 Te jeē jíin Espíritu Santo te ni sáha ní jéē ni cáhān mozo ní David nde jengahán:

¿Najehē cáquitī ndevāha ni ñayuu sín nación?

¿Te najehē cájeni sáá ni i jeē ndónnda i siquī ní?

26 Ni cacutútú jéē cácuu rey ñayiví jíin náhan,

te tēe cácujehnū ni cacutútú de,

te inuú-ni ni candonda de siquī maá ní jeē cúu ní

Jitoho ná,

jíin síquī Cristo, Yaā jeē ní jeni ní.

Achí David.

27 Te jendaá chi Herodes jíin Poncio Pilato jíin táca tēe ñuu yō Israel jíin tēe tāca gá nación, ni cacutútú de ini ñuu yáha ní candonda de siquī Séhe iñ ní Jesús, Yaā ní jeni ní. 28 Te súcuan ni cuu návāha squícu táca jniñu jeē jíin poder ni ní cundaā ni ni ndé jengahán jéē súcuan coo. 29 Te vijna, Tátā, coto

ní ndese cácahān xeēn de nuū na jíjnáhan ná, te cuāha ni fuerza ni núū na jēē cácuu ná mozo ni, návāha jéhnū-ni nacani ná jnúhun máá ní. <sup>30</sup> Te jíin poder ní nasávāha ni ñáyuu cácuu, te sáha ní jniñu jéhnū jeē steén jeē cujéhnū ní. Te tāca jēē yáha sáha ní jíin poder Sēhe iī ní Jesús, áhí i jíjnáhan i.

<sup>31</sup> Te nuū ní ndihí ni cajicān tahu i, te nuū cáyūcu tūtú i un ní sáha ya jeē ní jnáa. Te ndihí i ni cunuú Espíritu Santo jíin i, te ni jēhe ya fuerza te jéhnū-ni ni canacani i jnúhun Yaā Dios.

### *Jeē ní canevāha cáhnu i ndajníñu*

<sup>32</sup> Te ñayuu cuehē jeē ní cacandíje chí inuú cáhíyo ni i jíjnáhan i. Te tú ni ñn i ní cáhán jeē ndajníñu jeē névāha máá i cuu máá-ni i, chí tācá ndajníñu ni canevāha cáhnu i. <sup>33</sup> Te nīhin cánacani apóstol jnúhun jeē ní cajito de jeē ní natecu Jitoho yō Jesús. Te yōhō ni chindéé ñáhán yá ñayuu cácaandíje. <sup>34</sup> Chí tú cuiti ni ñn i ní ndóho jeē cumanī nuū i, chí tāca ñáyuu cánevāha cuehē ñuhun chí vehe, ni caxícó i sava te ni caquindeca i xūhún un. <sup>35</sup> Te ni cajēhe i xūhún un núū téē apóstol, te ni casaja téē apóstol nuū ñáyuu cácaandíje núū ndese jíni ñuhún ñn ñn i. <sup>36</sup> Te íyó ñn téē nání José jeē cúu yucūn Leví, ni cacu de Chipre, ñuhun jeē íne sñn nuū ndúte. Te téē apóstol ni casnání de téē ún Bernabé, jeē cuní cahān: téē cáhán jnúhun ndeyí ni. <sup>37</sup> Te ni xícó de ñn ñuhun de, te ndáhá de xūhún un ní jēhe de nuū téē apóstol.

### *Siquī cuēchi jeē ní casáha Ananías jíin Safira*



## 5

<sup>1</sup> Te suni inga tēe nání Ananías jíin ñasihí de Safira, ni caxīcō de ñin ñuhun de. <sup>2</sup> Te ni chuvāha de sava xūhún un cuu máá de jíin ña, chi súcuan ni candajnūhún de jíin ña, te ndáhá de inga sava nájnūhun jeē ndíhi cúu, te ni jēhe de nuū tēe cácuu apóstol. <sup>3</sup> Te ni cahān Pedro:

Ananías, ¿naun ni jēhe ro jnūhun jeē quívi jexeén, jeē cúu Satanás, ini anuá rō te stáhú ró Espíritu Santo cuní rō? Chi jeē ní caxīco ró ñuhun ró te cuēchi ró cúu jeē tu ní cáchi ndaā rō jeē ni squéndōo ró jecu xūhún un cuajníñu máá ró, chi ni sáha ró nájnūhun jeē ndíhi xūhun ní jēhe ró. <sup>4</sup> ¿Te á násūu cuenta máá ró cúu ñuhun un ndé ná tu xīco ró? Te ná ni xīco ró ¿te á násūu cuenta máá ró cúu xūhun jēe cuajníñu ró ndé nuū cuní máá ró? ¿Te naun ni jeni ni rō jeē stahú ró súcuan? Te nasūu máni máá tēe cúu jeē jícu ró stáhú ró, chi suni Yaā Dios, áchí Pedro.

<sup>5</sup> Te ná ni jini sōho Ananías tāca jnūhun yáha, te ni cotúú-ni de ni jihī de. Te tāca ñáyuu ní canihīn jnūhun ún, yōhyo ni cayūhú i. <sup>6</sup> Te ni candocuiñī tēe suchí, te ni cachusúcún de ndíyī un cuáchindūji de.

<sup>7</sup> Te ni cunúu nájnūhun unī hora. Te ni jinū ñasihí ndíyī un ní quívi ña ini vehe ún, te tú na vé jiní cuiti ña. <sup>8</sup> Te Pedro ni cajnūhún de ña:

Cachi nuū rī, ¿á ñin súcuan-ni ni caxīco ró ñuhun ró chí tuú? áchí de.

Te ni cachi ña:

Suu súcuan-ni ni caxīco ná, áchí ña.

<sup>9</sup> Te ni cahān Pedro jíin ña:

¿Naun ni casquínáhan jnūhun ró jēe cóto ndee rō Espíritu Santo máá Jítóho yō? Chi ni nducú ró

stahú ró yā. Cuni nahín jéē cáhma nanecoo tēe cuachindūji yíí ró, te suni súcuan quichindūji de róhó, áchí de.

<sup>10</sup> Te ni cotúú-ni ña nuū jehé Pedro te ni jihī-ni ña. Te ni ndīvicoo tēe suchí un te ni cajito de jeē jé ni jihī ña, te ni caquenehen de ña, te ni jechindūji de ña xiin yíí ña. <sup>11</sup> Te yōhyo ni cayūhú ndīvii ñayuu cá candíje jíin táca gá ñayuu jeē ní cajini jnūhun jeē súcuan ni cuu.

### *Cuehē jniñu jéhu ni casáha apóstol*

<sup>12</sup> Te cuehē jniñu jéhu jeē steén jeē kujéhu Yaā Dios ni casáha tēe apóstol nuū ñáyuu. Te táca ñáyuu cá candíje, inuú-ni cándutútú i ini corredor jeē naní Salomón. <sup>13</sup> Te tu ní cáhundeyí ni inga ñayuu quijnáhan jíin i. Te cájejnúhún i ñayuu cá candíje. <sup>14</sup> Te ni nducuehē gā i, chí cúu tēe cúu ñahan ni cacandíje i máá Jítóho yō. <sup>15</sup> Te cáquindecá ñayuu jnáhan i jeē cácu hū, te cájequin i ini calle cáca i nuū camilla jíin núu yúu, chí cácuni i vésú ste cuándahū Pedro na yáha síquí i te nduvāha i. <sup>16</sup> Te suni cuehē ñayuu táca ñuu cáhīyo yajni yūcuan ní quiijicoo i ñuu Jerusalén ni caquindecá i jnáhan i jeē cácu hū jíin jéē cándoho tachí, te ndihí i ni canduvāha i.

### *Jeē ní cajito xeēn i tēe cácuu apóstol*

<sup>17</sup> Yūcuán na te sutū kujéhu ga jíin táca gá jnáhan jeē cá candíje sahān saduceo, ni cacucuésún ni jeē síquí tēe cácuu apóstol. <sup>18</sup> Te ni cajni de tēe cácuu apóstol ni cachuhun de vecāa. <sup>19</sup> Te in ndajéhé máá Jítóho yō ni nune ya yehyí vécāa ún jecuáa, te ni quenehen ya de jíjnáhan de. Te ni cahān yā jíin de:

<sup>20</sup> Cuáhán te cuiñi ró ini templo, te yūcuán nacani cájí ró jnūhun nuū ñáyuu siquī ndese nihīn tahu i cotecu i ní cáni, áchí ndajéhé yā.

<sup>21</sup> Te ni cajini sōho de jnūhun yáha. Te nuū ní cundijin te nehen ni quīvicoo de ini templo, te cástéén de jnūhun ya nuū ñáyuu.

Te níni cástéén de te sutū kujéhnū ga jíin táca jnáhan de ni canastútú de tēe junta kujéhnū ga, jeē cúu ndihi tēe jéhnū cándīso jníñu nuū ñáyuu nación Israel. Te ni catají de policía cuaquenehen tēe apóstol ini vecāa. <sup>22</sup> Te nuū ni jínūcoo te tuá gā tēe apóstol. Te ni canandió cóo te ni cacachi:

<sup>23</sup> Jendaá cúu jeē ní cajito ná ndési vāha vecāa, te cáhīn tēe cándīto yéhyí un. Te nuū ní canune ná, te tú cuiñi gā tēe un cáhīn ini vecāa ún, áchí de.

<sup>24</sup> Te sutū kujéhnū ga jíin tēe cújéhnū nuū tēe cándīto templo jíin sūtū cácujehnū, nuū ní cajini sōho de jnūhun yáha, te ni cajeni ni de ndese ga cúu un núu súcuan. <sup>25</sup> Te ni quee-ni ñn tēe te ni cachi:

Tēe jeē ní cachuhun ní vecāa, cáhīn de ini templo, te cástéén de jnūhun nuū ñáyuu, áchí de.

<sup>26</sup> Yūcuán na te tēe cácujehnū nuū tēe cándīto templo, jíin tēe cácuu policía de, ni jengoo de, te yúcún ní nacueca de táca tēe apóstol vendicoo de jíin, chí cáyūhú de jeē sanaa te cuāha ñayuu yuū xinī de núu sáha xeēn de jíin táca tēe apóstol. <sup>27</sup> Te nuū ní najinūcoo de jíin tēe apóstol, te ni cajecuiñi de nuū tēe casáha junta. Te sutū kujéhnū ga ni cahān:

<sup>28</sup> Ni cacahān nīhin ri jíin ró jeē ma steén cuiñi gā rō jnūhun tēe nání Jesús. ¿Te naun ni casáha ró jēe ní ndecāva jnūhun un ní ñuu Jerusalén yāhá? Te

cácuni rō staú yáhu ró rúhū jijnáhan ri siquī jeē ni jíhī tēe ún, áchí.

<sup>29</sup> Te Pedro jín táca gá apóstol ni cacahān de:

Cánuú jéē squícu ná jniñu ní ndacu Yaā Dios nuū ná te nasūú jniñu nándacu tēe. <sup>30</sup> Máá Yáā Dios jíí yō ni nastécu yā Jesús, Yaā ní cajehni maá ní jeē ní cata caa ní yá jicā cruz. <sup>31</sup> Te ni sáha Yaā Dios jeē ní ndujéhnu tucu Jesús néne ya ichi ndáváha Yaā Dios, te cúu ya Yaā ndácu jniñu, Yaā jnáma ñayuu. Te súcuan ni sáha Yaā Dios návāha yóhó, jéē cácuu yó ñáyuu Israel, na nácani ni yō jeē stóo yó cuéchi yó, te cone cáhnu ni yā nuū tāca cuéchi yó. <sup>32</sup> Te máá ná ni cajito ná táca jniñu yáha, te suni máá Espíritu Santo steén cají yá jeē súcuan cúu, chi jéhe Yaā Dios Espíritu Santo yā condee ini anuá tāca ñáyuu jeē cájendetū nuū yā, achí de.

<sup>33</sup> Te ná ni cajini sōho un jnúhun yáha, te yōhyo ni caquítī ni, te cahni de CÁCUNI NUÚ. <sup>34</sup> Te mēhñú un jijnáhan néne ñn tēe grupo fariseo nání de Gamaliel, te cúu de maestro jeē steén ley yā, te tāca ñáyuu cájejnúhún i de. Te ni ndocuiñī de, te ni ndacu de jniñu jeē na cújiyo núu tēe apóstol. <sup>35</sup> Te ni cahān de:

Róhó jnáhan ñuu yō Israel, cani vāha ni rō núu na vé CÁCUNI RÓ SÁHA RÓ JÍN TÁCA TEE YÁHA. <sup>36</sup> Chi nucūhun ni rō jeē ñn cuiyā ni ndonda Teudas siquī gobierno, te ni cahān de jeē tēe téyí cúu de, te ni cacutútú nájñuhun cuñn ciento tēe jíin de. Yūcuán na te ni cajehni ñayuu Teudas, te tāca jéē ní caquiynáhan jíin de ni cajitē núu cuangoo sáá-ni, te ni jecuiñī-ni jniñu ún. <sup>37</sup> Yūcuán na te quiñī ni íyo censo te Judas, ñn tēe Galilea, ni ndonda de siquī

gobierno, te ni cacutútú cuéhē tēe jíin de. Te suni ni cajehni ñayuu Judas, te tāca tēe jeē ní caquijnáhan jíin de ni cajitē núu cuangoo. <sup>38</sup> Te vijna na cuáha ri consejo rohó. Ma stáhān gā rō tēe yáha. Siáá de na quíngoo de. Chi núu ñayuu-ni ni squeejéé jniñu yáha, te jecuiñī ī. <sup>39</sup> Te núu Yaā Dios ni squeejéé, te ma cúu casi rō, chi sanaa te siquī Yaā Dios cándonda ró, áchí de.

<sup>40</sup> Te ni cachusóhó jéē ni cáhān Gamaliel. Te ni canacana tēe cácuu apóstol, te ni cacani de jíin cuarta ññ te ni cacahān xeēn jíin de jeē ma cahán gā de jnūhun Jesús, te ni casiáá de cuangoo de. <sup>41</sup> Te máá apóstol ni quendacoo de nuū junta cuangoo de, cácusī ni de jeē ni jéhe ya jnūhun ndoho de jeē cuáha ñayuu jnūhun canu de siquī jeē cácandíje de ya. <sup>42</sup> Te ndiquivī castéén de jnūhun vāha Jesucristo, te cánacani de jnūhun ún ini templo jíin táca-ni vehe.

*Jeē ní cajeni de uxā tēe cuajniñu mēhñu ñáyuu cácandíje*

## 6

<sup>1</sup> Te ni cucuehē ñayuu cácandíje. Te tiempo un te tēe hebreo jeē cácahān yuhu griego, ni quejéé de cácahñu de nuū jnáhan hebreo de, áchí de jeē ñahan viuda jeē cácahān yuhu griego tu cánihīn vāha ña staā jeē cásaja de tāca quívī cuu ña. <sup>2</sup> Yūcuán na te máá ndihúxí uū apóstol ni canastútú de tāca ñáyuu cácandíje, te ni cacahān de:

Tú vāha jeē jecuiñī jniñu jeē cánacani ri jnūhun Yaā Dios siquī jeē cásaja rī staā. <sup>3</sup> Núu súcuan te rōhó, hermano, nacāji ró úxā jnáhan máá yó, te

na cóndiso jniñu de saja de staā. Te nacāji ró téē jeē cájejnúhún ñáyuu de, tēe ndíchí jeē ní cunuú Espíritu Santo jíin de. <sup>4</sup> Te ruhū jijnáhan ri, máni cacān tahu rī jíin jeē nácani ri jnūhun ya, achí de.

<sup>5</sup> Te ndihi ñayuu ni canujnahan ni i jnūhun ni cacahān de. Te ni canacāji i Esteban, tēe cándíje vāha jeē ní cunuú Espíritu Santo jíin de. Te suni ni canacāji i Felipe jíin Prócoro jíin Nicanor jíin Timón jíin Parmenas jíin Nicolás. Te Nicolás cúu tēe ñuu Antioquía, te ni nduu de tēe cándíje sahān ñayuu hebreo nde ná tu candíje de jnūhun Cristo. <sup>6</sup> Te ni cajeni i tāca téē yáha núū téē cácuu apóstol, te tēe apóstol un ní casoó de ndaha de xinī tāca téē un ní cajicān tahu de nuū Yaā Dios siquī jniñu condiso de.

<sup>7</sup> Te jnūhun Yaā Dios ni jitē gā cuahān, te ni nducuehē teyí ñáyuu cáncandíje i jnūhun ya ini ñuu Jerusalén. Te suni cuehē sutū ni cacandíje de jnūhun ya.

### *Jeē ní cajni de Esteban*

<sup>8</sup> Te ni chindéé ñáhán yá Esteban ni jēhe ya poder nuū de, te ni sáha de tācá jniñu jéhnū nuū ñáyuu, jniñu jeē steén jeē cujéhnū Yaā Dios. <sup>9</sup> Te ñayuu hebreo jeē ní cacuyāhu i te ni canduu libre i, iyó vehe i sinagoga i. Te tēe un cácuu tēe ñuu Cirene jíin téē ñuu Alejandría jíin téē Cilicia jíin téē Asia. Te sava tēe un ní caquejéé de cástáhān jnāhan de jíin Esteban. <sup>10</sup> Te tu ní cácundeyí jíin de, chí ndíchí ní cahān de ni sáha máá Espíritu Santo. <sup>11</sup> Yūcuán na te ni cascáhān sava tēe jeē na cáhān jnūhun stáhú siquī Esteban. Te ni cacahān jeē ní cajini sōho cáhān ndevāha Esteban siquī Moisés jíin siquī

Yaā Dios. <sup>12</sup> Te jeē súcuan ni cacahān te ni caquitī ni tāca ñáyuu jíin tēe jéhnū cándiso jníñu jíin tēe cástéén jnūhun tutu ley yā. Te ndihī de ni candonda siquī Esteban, te ni cajniī de cuango jíin de nde nuū junta cujéhnū ga. <sup>13</sup> Te ni cajeni de tēe cahān jnūhun yáá siquī Esteban, te suhva ni cacahān:

Tēe yáha tu ndé jécuiñī de jeē cahán ndevāha de siquī templo iī yáha jíin siquī ley yā. <sup>14</sup> Chi ni cajini sōho ná cáhán de jeē Jesús, tēe ni jehnu ñuu Nazaret, canu de templo yáha te nasama de jeē tajnúni ley yā jeē ni jéhe Moisés nuū yō, áchí.

<sup>15</sup> Yūcuán na te ndihī tēe cáyūcu núū junta un ní candacoto vāha nuū Esteban, te ni cajini jeē jito nuū de ná jito nuū in ndajéhé Yaā Dios.

### *Jnūhun ni nacani Esteban*

## 7

<sup>1</sup> Te máá sūtū cujéhnū ga ni cajnūhún Esteban:

¿A ndáa jeē súcuan ni sáha ró nájñūhun cácahān de yāhá? áchí.

<sup>2</sup> Te ni cahān Esteban:

Ndihī níhín jēe cácuu ní jnáhan ñuu yō, jíin ndihī níhín jēe cácujehnū ní núū ñúū yō, cuni nahín ní jnūhun cahān ná: Máá Yáa Dios jeē yóhyo cújéhnū ya, ni steén yā maá yá nuū jíi yō Abraham nde na néne ga de región Mesopotamia, nde ná tu quihīn de condee de ñuu Harán. <sup>3</sup> Te ni cahān yā jíin de: Stóo ñuu rō jíin táca jnáhan ró te quihīn rō nuū cuáha ri condee rō, chí máá rí steén ichi nuū quihín rō, achí yá. <sup>4</sup> Yūcuán na te ni quenda de región Caldea, te ni jinū de ni condee de ñuu Harán. Te yūcuan ní jihī tatá de. Yūcuán na te ni sáha Yaā Dios

jeē ní quee de ñuu yáha núū cáyūcu yó vijna. <sup>5</sup> Te tu ní jéhe ya ni ñn tíhlí ñuhun yáha cuu tahū de. Te vēsú súcuan te ni jejnūhun ya jeē cuáha ya ñuhun un núū de nde jíin núū tāca séhe de, vēsú ná tu coo sēhe de sáá. <sup>6</sup> Te súcuan ni cahān Yaā Dios jíin de: Sēhe ró coyūcu jíca i inga ñuu, te cuūn ciento cuiyā sájniñu sáá-ni i te stóho ñayuu yúcuan i. <sup>7</sup> Te siquī jeē súcuan sáha i jíin séhe ró, te máá rí chi stóho ri ñayuu ñuu ún. Te sáá te quendacoo sēhe ró yúcuan, te nucoyūcú i yāhá chiñúhún i ruhū, achí yá. <sup>8</sup> Te ni cahān yā jíin Abraham jeē na cúu de circuncidar, jeē cúu ñn jnunī jeē ni sáha ya contrato jíin de. Te ná ni cacu sēhe de Isaac te ni sáha de circuncidar i nuū uná quivī. Te suni súcuan ni sáha Isaac jíin séhe de Jacob, te Jacob jíin séhe yí de jeē cácuu ndihúxí uū yucūn ñayuu Israel.

<sup>9</sup> Te tāca séhe Jacob ni cacucuésún ni de jíin ñani maá de José, te ni caxícó de i nuū tée jeē ní cajendēca i nde nación Egipto. Te Yaā Dios chi ni ndito ya José. <sup>10</sup> Te ni jnama ya i nuū tāca jnúndóho ní jito i, te ni cundíchí i ni sáha ya. Te Faraón, tēe cúu rey nación Egipto, ni cusī ni de jíin i ni sáha ya, te ni tejniñu de José jeē cúu de gobernador te ndacu de jniñu nación Egipto jíin núū ñayuu cáyūcú vehe Faraón.

<sup>11</sup> Te ni quiji quivī jeē ni íyo ñn jnamā xeēn, te ni ndoho ñayuu ñn cáhnu nación Egipto jíin ndé ñuu Canaán. Te tāca jíí yō ún, tuá ni cánihīn de jeē cáji de. <sup>12</sup> Te ni nihīn Jacob jnūhun jeē iyó trigo nde nación Egipto, te ni tají de sēhe de ni jengoo de ni cajeen de trigo vuelta ñn. <sup>13</sup> Te jeē cuángoo de vuelta uū te ni nastúu José jeē maá de cúu ñani de jíjnáhan de. Yūcuán na te ni jini rey Faraón ndé ñn



jnáhan cúu José. <sup>14</sup> Te ni cahān José jín táca ñani de jeē na cóndeca de tátá de Jacob jín ndihī jnáhan vehe de. Te ni iyo unī xico xahūn i. <sup>15</sup> Te súcuan ni cuu jeē ni jínū Jacob ni condee de nación Egipto nde ni jihī de. Te suni yūcuan ní coyūcu séhe de jeē cácuu jíi yō un ndé ni cajihī maá de. <sup>16</sup> Te ná ni quee quivī jeē ndénehen ya táca yúcūn de jeē cáyūcu tátú de nación Egipto, te ni cacondiso de yiqui ndihúxí uū ndīyī jii un jéē ndíji ñuu Siquem, te ni cachindūji de ini yaū ndīyī ndeé jícā cáva jeē ní jeen jii yō Abraham nuū táca séhe Hamor ñuu Siquem.

<sup>17</sup> Te nde ná cáyūcu gá de nación Egipto, te cuacuyajni quivī jeē squícu jnūhun ni cahān Yaā Dios jín Abraham jeē quéndacoo sēhe de nucoyūcú i ñuu ni jéjnūhun ya nuū i, te ñayuu un ní tahū cuehē i ini nación Egipto. <sup>18</sup> Yūcuán na te ni nucuiñī inga rey ñuu Egipto jeē tu ní jíní de jeē váha ni sáha ndīyī José. <sup>19</sup> Te rey un ní stahú de táca jii yō te ni sáha ndevāha de jín i, chi ni sáha fuerza de i jeē ma cóto ga i sēhe yiquín i te na cúu. <sup>20</sup> Te tiempo un ní cacu Moisés, te ni cusī ni Yaā Dios jín i. Te unī yoō ni condito sáhi náná i tátá i. <sup>21</sup> Te tuá ni cúu condito sáhi de i, te ni cachune de i nuū nanihīn sēhe síhí Faraón i, te ni naquihin séhe ña i ni scuéhnu ña i nájñūhun sēhe máá ña. <sup>22</sup> Te ni cutūhva Moisés táca jnūhun ndíchí ñuu Egipto, te ni kujénu de jín jnūhun cáhán de jín jniñu sáha de.

<sup>23</sup> Te nuū uú xico cuiyā de te ni jecondēhé de jnáhan de jeē cácuu ñayuu Israel. <sup>24</sup> Te ni jito de nuū ñn tēe nación Egipto jeē sáha ndevāha jín ñn tēe Israel. Te Moisés ni jnama de jnáhan de Israel ún, chi ni jehni de tēe Egipto un. Te súcuan ni ndutahū jeē ni sáha ndevāha jín jnáhan de ún. <sup>25</sup> Te máá

Moisés jéni ni de jeē jécūhun ni tāca jnáhan de jeē Yáa Dios ni tají yá de jeē jnáma de jnáhan de ún ini nación Egipto nuú, te tu ní cájecūhun cuiṭi ni jnáhan de ún. <sup>26</sup> Te inga quiṽi suni ni jito de nuū uú tēe Israel jeē cácejnáhan, te cúní de jeē na jécuiñi. Te jeē yúcuan ní cahān de jín: ¿Najehē casáha ndevāha ró jín jnáhan ró? Chí nájnūhun in ñani-ni cácuu ró, áchí de. <sup>27</sup> Te máá tēe cáni tahū jnáhan un ní chundahá de Moisés te ni cahān de: ¿Nde in ni jeni róhó jēe cujéhnú ró núū rī te sándaā rō jniñu ri jijnáhan ri? <sup>28</sup> ¿Chí suni cúní rō cahni rō ruhū nájnūhun ni jehni rō tēe Egipto icu chí naún? áchí de jín Moisés. <sup>29</sup> Te nuū ní jini sōho Moisés jnūhun yáha, te ni yūhú de jeē cáhni rey de, te ni jinu de cuahān de inga nación. Te ni condee de ñuu jicá Madián, te yūcuan ní scácu ñasihí de uū sēhe yí de.

<sup>30</sup> Te ni jinu uū xico cuiyā jeē néne de yūcuán. Yūcuán na te in ndajéhé Yáa Dios ni quenda ya nuū de nde nuū ñūhun téhé nuū ín yucu súcún Sinaí. Te ni quenda ya nuū de xinī in yucū cui cáhnu cándahá yáñuhūn, te tu ní cáyú yucū ún. <sup>31</sup> Yūcuán na te Moisés ni naa ni de jito de ún, te ni jehēn de nde nuū, návāha coto vāha de. Te ni jini sōho de jeē cahán maá Jítoho yō jín de: <sup>32</sup> Máá rí cúu Yáa Dios tāca jí rō jenahán, Abraham jín Isaac jín Jacob, achí yá. Te Moisés, quiṽi i de jeē yūhú de, te jeē yúcuan tuá ni cúndeyí ni de coto de nuū. <sup>33</sup> Te máá Jítoho yō ni cahān yā jín de: Quenehen ndijēn rō chí nuū ín ró, ñuhun íi cúu. <sup>34</sup> Je ni jini rī ñayuu maá rí jeē yóhyo cándoho i nación Egipto, te suni jini sōho ri jeē cájnana uhū i, te ni cuun ri vēji ri jeē jnáma ri i jijnáhan i. Núu súcuan te vijna chí tají rí rohó ndicó

ró quihīn rō nde nación Egipto, achí yá jiín de.

<sup>35</sup> 'Te nde ná tu quenda Moisés Egipto, te tāca jnáhan de ni casquéhichī i de jeē ní cacahān i jiín de: ¿Ndé ñn ni jeni rōhó jéē kujéhnū rō núū rī te sándaā rō jniñu ri? ni cacahān i jiín de. Te vēsú súcuan te máá ndajéhé Yaā Dios ni quenda nuū Moisés un jéē cándahá cáyú yucū cuíi ún. Te súcuan ni cuu jeē ní natají yá de cuanuhun de nde Egipto jeē ndácu de jniñu nuū i te jnama de i. <sup>36</sup> Te máá Moisés ni sáha de jeē ní quendacoo jnáhan ñuu de ini nación yúcuan, te ni cayāha de Mar Rojo, te ni cajica cuu de ñuhun téhé úū xico cuiyā. Te ní tiempo un ní sáha de cuehē jniñu jéhnū jeē steén jeē kujéhnū Yaā Dios. <sup>37</sup> Te máá Moisés cúu jeē suhva ni cahān de jnūhun yáha jiín jnáhan ñuu yō Israel: Máá Yáā Dios cani ya Yaā nacani jnūhun nuū rō jijnáhan ró nájjnūhun ni jeni ya ruhū. Te cuu ya ñn jnáhan ñuu yō. Te na chúhun ni rō jnūhun cahān Yaā ún, áchí. <sup>38</sup> Te suni nde ná ni cajica cuu jíi yō nde nuū ñúhun téhé, te ni cahān ndajéhé yā jiín Moisés xinī yúcu súcún Sinaí, te ni nihīn de jnūhun jeē cahán ndese nihīn tahu yō cotecu yō, te ni nacani de jnūhun un núū tāca jíi yō, te ni quendōo jnūhun un núū yō.

<sup>39</sup> 'Te tāca jíi yō ún tu ní cáconi de cuandetū de nuū Moisés, chi sa suhva ni cacuni de squéhichī ni de Moisés, te ni cacuni de nandicó de nungoo de Egipto nuú. <sup>40</sup> Te ni cacahān de jiín Aarón: Sáha ní tijnī yaā na cósnūu núū yō. Chi Moisés, jeē ní quenehen de yóhó Egipto vējicoo yó, tu cájini yō na vé ni ndoho de jeē tú de ndéē jeē cuahán de xinī yucu Sinaí, achí. <sup>41</sup> Yūcuán na te ni cajēhe de oro ni cuvāha ñn becerro oro, te nuū becerro ídolo un

ní casocō de quitī, te ni cacusī ni de jín ídolo ni casáha de ún. <sup>42</sup> Te Yaā Dios ni cujiyo ya cuahān yā, te ni stóo ya de na chíñúhún de nuū tāca jeē jító yó ín andiví, nájnūhun yósó núū tútu tēe ni canacani jnūhun Yaā Dios nde jenahán:

Ni cahān yā: Róhó ñáyuu Israel,

¿á cájeni ni rō jeē nuū ruhū ni casocō rō quitī ná ni cajica cuu ró úū xico cuiyā nde nuū ñúhun téhé?

<sup>43</sup> Tuú, chí sa suhva ni cacondiso ró nicho jeē íne ídolo jeē naní Moloc

jín figura quīmi jeē naní Renfán, ídolo jeē ní casáha máá ró ni cachiñúhún ró.

Jeē yúcuan cúu jeē siáha ri rohó quíhīn jicá ró nde yatā ñúū Babilonia, achí yá.

<sup>44</sup> Te ni ndacu ya jniñu nuū Moisés jeē na sáha de vehe ñī nuū chíñúhún de ya, nájnūhun cáa jeē ní steén yā nuū de. Te tāca jí yō, nde nuū ñúhun téhé ní canevāha de vehe ī un núū ní cachuvāha de tabla yuū jeē yosó jnūhun ley yā. <sup>45</sup> Te ni castóo de vehe un núū ndihī sēhe de jeē cúu jí yō. Te ni quiví Josué jín jí yō ini nación yáha, te ni sáha ya jeē ní cacundeyí de jín táca ñáyuu jeē ní cacoyūcu yáha ní cajinu i cuango i. Te ni quivícoo de tēcá ñuu i jín vehe ī ún, te ni quendōo nde quiví ní cuu David rey. <sup>46</sup> Te ni cusī ni Yaā Dios jín rey David. Te ni jicān de nuū yā jeē sáha de ñn vehe ī yā nuú, chí máá yá cúu Yaā Dios jí de Jacob. <sup>47</sup> Te ni cuu jeē nde sēhe yí de Salomón ni sáha vehe ī yā. <sup>48</sup> Te vésú súcuan ni cuu te Yaā cujéhnu téyí, tu ndéé yá maá vehe jeē casáha ñáyuu, nájnūhun ni cahān tēe ni nacani jnūhun ya nde jenahán:

<sup>49</sup> Ni cahān yā:

Andiví cúu nájñūhun mesa nuū ndácu ri jñiñu  
 te ñayīvi cúu nájñūhun ññ nuū yítuu jehē rī.  
 Núu súcuan ¿te ndese cuu sáha ró vehe jeē cóndee  
 rī,

te ndese cuu sáha ró núū ndétātu rí?  
<sup>50</sup> ¿A násūu máá rí ní sáha ndihī jeē iyó?  
 áchí máá Jítóho yō Yaā Dios.

<sup>51</sup> Te cáhān gā Esteban:

Yōhyo cácuñhni ni ní, te tu cácuñi ní chusóhó ní,  
 te cácuñi ní nájñūhun ñayuu tācá nación jeē tu cájini  
 i jñūhun ya ni tu cácuñi i ya. Chi ní ní cájesi ni núū  
 Espíritu Santo, te nájñūhun ni casáha jíi yō jenahán,  
 suni súcuan casáha ní vijna. <sup>52</sup> ¿A ní iyo tēe nácani  
 jñūhun ya nde jenahán jeē tu ní sáha ndevāha jíi  
 yō jíi de? Chi jíi yō ni cajehni de tēe ni canacani  
 jñūhun jeē quíji máá Yāā ndaā. Te je ni quíji Yāā ún,  
 te máá ní ni canastúu ni yá nuū tēe ni cajehni de ya.  
<sup>53</sup> Te vēsú nde jíi táca ndajéhé yā ni jēhe ya ley yā  
 nuū yō, te máá ní chi tu cácuñi ní, áchí Esteban.

### *Jeē ní cajehni de Esteban*

<sup>54</sup> Tāca jñūhun yáha ní cajini sōho, te yōhyo ni  
 caquiti ni, te cácuñi yuhu cájito nuū Esteban.

<sup>55</sup> Te máá Esteban chi ni cunuú Espíritu Santo jíi  
 de. Te ni jito de ichi ándiví, te ni jini de jeē ndíndēe  
 núū néne Yāā Dios, te índichi Jesús ichi ndávāha ya.

<sup>56</sup> Te ni cahān de:

Vijna te jíto ri jeē núne andiví, te jíto ri nuū maá  
 Yāā ní nduu tēe, índichi yā nuū cujēhnu ya lado váha  
 Yāā Dios, áchí de.

<sup>57</sup> Yūcuán na te ni cajesi un sōho, te ni cacana  
 cóhó, te inuú-ni ni candonda siquī Esteban. <sup>58</sup> Te  
 ni caquenehen Esteban cuangoó jíi de nde yatā  
 ñūū. Te tēe ni cacahān yaá un jíi ndihī jñāhan de

ni cachucú de ticāchí de ndíto ñn tēe suchí nání Saulo, te ni cacani de yuū xinī Esteban. <sup>59</sup> Te níní jéē cácani tāca tēe un yúū xinī de te ni jicān tahu de nuū yā:

Tátā Jesús jeē cúu ní Jitoho ná, naquihin ní ánuá na vijna, áchí de.

<sup>60</sup> Te ni jecuiñī yití de te ni cahān jee de:

Tátā Yaā Dios, ma quénehen ní cuéchi siquī i jeē casáha i jín ná, áchí de.

Súcuan ni cahān de te ni jihī-ni de.

*Jeē ní jito xeēn Saulo ñayuu cá candíje*

## 8

<sup>1</sup> Te Saulo, ni nujnahan ni de jeē ni jihī Esteban.

Te quivī un ní caquejéé de cájito xeēn ndasí de ñayuu cá candíje Jesús ini ñuu Jerusalén, te jeē yúcuan cúu jeē ní cajitē núu ñayuu cá candíje cuangoo i ní Judea jín ní Samaria. Te tēe apóstol chí tu ní cajitē núu de. <sup>2</sup> Te sava tēe yíñúhún núu Yaā Dios, ni cachindūji de Esteban. Te yōhyo ni candahyū de jeē ni jihī Esteban. <sup>3</sup> Te Saulo chí jito xeēn de ñayuu cá candíje, te quivī de ndijnahan vehe te jnī de tēe, ñahan, chūhun de i vecāa.

*Jeē ní canacani i jnūhun Yaā Dios ndañūū Samaria*

<sup>4</sup> Te tācá ñuu nuū cuángoo tāca ñáyuu ní cajitē núu un ní canacani i jnūhun ndese jnáma Yaā Dios ñayuu. <sup>5</sup> Te ni jinū Felipe ñn ñuu ndañūū Samaria, te nuū ñáyuu yúcuan ní nacani de jnūhun Cristo, Yaā ní jeni Yaā Dios jeē jnáma ya yohó. <sup>6</sup> Te tāca ñáyuu ní cacutútú un ní cajini nahín váha i tāca jnúhun ni nacani Felipe, te ni cajito i tācá jniñu

jéhnū ni sáha de. <sup>7</sup> Chi cuehē ñayuu cándoho tachī ni canduvāha i, te cácana cóhó táchī un ní caque-ndacoo. Te cuehē ñayuu ni íjin jín ñáyuu ríngo ni canduvāha. <sup>8</sup> Te jeē yúcuan ní cacusiñ teyí ni ñayuu ñuu ún.

<sup>9</sup> Te ini ñuu un néne ñn tēe nání Simón, te tēe tásí cúu de. Te nde ná tu jinū Felipe ñuu Samaria, te yōhyo cánaa ni ñayuu ñuu un cájito i jeē sáha Simón, te ni stahú de i ni cahān de jeē ñn tēe cújéhnū téyí cúu máá de. <sup>10</sup> Te nde tēe cácujehnū jín ndivii cuiti ñayuu, cájetáhú ndasí i jnūhun cáhán de, te ni cajeni ni maá i te ni cacahān i:

Tēe yáha ní jēhe Yaā Dios cuehē poder nuū de, áchí i.

<sup>11</sup> Te cájetáhú váha i jnūhun cáhán de, chi cuehē tiempo ni sáha de jniñu stáhú ní canaa ni i ni cajito i. <sup>12</sup> Te nuū ni jínū Felipe, ni nacani de jnūhun vāha ndese ndácu Yaā Dios jniñu, jín jnūhun Jesucristo, te ni cacandíje i te ni cajendute i, cúu tēe cúu ñahan. <sup>13</sup> Te suni máá Simón ni candíje de te ni jendute de, te ni jica cuu de jín Felipe. Te ni naa ni de jító de tācá jniñu jéhnū jeē sáha Felipe jeē steén jeē cujéhnū Yaā Dios.

<sup>14</sup> Te cáyūcu tēe apóstol ñuu Jerusalén, te ni canihñ de jnūhun jeē ñáyuu Samaria ni cacandíje i jnūhun Yaā Dios. Te ni catají de Pedro jín Juan cuangoo de yūcuán. <sup>15</sup> Te ni jinūcoo de, te ni cajicān tahu de jehē ñáyuu un návāha na quiví Espiritu Santo ini anuá i jínáhan i. <sup>16</sup> Chi ná tu quiví ya ini anuá ni ñn i, chi máá-ni jeē ní cajendute i jeē ní cacandíje i Jitoho yō Jesús. <sup>17</sup> Yūcuán na te Pedro jín Juan ni casoó de ndaha de xinī i jínáhan i, te ni quiví Espiritu Santo ini anuá i.

18 Te ni jito Simón jeē súcuan cásoó apóstol ndaha de xinī ñáyuu ún te súcuan quívi Espíritu Santo ini anuá i, te cúní de cuāha de xūhun núū tée apóstol návāha nihīn de poder un núú. 19 Chi ni cahān de:

Cúní na jēē cuāha ní poder yáha núū na, návāha núū ndé ñáyuu soó ná ndaha ná xínī i te quívi Espíritu Santo ini anuá i, áchí de.

20 Yūcuán na te ni cahān Pedro jíin de:

Na náā xūhun ró je jnahnū ndetū rō siquī jeē jéni ni rō jeē jíin xūhun te cuu cuaan ró táhū jeē véji nuū Yaā Dios. 21 Ma nihín tahu rō jeē sáha ró jniñu yáha, chi tu íyó ndāā anuá rō nuū Yaā Dios. 22 Núu súcuan te jíni ñúhún jēē stóo rō jnúhun jeē jéni néé ni rō súcuan te cahān ndahú ró jíin Yáā Dios, te máá yá sanaa te cone cáhnu ni yā siquī jeē jéni néé ni rō súcuan. 23 Chi jíni rī jeē cucuésún ni rō siquī jeē sáha ri jniñu yáha. Te tāca jēē neé jéni ni rō ní cunuú un jíin ró, achí Pedro jíin de.

24 Yūcuán na te ni cahān Simón jíin de:

Cacān tahu ni jéhē na jíjnáhan ní núū maá Jítóho yō návāha tú jnahnū ndetū na nájnūhun ni cahān ní, áchí de.

25 Te Pedro jíin Juan ni cacahān cají de ndese cácadíje de jnúhun Yaā Dios. Te jeē cuánungoo de ichi ñúū Jerusalén, te tijní ndañúū Samaria ni canacani de jnúhun jeē jnáma ya ñayuu.

### *Felipe jíin tée nación Etiopía*

26 Yūcuán na te ni cahān ndajéhé maá Jítóho yō jíin Felipe:

Quihín ichi te quihīn rō ichi sur, ichi jeē quénda Jerusalén cuahān nde ñuu Gaza, áchí yá.



Te ichi chúcuan chi máá ñuhun téhé cúu. <sup>27</sup> Te ni quihin Felipe ichi cuahān de. Te nde nación Etiopía ni quiji ñn tēe eunuco jeē ndíso jníñu de cúu de tesorero nuū ñáhan cúu reina ndácu jniñu nación Etiopía, nání ña Candace. Tēe un ní quichiñúhún de Yaā Dios ñuu Jerusalén. <sup>28</sup> Te cuanuhun de néne de nuū carreta de, te cáhu de tutu jeē ní tee Isaías, tēe ni nacani jnūhun Yaā Dios nde jenahán. <sup>29</sup> Te máá Espíritu ni cahān yā jíin Felipe:

Cuáhán quiñnahan rō tēe cuahān jíin carreta un.

<sup>30</sup> Te ni jeñnahan Felipe carreta un, te ni jini sōho de jeē cáhu tēe ún tutu jeē ní tee Isaías. Te ni cajñūhún de tēe ún:

¿A jécūhun ni ni jnúhun jeē cáhu ní chí tuú? áchí de.

<sup>31</sup> Te ni cahān maá tée un jíin Felipe:

¿Te ndese jecūhun ni ná? Chi tú na tēe castūhun núū ná ndese cúu ún, áchí de.

Te ni cahān de jíin Felipe jeē na cáa de conēne ndúú de jíin de ini carreta.

<sup>32</sup> Te jnūhun cáhu de tutu iī un cáhán suhva:

Nájñūhun lanchi jeē cuahán tī nuū cúū tī, súcuan ni casáha ñayuu jíin yá.

Te nájñūhun ñn londe quiñi sáte jéē tu ndáhyú tī, súcuan ni sáha ya,

chi tú na vé ni cáhán cuiñi yā ná ni cajicān i cuēchi siquī yā.

<sup>33</sup> Te hora jeē ní cajēhe i jnūhun canu yā, tu ní casáha ndaā i siquī yā jíin jnúhun ndaā,

te ni cajehni i ya ini ñayīvi yáha.

Te coo cuehē ñayuu candíje nuū yā jeē ma cánda ni ñn ñayuu cahu i ñayuu ún.

Achí.

<sup>34</sup> Yūcuán na te ni cahān tēe Etiopía un:

Cava vāha ni ní cachi ni núū ná, ¿ndé síquī cahán tēe ni nacani jnūhun yáha? ¿A síquī maá de chí síquī ínga tēe? áchí de jíin Felipe.

<sup>35</sup> Yūcuán na te ni nacani Felipe jnūhun vāha Jesús nuū tée ún, chi ni quejéé de ni castūhún de jnūhun jeē ní cahu tēe ún, jíin táca gá jnūhun jeē yosó núū tútu yā. <sup>36</sup> Te níni cuángoo de ichi ún te ni jinūcoo de nuū ñúhun ndute, te ni cahān tēe Etiopía:

Yāha ñúhun ndute ¿te á tú cuu cuandute ná? áchí de.

<sup>37</sup> Te ni cahān Felipe:

Cuu te núu cándíje nīhin ni ndé jíin ini jíin ánuá ni táca jéé ni sáha Jítoho yō Jesús jehē yō, achí de.

Te ni cahān tēe Etiopía:

Cándíje ná jéé Jesucristo cúu máá Séhe Yaā Dios, achí de.

<sup>38</sup> Te ni sáha de jeē na jécuiñī carreta de, te ni nuu ndíndúú de cuangoo de ichi véyí núū ñúhun ndute ún, te ni scuándute Felipe tēe Etiopía. <sup>39</sup> Te nuū ní quendacoo de nuū ndúte, te Espíritu maá Jítoho yō ni sáha ya jeē ní ndoñúhún-ni Felipe. Te tēe Etiopía vēsú tuá ni jító de nuū Felipe, te cúsiñi ni de cuahān de. <sup>40</sup> Te ni nane Felipe ñuu Azoto. Te nácani de jnūhun ndese jnáma ya ñayuu, cuahān de táca ñuu nde ni jinū de Cesarea.

*Jeē ní nasāma ini Saulo ni sáha Jesucristo  
(Hch. 22.6-16; 26.12-18)*

## 9

<sup>1</sup> Te Saulo chi máni cáhán de jeē cáhni de táca ñáyuu cácandíje i máá Jítoho yō, te jeē yúcuan ní

jehēn de nuū sutú cujēhnu ga. <sup>2</sup> Te ni jicān de carta jeē cahán jeē quihín de tǎcá vehe i sinagoga ñuu Damasco te cuhni de tēe ñahan jeē cácanđije i Jesús, quiji de jíin i ñuu Jerusalén nuú. <sup>3</sup> Te ni quihin de ichi cuahān de. Te cuacuyajni de ñuu Damasco, te sanaa-ni te ichi ándiví ní stíndēé ñn luz nuū de. <sup>4</sup> Te ni cotúú-ni de nuū ñúhun, te ni jini sōho de ñn jnūhun cáhán jíin de:

Saulo, Saulo, ¿najehe jíto xeēn rō ruhū? achí.

<sup>5</sup> Te ni cahān maá de:

¿Na nihín cúu jeē cahán, Tátā?

Te ni cahān yā jíin de:

Máa rí cúu Jesús, te jeē jíto xeēn rō ñayuu cácanđije i ruhū cúu jeē jíto xeēn rō ruhū. Te jeē sáha ró súcuan cúu nájnūhun stiquí jeē tu jéndije ti te jéñú yatá tí xinī pulla, te súcuan stóho ti maá tí, achí yá.

<sup>6</sup> Te máa de chi quísi i de jeē yūhú de, te ni cahān de:

Tátā, ¿na vé cuní ni jēe sáha ná núu súcuan? achí de.

Te ni cahān maá Jítóho yō jíin de:

Ndocuiñi, quívi ró ini ñuu, te yūcuan íyó ñn tēe jeē cachi nuū rō na vé cúu jeē cánuú sáha ró, achí yá.

<sup>7</sup> Te tēe cuangoo jíin Saulo, ni canaa ndasí ni de cájini sōho de ndusu jeē cahán, te tu ní cájito cuiti de nuū jeē cahán un. <sup>8</sup> Yūcuán na te ni ndocuiñi Saulo. Te ni nducú de coto de, te tuá cúu coto de, te ni cajni tēe ún ndaha de ni jinūcoo jíin de nde ini ñuu Damasco. <sup>9</sup> Te yūcuan ní condee de uní quívi. Te tu ní cúu cuiti coto de, ni tú na vé ni yéji de, ni tú na vé ni jíhi de.

<sup>10</sup> Te ñuu Damasco néne ñn tēe cándíje, nání de Ananías. Te máá Jítóho yō ni steén ndijin ya maá yá nuū de te ni cahān yā jíin de:

Ananías, achí yá.

Te máá de ni cahān de jíin yá:

Naun ní sáña, Tátā, áchí de.

<sup>11</sup> Te ni cahān maá Jítóho yō jíin de:

Quihin ichi te quihīn rō calle jeē naní Calle Derecha, te vehe Judas cajnūhun ró ñn tēe nání Saulo ñuu Tarso, chi jíicán tahu de. <sup>12</sup> Te nájnūhun ni jito ndijin de jeē maá ró, Ananías, ni jinū rō, te ni soó ró ndaha ró xínī de, te ni nanune tinūú de, achí yá.

<sup>13</sup> Yūcuán na te ni cahān Ananías:

Tátā, cuehē ñayuu cácahān jeē tēe yúcuán yōhyo jíto xeēn de ñayuu cácaandíje i níhín ñuu Jerusalén.

<sup>14</sup> Te vijna ni quee de yāhá, chi sutū cácujeñnu ni catejníñu de véji de jñi de tāca ñáyuu cácahān ndahú i jíin ní, áchí de.

<sup>15</sup> Te ni cahān maá Jítóho yō jíin de:

Cuáhán, chi máá rí ni nacāji tēe un jéē quihīn de nacani de jnūhun ri nuū tāca ñáyuu nación Israel jíin núū ñáyuu tāca gá nación nde jíin núū tāca rey.

<sup>16</sup> Chi stéén rī nuū de jeē cánuú ndoho de cuehē jnūndóho jeē siquí rī, achí yá.

<sup>17</sup> Yūcuán na te cuahān Ananías. Te ni quiví de ini vehe nuū néne Saulo, te ni soó de ndaha de xínī Saulo, te ni cahān de:

Hermano Saulo, máá Jítóho yō Jesús, Yaā ní quenda ndijin nuū ní ichi jeē véji ní, ni tají yá sáña véji ná núū ni návāha na nánune tinūú ní, te návāha na cúnuú Espíritu Santo yā jíin ní, áchí de.

18 Te ni nanune-ni tinūu Saulo, chi ni nungoo-ni nájñūhun soō chācá ní condihyū tinūú de ún. Te ni ndocuiñi de ni jendute de. 19 Yūcuán na te ni nacaji de staā, te ni nanihīn ni de. Te ni condee de jecu quiivī jín tée cácanđije jeē cáyūcú ini ñuu Damasco.

### *Jeē ní nacani Saulo jñūhun ini ñuu Damasco*

20 Te ni quejéé-ni de nácani de jñūhun Jesús ini tācá vehe iī sinagoga, áchí de jeē Jesús cúu Sēhe Yaā Dios. 21 Te tāca ñáyuu ni cajini sōho jñūhun cáhán de ni canaa ni i, te ni cacahān i:

¿A násūu tée yáha cúu jeē yóhoyo jító xeēn de tāca ñáyuu Jerusalén jeē cájicān tahu nuū Jesús? Te siqui yúcuán ní quee de yāha jéē cúhni de ñayuu cácanđije, te quihīn de jín i nuū sutú cácujuhnu núú, áchí i.

22 Te víhyá gā ni nacani Saulo jñūhun ya, te ni steén cají de jeē Jesús cúu Cristo, Yaā ní jeni Yaā Dios jeē jnáma ya yohó. Te tēe hebreo jeē cáyūcú ñuu Damasco, tu ní cánihīn de modo cahān de jeē tu iyó ndāā jeē cahán Saulo.

### *Jeē ni cácu Saulo nuū jnáhan de hebreo*

23 Te ni yāha cuehē quiivī. Te jnáhan de hebreo ni casquíjnáhan jñūhun de jeē cáhni de Saulo. 24 Te ni nihīn Saulo jñūhun jeē cándito de nduú ñuu táca yéhyí pared jeē ní condúū ndihyú ñuu ún. 25 Yūcuán na te iñ jecuáā te tēe cácanđije ni caquihin de Saulo, te ini iñ jīca cáhnu ni cascúun de Saulo jicā pared ún, te súcuán ni cācu de.

### *Jeē ní najinū Saulo ñuu Jerusalén*

26 Te nuū ní najinū de ñuu Jerusalén, te cúní de najnáhan de jín tée cácanđije. Te ni cayūhu tée un ní cajito de Saulo, chi tu ní cácanđije de jeē ní nduu

Saulo tēe cándíje nuū Jesús. <sup>27</sup> Te Bernabé cuahān de jíin Saulo nuū cáyūcu tēe apóstol, te ni nacani de jnūhun nuū tēe ún ndese ni jini Saulo nuū maá Jítóho yō ichi nuū cuahán de, jíin jéē ni cáhān yā jíin de, jíin jéē jéhnū-ni ni nacani de jnūhun Jesús ini ñuu Damasco. <sup>28</sup> Te ni condee Saulo ñuu Jerusalén ni jica de jíin táca tēe apóstol. <sup>29</sup> Te jéhnū-ni ni nacani de jnūhun máá Jítóho yō. Te jnáhan ñuu de hebreo jeē cácahān yuhu griego, ni castáhān jnáhan jíin de, te máá tēe un cácuni de cahni de Saulo. <sup>30</sup> Te ni cajini tācá hermano cácandíje, te ni cajendēca de Saulo nde ñuu Cesarea. Te yūcuan ní canatajǐ de Saulo cuanuhun de nde ñuu de Tarso.

<sup>31</sup> Te ñayuu cácandíje Jesús jeē cáyūcú Judea jíin Galilea jíin Samaria, tuá ni cájito xeēn ñayuu i. Te ni ije ga i jíin jnúhun ya, te cándiso Iyo i nuū maá Jítóho yō. Te Espírítu Santo ni chindéé ñáhán yá i te ni nducuehē gā i.

### *Jeē ní nduvāha Eneas*

<sup>32</sup> Te tāca lado jécondēhe Pedro ñayuu cácandíje, te suni ni jecondēhé de ñayuu cácandíje cáyūcú ñuu Lida. <sup>33</sup> Te yūcuan ní jini de nuū ñin tēe nání Eneas jeē ní cuu unā cuiyā cáa de chi ni Ijin de. <sup>34</sup> Te ni cahān Pedro jíin de:

Eneas, Jesucristo cúu Yaā nasávāha ya rohó. Ndocuiñī te natuu rō yuu ró, áchí de.

Te ni ndocuiñī-ni tēe ún. <sup>35</sup> Te tāca ñáyuu cáyūcú ñuu Lida jíin ndúhvā Sarón ni cajito i jeē ní nacaca Eneas, te ni casquéndōo i tāca jnúhun jeē tu íyó ndāā te ni cacandíje i máá Jítóho yō.

### *Jeē ní natecu Dorcas*

<sup>36</sup> Te nde ñuu Jope ni ñyo ñn ñahan cándíje, nání ña Tabita, te nuū yúhu griego nání ña Dorcas. Te ñahan yáha máni jniñu váha ni sáha ña, te ni sáha ña caridad ni chindéé ñáhán ña ñayuu cúmanī nuū.

<sup>37</sup> Te tiempo yúcuán ní quejéé cuéhyī jín ña, te ni jihī ña. Te ni cascúchi i ndīyī ún, te ni cajequin i ndīyī un ndé ini cuarto xinī véhe. <sup>38</sup> Te yajni íne ñuu Lida jín ñuu Jope, te tēe cá candíje ñuu Jope ni cajini jnūhun de jeē néne Pedro ñuu Lida, te ni catajī de uū tēe cuacana de Pedro, te ni cacahān de:

Ma cucuéé ní na quíhín yachī yō ñuu Jope, achí de.

<sup>39</sup> Yūcuán na te ni quihin Pedro ichi cuahān de jín tēe ún. Te nuū ní jínū de, te ni cacao tēe un jín de nde xinī véhe nuū catú ndīyī ún. Te tēcá ñahan viuda ni candicó ndúū ña de cándahyū ña, te cástéén ña tēcá sahma jín tícāchi jéē ni sáha Dorcas te ni saja ña nde na técu ña. <sup>40</sup> Yūcuán na te ni ndacu Pedro jniñu jeē na quéndacoo ndīhi ñayuu ún quingoo i nde yatā véhe. Te ni jecuiñī yití de ni jicān tahú de, te ni nandió cóto de nuū catú ndīyī ún, te ni cahān de:

Tabita, ndocuñī ní, achí de.

Te máá ña ni ndacoto-ni ña te ni jito ña nuū Pedro, te ni nucōo-ni ña. <sup>41</sup> Te ni jni de ndaha ña, te ni ndonehen de ña. Yūcuán na te ni nacana de xinī ñayuu cá candíje nde jín ñahan viuda ni ndīvicoo i, te ni steén de ña nuū i jeē ní natecu ña. <sup>42</sup> Te ni jītē jnūhun jniñu yáha ní ñuu Jope cuahān, te cuehē ñayuu ni cacandíje i jnūhun máá Jítoho yō. <sup>43</sup> Te cuehē quivī ni ndōo Pedro ini ñuu Jope, néne de vehe ñn tēe sáha curtir ññ, nání de Simón.

*Pedro jín Cornelio*

## 10

<sup>1</sup> Te ini ñuu Cesarea ni ñyo ñn tēe nání Cornelio, ni cuu de capitán grupo soldado jeē naní Italiano.

<sup>2</sup> Te cúu de tēe ndíso ñyo nuū Yaā Dios nde jíin ndihí ñayuu vehe de, te yōhyo caridad ni tēe cúu de, chí jéhe de xūhun núū ñáyuu hebreo cándoho ndáhú, vēsú nasūu tēe hebreo cúu de. Te níní jícán tahu de nuū Yaā Dios. <sup>3</sup> Te ñn quiví ni steén ndijin yā nuū tēe yáha nájñūhun cahuní jehíni, te ni jito de jeē ñn ndajéhé maá Yáā Dios ni quiví ya nuū néne de. Te ni cahān yā jíin de:

Cornelio, achí yá.

<sup>4</sup> Te máá de ni ndacoto vāha de nuū yā, te ni yūhú de. Te ni cahān de:

¿Na vé cuní ni, Tátā? achí de.

Te ni cahān yā jíin de:

Je chíhi Yaā Dios cuenta jeē jícán tahu rō jíin jēe sáha ró caridad. <sup>5</sup> Vijna te tají ró jecu tēe na quíngoo de nde ñuu Jope, quicana de Simón jeē suni nání de Pedro, na quíji de. <sup>6</sup> Chí néne núu de vehe tocayo de Simón, tēe sáha curtir ññi, te ndéé vehe ún yajni yumar. Te máá de castūhun núū rō na vé cúu inga jeē cánuú sáhá ró, áchí ndajéhé yā.

<sup>7</sup> Te ndajéhé yā jeē ni cáhān jíin Cornelio, cuahān-ni ya. Te ni cana de uū mozo de jíin ñn soldado jeē yíñúhún núū Yaā Dios, chí cúcáhnú ni de jeē squícu vāha tēe ún. <sup>8</sup> Te ni nacani ndihí de jñūhun nuū tāca tēe ún, te ni tají de cuangoo nde ñuu Jope.

<sup>9</sup> Te inga quiví un cájica de ichi cuangoo de, te cuacuyajni de ñuu Jope. Te je yajni cahuxí uū cúu, te suu hora un ní caa Pedro siquí véhe chí cándaā, te yūcuan cácān tahu de. <sup>10</sup> Te ni quee sōco chíji de,



te ni cuni de caji de staā. Te sáá cásáha ña ndeyu te ni steén ndijin yā nuū de. <sup>11</sup> Te ni jito de jeē núne andiví. Te ni jito de nájnūhun ñin sahma manta jité cáhnu te núhni jnáhan ndicúún punta, te ni cuun vēji nuū de. <sup>12</sup> Te chīji un cáñūhun ndinuū quitī, tācá quitī cúún ndaha jíin táca cóo jíin táca quitī cándava. <sup>13</sup> Te ni jini sōho de ñin jnūhun ni cahān:

Pedro, ndocuiñī te cahni rō tācá quitī jiñā, te caji rō tī, áchí.

<sup>14</sup> Te ni cahān Pedro:

Ma cáji na, Tātā, chi tu yéji cuiṭi na táca quitī jeē cahán ley ni jēé tú vāha caji na tí, chi nájnūhun jeē tu cáhīyo ndoo ti nuū ní, áchí de.

<sup>15</sup> Te ni cahān tucu jnūhun un jíin de:

Achí rí jeē iyó váha caji rō tācá quitī jiñā, chi ni sándoo rí, te ma cahán maá ró jeē tu cáhīyo ndoo ti, áchí. Te súcuan ni steén caji yá nuū de jeē cúu quihīn de nuū ñáyuu vēsú násūu jnáhan ñuu de hebreo cúu.

<sup>16</sup> Te unī jíinu ni cahān súcuan jíin de. Te sahma un ní ndaa cuanuhun andiví. <sup>17</sup> Te níni nácani ndasí ni Pedro na vé cuni cahān jeē ní jito ndijin de ún, te ni jinūcoo-ni tēe ni tají Cornelio, cácajnūhún de vehe Simón nde ni jinūcoo de yéhyí tēe ún. <sup>18</sup> Te cácahān jee de cácajnūhún de núu yūcuan ndéé Simón jeē suni nání de Pedro. <sup>19</sup> Te níni nácani ga ni Pedro siquī jeē ní jito ndijin de ún, te Espíritu Santo ni cahān yā jíin de:

Ni quecoo unī tēe cánanducú róhó. <sup>20</sup> Ndocuiñī te nanuu ró, te ma cáni ni rō jeē tú vāha quihīn rō jíin de, vēsú nasūu jnáhan ñuu rō hebreo cácuu de, chi máá rí ni tají rí de vējicoo de, áchí yá.

<sup>21</sup> Yūcuán na te ni nanuu Pedro nuū tée ni tají Cornelio, te ni cahān de:

Máá ná cúu tēe cánanducú ní. ¿Te na síquī vējicoo ní núu na núu súcuan? áchí de.

<sup>22</sup> Te ni cacahān mozo un:

Cornelio, tēe cúu capitán, ni tají de sãñá. Te tēe ndaã, tēe ndíso īyo nuū Yaā Dios cúu de, te tãca ñáyuu hebreo suni cácahān i jeē tēe vāha cúu de. Te ni cahān ñn ndajéhé yā jíin de jeē na cána de níhín jéē ní vehe de te chusóhó de jñūhun cahān ni jíin de.

<sup>23</sup> Yūcuán na te ni cahān Pedro jíin mozo un jéē na cúcōo de ini vehe ún, te ni candōo de yūcuán. Te nuū ní cundijin, te ni quihin Pedro ichi cuahān de jíin mozo un. Te suni cuango jecu hermano cácaandíje ñuu Jope jíin de.

<sup>24</sup> Te nde ñnga quivī ni jinūcoo de ñuu Cesarea. Te Cornelio ndétu de jinūcoo Pedro, chi ni nastútú de tãca jñáhan de jíin táca amigo de jeē quijnáhan vāha ga de jíin. <sup>25</sup> Te nuū ni jíin Pedro jijnáhan de, te ni quenda Cornelio ni cahān de jíin Pedro, te ni jecuiñī yití de jeē chiñúhún de Pedro nuú. <sup>26</sup> Te Pedro ni ndonehen de Cornelio, te ni cahān de:

Ndocuiñī ní, chi sãñá suni ñn tēe-ni cúu ná, áchí de.

<sup>27</sup> Te cándajnūhún de ni quivīcoo de ini vehe. Te ni jito Pedro jeē cáyūcu cuéhē ñayuu ini vehe de.

<sup>28</sup> Te ni cahān Pedro jíin ñáyuu ún:

Je cájini vāha ni jíjnáhan ní jéē ley jeē cánevāha sãña ñáyuu hebreo, cáhán jeē tú vāha jeē quijnáhan ná jíin ní quivīcoo ná vehe ní síquī jeē cúu ní ñáyuu sñn nación. Te Yaā Dios chi ni steén yā nuū na jéē ma cujéē ni na núu ní ñn ñayuu. <sup>29</sup> Jeē yúcuan cúu

jeē vēji-ni ná, chi ni cana ní sáña, te tu ní sájēē ni ná. Te na cájnūhun ná nihín, ¿na siquī ni cana ní sáña? áchí Pedro.

<sup>30</sup> Yūcuán na te ni cahān Cornelio:

Vijna íyó cúūn quiṽī nájñūhun máá hora yáha jéē cúu cahunī jehíni, te ndite ni ná chi súcuan chíñúhún ná nuū yā, te jícán tahu na ini vehe ná. Te ni quiji ññ ndajéhé yā nuū ná, te ndíndēē sahma ññūhun ya. <sup>31</sup> Te ni cahān yā jíin ná: Cornelio, je ni jini sōho Yaā Dios jeē jícán tahu rō, te chíhi ya cuenta jeē sáha ró caridad. <sup>32</sup> Núu súcuan te tají ró mozo na quíngoo de ñuu Jope quicana de Simón jeē suni nání de Pedro, na quiji de nuū rō. Chi tēe un néne de vehe tocayo de Simón, tēe sáha curtir ññ, te yajni yumar ndeé vehe de. Te quee tēe ún te castūhún de nuū rō jñūhun cánuú, áchí yá jíin ná. <sup>33</sup> Súcuan ni cuu te ni tají-ni ná mozo na cuajēcoo de cana de nihín, te na cútahū ná, chi vāha ni sáha ní jéē véji ní. Te vijna ni candutútú ná yāha návāha tāca ná cuni sōho ná ndihi jñūhun Jitoho yō Yaā Dios jeē ni jéhe ya cahān ní, áchí de.

### *Jeē ní nacani Pedro jñūhun ya vehe Cornelio*

<sup>34</sup> Yūcuán na te ni cahān Pedro:

Vijna te ni jini vāha ná jéē Yaā Dios ñnuú-ni sáha ya jíin tāca ñáyuu, cúu ñáyuu hebreo jíin ñáyuu tāca gá nación. <sup>35</sup> Chi cúsiñ ni yā jíin ñáyuu tācá-ni nación núu cándiso íyo i nuū ya te cásáha i jñiñu ndaā. <sup>36</sup> Chi ni cahān yā jíin ñáyuu Israel jeē ndívicoo tāca ñáyuu nuū jñūhun manī yā jíin i sáha Jesucristo. Te máá yá cúu Jitoho tāca yóhó. <sup>37</sup> Máá ní je cájini ní ndese ni cuu. Chi ná ni jñu ni nacani Juan jñūhun jíin jéē ni scuándute de ñáyuu, te ni quejéé Jesús nácani ya jñūhun nde Galilea, te ni jitē jñūhun un

ní cáhnu Judea. <sup>38</sup> Te cájini ni jéē Yaā Dios ni jēhe ya Espíritu Santo jíin poder nuū Jesús, Yaā ní jehnu ñuu Nazaret. Te cájini ni jéē ní jica cuu ya ni sáha ya jniñu váha, te ni nasávāha ya tāca ñáyuu jeē cándoho i sáha jexeén, chi Yaā Dios ni chindéé ñáhán yá Jesús. <sup>39</sup> Chi máá ná cánacani cájí ná jnūhun tācá jniñu ní cajito ná ní sáha ya ní cáhnu Judea jíin ini ñuu Jerusalén. Yūcuán na te ni cajehni i ya, chi ni cata caa i ya jicā cruz. <sup>40</sup> Te Yaā Dios ni nastécu yā maá Jesús nuū uní quivī, te ni ndiji ya nuū na ní cajito ná núū yā ni sáha Yaā Dios. <sup>41</sup> Te tu ní quíji ya nuū tācá inga ñayuu, chi nuū maá-ni tāca ná jeē jé ni nacāji Yaā Dios sãña jéē nácani ná jnúhun tācá jniñu jeē ní cajito ná. Chi ni cayejí na stāa ni cajihí ná ndute jíin yá ná ni nane ya jeē ní natecu yā. <sup>42</sup> Te ni ndacu ya jniñu nuū na jíjnáhan ná jéē na nácani ná jnúhun ya nuū tāca ñáyuu te cahán cají ná jeē maá Yāā Dios ni jeni ya Jesús jeē sándaā yā jniñu ñayuu cátecu jíin ñáyuu ní cajihí. <sup>43</sup> Chi jnūhun Jesús cúu jeē ní cacahán tāca téé ni canacani jnūhun Yaā Dios nde jenahán. Chi ni cacahán de jeē tāca ñáyuu jeē candíje i Jesús, cone cáhnu ni yā nuū cuéchi i, áchí Pedro.

*Jeē ni quiví Espíritu Santo ini anuá ñayuu jeē násūú hebreo cácuu*

<sup>44</sup> Te níni cáhán gā Pedro tāca jnúhun yáha te ni quiví-ni Espíritu Santo ini anuá tāca ñáyuu cájini nahín jnūhun ya jeē cahán de. <sup>45</sup> Te téé hebreo jeē ni jínūcoo jíin Pedro jeē suni cácandíje de Jesús, nahán ní canaa ni de ní cajito de jeē suni ni quiví Espíritu Santo ini anuá ñayuu jeē násūú hebreo cácuu. <sup>46</sup> Chi ni cajini sōho de cacahán ñayuu un

sín yuhu, te cácahān i jeē yōhyo cújéhnū Yaā Dios.

<sup>47</sup> Yūcuán na te ni cahān Pedro:

¿Ndé ñn casi jeē ma cuándute ñayuu yáha? Chi ni quiví Espíritu Santo ini anuá maá i, nájnūhun ni quiví ya ini anuá maá yó, áchí de.

<sup>48</sup> Te ni cahān de jíin i jeē na cuándute i siquī jeē ní cacandíje i Jesucristo. Yūcuán na te ni cacahān ndahú i jíin Pedro jeē na quéndō de jecu quiví jíin i.

*Jeē ní nacuāha Pedro cuenta nuū ñáyuu cacandíje ini ñuu Jerusalén*

## 11

<sup>1</sup> Te tēe apóstol jíin táca hermano cáyucú Judea, ni canihīn de jnūhun jeē súni ñayuu sín nación ni cacandíje i jnūhun Yaā Dios. <sup>2</sup> Te cuanuhun Pedro ñuu Jerusalén. Te sava tēe hebreo jeē cacandíje de ya ni cacahān de nuū Pedro:

<sup>3</sup> ¿Najehē ni condee ní vehe ñayuu jeē násūu ñáyuu nación yō cúu? Te ni yeji ni jíin i, áchí.

<sup>4</sup> Yūcuán na te ni nacani cájí Pedro jnūhun nuū téé ún ndihī ndese ni cuu siquī téé sín nación:

<sup>5</sup> Néne ná ñuu Jope. Te níní jícán tahu na, te ni steén ndijin yā nuū ná, te ni jito ná nájnūhun ñn sahma manta jité cáhnu jeē nuhní jnáhan ndicúún punta, te nde ichi ándiví ní cuun ni quiji nuū ná.

<sup>6</sup> Te ni jito vāha ná, te ni jini na jéē chíji un cáñūhun quitī cúún ndaha jíin quitī xéén jíin cóō jíin quitī cándava. <sup>7</sup> Te ni jini sōho ná ñn jnūhun ni cahān jíin ná: Pedro, ndocuññī te cahni rō tācá quitī jiñā, te caji rō tī, áchí jíni ná. <sup>8</sup> Te ni cahān ná: Ma cáji na, Tátā, chi tu yéji cuiñī na táca quitī jeē cahán ley

ni jéē tu cáhīyo ndoo ti nuū ní, áchí ná. <sup>9</sup> Yūcuán na te jnūhun jeē véji nde andiví ní cahān tucu jíin ná: Ní sándoo máá rí tī, te ma cahán gā rō jeē tu cáhīyo ndoo ti, áchí jíni ná. <sup>10</sup> Te unī jínu ni cahān súcuan. Yūcuán na te ni ndaa sahma un cuánuhun andiví. <sup>11</sup> Te hora un ní jinūcoo unī tēe vehe nuū ni cóndee ná un, cánanducú de sãñá, te ñn jnáhan ñuu de Cesarea ni tají de vējicoo de. <sup>12</sup> Te máá Espíritu ni cahān yā jíin ná jeē ma cáni ni na jéē tú vāha quihīn na jíin de. Te suni iñū hermano yáha ní jengoo jíin ná, te ni quīvicoo ná ini vehe tēe nání Cornelio. <sup>13</sup> Te tēe un ní nacani de jnūhun nuū na jíjnáhan ná jéē ní jito de ñn ndajéhé Yaā Dios, índichi yā ini vehe de, te ni cahān yā jíin de: Tají ró jecu tēe na quíngoo de ñuu Jope, quicana de Simón jeē suni nání de Pedro, na quíji de. <sup>14</sup> Te tēe ún cachi de nuū rō ndese jnama Yaā Dios rohó jíin ndihi ñayuu cáyūcú vehe ró, áchí yá. Achí Cornelio jíin ná. <sup>15</sup> Te nuū ní quejéé ná cahán na, te ni quīvi-ni Espíritu Santo ini anuá i jíjnáhan i, nájñūhun ni quīvi ya ini anuá maá yó xīhna gā. <sup>16</sup> Yūcuán na te ni nucūhun ni na jnúhun ni cahān maá Jítoho yō: Jendaá jeē maá ndute-ni ni scuándute Juan ñayuu. Te rohó jíjnáhan ró chi nájñūhun cuandute ró jíin Espíritu Santo, cúu jeē cóndee yā ini anuá rō, achí yá. <sup>17</sup> Te suni ni jēhe Yaā Dios Espíritu yā nuū maá i nájñūhun ni jēhe ya nuū maá yó jeē cácandíje yó Jítoho yō Jesucristo. Núu súcuan ¿te ndé ñn cúu ná jéē cási ná jniñu jeē sáha Yaā Dios? áchí Pedro.

<sup>18</sup> Súcuan ni cajini sōho de jnūhun yáha, te tuá ni cácahān de nuū Pedro, chi sa suhva ni cacahān de jeē yóhoyo cújéhnū Yaā Dios. Te ni cacahān de:

Suni ni jēhe Yaā Dios jnūhun jeē na nácani ni

ñayuu tāca gá nación jeē stóo i cuēchi i návāha cotecu i n̄í cáni núu súcuan, áchí de.

*Ñayuu cácandíje ini ñuu Antioquía*

<sup>19</sup> Te quiv̄í ní cajehni de Esteban ni quejéé de cájito xeēn de ñayuu cácandíje, te jeē yúcuan ní cajitē núu ñayuu un táca ñuu cuangoos i, te ni jinūcoo i Fenicia jiín Chipre jiín ñuu Antioquía. Te ni canacani i jnūhun vāha ya nuū máni jnāhan hebreo i jeē cáyūcu yúcuan, te tu ní canacani i jnūhun ya nuū ínga ñayuu. <sup>20</sup> Te jecu tēe cácandíje jeē cáyūcu Chipre jiín ñuu Cirene ni jinūcoo de ñuu Antioquía, te suni nuū ñáyuu tācá nación jeē tu cájini i jnūhun ya ni canacani de jnūhun máa Jítóho yō Jesús jeē jnáma ya i. <sup>21</sup> Te máa Jítóho yō ni chindéé ñáhán yá de, te cuehē ñayuu ni castóo i jniñu jeē tu íyó ndāā te ni cacandíje i máa Jítóho yō.

<sup>22</sup> Te ñayuu cácandíje ini ñuu Jerusalén ni cajini jnūhun i, te ni catajái i Bernabé cuahān de nde ñuu Antioquía. <sup>23</sup> Te nuū ni jínū Bernabé yūcuán, te ni jini de jeē yóhyo vāha ni sáha Yaā Dios jiín i, te ni cusī ndasí ni de. Te ni stihví ni de tāca ñáyuu un jéé jiín ini jiín ánuá i na cóndihv̄í ni i squícu vāha i nuū máa Jítóho yō, te ma náyūhú i. <sup>24</sup> Chi tēe vāha cúu Bernabé, te ni cunuú Espíritu Santo jiín de, te cándíje n̄ihin de. Te ni cacandíje cuehē ñayuu nuū máa Jítóho yō ni sáha de.

<sup>25</sup> Yūcuán na te cuahān de nde ñuu Tarso cuananducú de Saulo. Te ni nanih̄in jnāhan de jiín Saulo, te ndéca de tēe un ní ndee de ñuu Antioquía. <sup>26</sup> Te n̄í ñn cuiyā ni candutútú de jiín ñáyuu cácandíje yūcuán, te ni castéén de jnūhun ya nuū cuehē ñayuu. Te ñuu Antioquía cúu nuū xíhna ñúhún gá

ni caconaní ñayuu cristiano siquĩ jeē ní cacandíje i Cristo.

<sup>27</sup> Te suni tiempo un ní quendacoo tēe cánacani jnūhun Yaā Dios ñuu Jerusalén cuangoo de nde ñuu Antioquía. <sup>28</sup> Te ñn jnáhan de jeē naní Agabo ni ndocuññi nuū hermano cácanđíje. Te ni steén Espíritu Santo nuū de, te ni castūhún de jeē cóo ñn jnamā xeēn ní cáhnu. Te ni cuu jnamā ún ñn parte tiempo jeē ní ndacu Claudio jniñu jeē ní cuu de rey. <sup>29</sup> Yūcuán na te ni candajnūhun tēe cácanđíje ñuu Antioquía jeē cuáha ñn ñn de nasaa canda de cuáha de te tají de quihñ cotecu hermano cáyūcú Judea. <sup>30</sup> Te súcuan ni casáha de. Te ni catajé de Bernabé jñn Saulo ni cajendēca de nuū tēe jēhnu cándiso jniñu nuū ñayuu cácanđíje cáyūcú Judea.

*Jeē ní jehni Herodes Jacobo, te ni chune de Pedro vecāa*

## 12

<sup>1</sup> Te suu tiempo un ní quejéé rey Herodes jito xeēn de sava ñayuu cácanđíje. <sup>2</sup> Te ni ndacu de jniñu jeē jñn espada na cáhni i Jacobo ñani Juan. <sup>3</sup> Te ni jini de jeē ní cacusñi ni tēe hebreo jeē ni sáha de súcuan, te jeē yúcuan suni ni jññ de Pedro. Te máá quívñ un ní cuu vico jeē yéji ñayuu pan jeē tu yññ levadura. <sup>4</sup> Te nuū ní jññ de Pedro, te ni chune de vecāa, te ni jeni de cuñn grupo soldado jeē cóndito Pedro, cuñn cuñn soldado cúu jeē ñn ñn grupo. Chi cúní Herodes jeē na yáha vico un jéē cúu vico pascua te quenehen de Pedro vecāa un stéén de nuū ñayuu cuehē. <sup>5</sup> Te súcuan íne Pedro vecāa, te cándito soldado un de. Te ñayuu cácanđíje chi ñññ



ni cajicān tahu i jehē Pedro nuū Yaā Dios jeē na cácu de.

*Jeē ní quenehen Yaā Dios Pedro vecāa*

<sup>6</sup> Te jéni ni Herodes jeē na cúndijin inga quivī te quenehen de Pedro vecāa, te stéén de nuū ñáyuu un núú. Te núhní Pedro jíin úū cadena, cátu de quíxí de mēhñu úū soldado jecuáá ún, te suni cáhīn ga soldado cándito yéhyí vécāa ún. <sup>7</sup> Te suu jecuáá ún te sanaa-ni te ni jinū ñn ndajéhé maá Jítóho yō, te ni ndindéé ini vecāa. Te ni squñhi ya Pedro, te ni natahū ni de. Te ni cahān yā:

Yachī ndocuññī rō, achí yá.

Te cadena nuhní ndaha de un ní canandajī-ni.

<sup>8</sup> Te ni cahān ndajéhé yā jíin de:

Nacuhni nīhin chíji rō, te nuquñhi rō ndíjēn rō, achí yá.

Te súcuan ni sáha de. Te ni cahān tucu ndajéhé yā jíin de:

Condii ticāchi rō, te condiquīn rō ruhū na quíhín yō, achí yá.

<sup>9</sup> Te ni quenda de ndíquín de ya cuahān de jíin yá, te jéni ni de jeē násūu jéndaá cúu jeē sáha ndajéhé yā jíin de, chí jéni ni de jeē ñn jeē ni stéén yā jító ndijin de cúu. <sup>10</sup> Te ni yāha ya jíin de uū nuū cándito soldado. Te ni jinū yā jíin de yéhyí cáa nuū quénda de caca de calle, te yéhyí un ní nune iī-ni máá. Te ni quenda ya jíin de, te ni yāha de ñn calle cuahān de. Yūcuán na te ni cujiyo-ni ndajéhé yā nuū de cuahān yā. <sup>11</sup> Te ni nducájí ni Pedro te ni cahān maá ní cahān ñn de:

Vijna te ni jini ndaā rī jeē ní tají máá Jítóho rī ndajéhé yā ni quiji, te ni jnama ya ruhū nuū

Herodes jiín núū tāca ñáyuu hebreo jeē cáconi i sáha xeēn i jíin rí nuú, áchí de.

<sup>12</sup> Te nuū ní jini de jeē ni cácu ndije de, te ni quihin de ichi cuahān de vehe María naná Juan jeē suni nání de Marcos. Te yūcuan cáhīn tūtú cuéhē ñayuu cájicān tahu i jehē Pedro. <sup>13</sup> Te cáhān Pedro ni jinū de yéhyí fuera, te ñin sūchi sñhí nání Rode cuahān i jeē cúni i núu ndé ñin cúu jeē cahán. <sup>14</sup> Te ni nacuni i tachī Pedro, te jeē ní cusñ ni i te tu ní núne i yéhyí un, chi ni nandió cóo i te jínu i ni ndīvī i ini cuarto. Te ni castūhún i jeē ní quee Pedro índichi de yéhyí fuera. <sup>15</sup> Te ni cacahān jíin i:

Jeē cahán neé ró, achí.

Te máa i ñihin cáhān i jeē maá de cúu. Yūcuán na te ni cacahān:

Ndajéhé yā jeē ndíto Pedro cúu núu sūcuan, achí.

<sup>16</sup> Te víhyá gā cahán Pedro. Yūcuán na te ni canune i yéhyí, te ni canacuni i nuū de, te nahán ní canaa ni i cájito i. <sup>17</sup> Te máa de ni sáha de ndaha de jeē ma cúvaā gā i, te ni castūhún de ndese ni quenehen máa Jítóho yō de vecāa. Te ni cahān de:

Castūhun núū Jacobo jiín núū tāca gá hermano jeē ní quenehen ya ruhū vecāa, achí de.

Te ni quenda de cuahān de ñnga lugar.

<sup>18</sup> Te nuū ní cundijin, te ni cacuvaā teyí soldado jeē tuá Pedro. <sup>19</sup> Te ni ndacu Herodes jniñu jeē na nánducú váha i Pedro. Te tu ní cánanihīn i de, te nuū ní cuu ni stichí de soldado jijnáhan, te ni ndacu de jniñu jeē na cúu. Yūcuán na te ni quenda Herodes Judea cuahān de ñuu Cesarea, te ni condee de yūcuán.

*Jeē ni jíhī Herodes*

<sup>20</sup> Te yōhyo ni quitī ni rey Herodes nuū ñáyuu ñuu Tiro jíin ñuu Sidón. Te ñayuu un ní candajñuhún i jeē inuú-ni quivícoo ndihi i nuū rey un. Te ni casáha i amigo i jíin Blasto, tēe cújéhnú jéjníñu nuū rey un. Te ni cacahān ndahú i jíin de jeē na cáhán ndahú de jíin rey un jéē na ndéē ni de jíin i. Chi nde ñuu maá rey un cájeen i jeē cáyeji i. <sup>21</sup> Te ni jeni Herodes ñn quivī. Te ni nucūhun de sahma yíñúhún de, te ni cucōo de mesa nuū ndácu de jniñu, te ni cahān de ñn jñūhun jehū ni cajini sōho i. <sup>22</sup> Te ñayuu un ní caquejéé i cácahān jee i jñūhun yíñúhún jíin de:

Nasūu tēe-ni cúu ní, chi ñn yaā cúu ní, áchí i jíjnáhan i.

<sup>23</sup> Te máá hora un ní sáha-ni ñn ndajéhé maá Jítóho yō jeē ní jñi ñn cuehyī xeēn rey Herodes, te ni cayeji tındācú de, te ni jihī de, chi ni sandúxí-ni de máá de te tu ní cáhán de jeē Yaā Dios cúu jeē kujéhnú.

<sup>24</sup> Te ni jitē gā jñūhun máá Jítóho yō, te cuehē ndasí ñáyuu ni cacandíje i tācá-ni lugar.

<sup>25</sup> Te ni jīnu jniñu jeē ní quindecá Bernabé jíin Saulo jeē cótecu ñayuu Judea. Te ni quendacoo de Jerusalén cuanungoo de Antioquía, te cándēca de Juan jeē suni nání de Marcos cuahān jíin de.

*Jeē ní caquejéé Bernabé jíin Saulo caca cuu de nacani de jñūhun ya*

## 13

<sup>1</sup> Te mēhñu grupo ñayuu cácaandíje ini ñuu Antioquía ni cahīyo tēe cástéén jíin tēe cánacani jñūhun Yaā Dios, te cánani de Bernabé, Simón jeē suni nání

de Negro, Lucio ñuu Cirene, Saulo, jíin Manaén tēe ni jehnu jíin inga Herodes jeē ní cuu gobernador Galilea. <sup>2</sup> Te ñn quivī jeē cáhīyo ndite ni tēe yáha cáchiñúhún de nuū maá Jítóho yō, te ni cahān maá Espíritu Santo jíin de:

Cúní rī jeē sasñn ró Bernabé jíin Saulo na quíngoo de jniñu jeē ní jeni ri de, áchí yá.

<sup>3</sup> Yūcuán na te ni cajicān tahú ndite ni de, te ni casoó de ndaha de xinī Bernabé jíin Saulo, te súcuan ni catají de ndindúú tēe ún cuanacani de jnūhun nuū tāca ñáyuu.

### *Jeē ní canacani Bernabé jíin Saulo jnūhun ya nde Chipre*

<sup>4</sup> Te ni sáha Espíritu Santo jeē íchi ñūū Seleucia cuangoo de. Te yūcuan ní quivīcoo de ñn barco cuangoo de nde Chipre, ñuhun jeē íne sñn nuū ndúte. <sup>5</sup> Te ni jinūcoo de ñuu Salamina nuū cájecuññi barco, te ni canacani de jnūhun Yaā Dios iní tācá vehe ñi sinagoga jnáhan hebreo de. Te suni cuahān Juan chindéé ñáhán jíin de. <sup>6</sup> Te ni cajica nuu de ní-ni Chipre nde ni jinūcoo de ñuu Pafos jeē suni íne nuū Chipre. Te yūcuan ní cajini de nuū ñn tēe hebreo nání Barjesús. Te tēe tásí cúu de, te cáhán stahú de jeē ñn tēe nácani jnūhun Yaā Dios cúu de. <sup>7</sup> Te tēe tásí un jéjníñu de nuū gobernador Sergio Paulo, te tēe ndíchí cúu gobernador ún. Te ni cana de Bernabé jíin Saulo jeē cúní nahín de jnūhun Yaā Dios. <sup>8</sup> Te tēe tásí un suni nání de Elimas. Te ndúcú ndéyí de casi de jeē ma cándíje gobernador ún. <sup>9</sup> Te Saulo jeē suni nání de Pablo, ni cunuú Espíritu Santo jíin de, te ni ndacoto vāha de nuū tēe tásí un. <sup>10</sup> Te ni cahān de:

Tēe sáha jniñu néé stáhú ñáhán cúu ró, chi sēhe jexeén cúu ró te jési rō nuū tācá jniñu ndaā. Te tu jécuiñī rō jeē sáca núu ró síquī jnúhun ndaā maá Jítóho yō návāha ma candíje ñayuu nuū yā. <sup>11</sup> Te maá Jítóho yō stóho ya rohó vijna, te cucuáá ró jeē ma cóto ga rō niāndii jecu quivī, achí Pablo.

Te ni cunee-ni nuū tée tásí un, te quéndāha quéhiyú de cuahān de ndúcú de ndé vé jnā ndaha de stéén ichi nuū de quinuhun de. <sup>12</sup> Yūcuán na te ni jini gobernador jeē súcuan ni cuu, te ni candíje de jnúhun maá Jítóho yō, te náā ni de jíni sōho de jnúhun ya.

*Jeē ní coyūcu Pablo jíin Bernabé Antioquía ndañúu Pisidia*

<sup>13</sup> Yūcuán na te ni quendacoo Pablo jíin Bernabé jíin Juan ñuu Pafos, te ni quivīcoo de barco te cuangoo de ñuu Perge ndañúu Panfilia. Te yūcuan ní cusíin Juan, te cuanuhun de ñuu Jerusalén. <sup>14</sup> Te ni quendacoo Pablo jíin Bernabé ñuu Perge cuangoo de, te ni jinūcoo de ñuu Antioquía ndañúu Pisidia. Te quivī ndétātu ní quivīcoo de ini vehe iī sinagoga, te ni cacucōo de. <sup>15</sup> Te ni cahu tutu ley yā jíin tutu ní catee tēe ni canacani jnúhun ya nde jenahán. Yūcuán na te tēe cácujuhnu ini vehe iī sinagoga, vii-ni ni catají de tēe cahān jíin Pablo jíin Bernabé:

Amigo, núu íyó jnúhun cahān ni jéē stihví ni ni ñayuu yáha, te cahān ní na cúni nahín i núu súcuan, achí de.

<sup>16</sup> Yūcuán na te ni ndocuiñī Pablo te ni sáha de seña jíin ndaha de jeē nahín-ni coo ñayuu ún, te ni cahān de:

Níhín jnáhan ñuu yō Israel jíin níhín tēe jeē suni cáchiñúhún ní Yaā Dios, cuni nahín ní jijnáhan ní.

17 Máá Yáa Dios yohó ñáyuu Israel, ni nacāji ya jíi yō jijnáhan de. Te níni jéé cáyūcu tátú de ñuu Egipto, te ni sáha ya jeē ní nducuehē de. Yūcuán na te jíin poder maá yá ni quenehen ya de nación Egipto. 18 Te uū xico cuiyā ni cajica de nuū ñúhun téhé, te ni jendeyí ni yā jíin de jeē ní castíví de. 19 Te ni snāa yā uxā nación Canaán, te ni jēhe ya ñuhun un núū tāca jíi yō cúu tahū de. 20 Yūcuán na te ni jeni ya tāca tée ni candacu jniñu nuū de nájñuhun cuūn ciento uū xico uxí cuiyā, nde quiví ní cotecu Samuel, tēe ni nacani jñuhun ya. 21 Yūcuán na te máá ñáyuu un ní cajicān i ñn rey, te ni jeni Yaā Dios Saúl ni ndacu de jniñu nuū i uū xico cuiyā. Te yucūn Benjamín sēhe Cis ni cuu Saúl. 22 Te ni quenehen ya jniñu Saúl, te ni jeni ya David ni cuu de rey nuū i. Te ni cahān cají yá jñuhun de: Cúsí ni rī jíin David sēhe Isaí, chí sáha de tāca jéé cuní rī, achí yá.

23 Te cáhán gā Pablo:

Te sēhe yucūn David ni cacu Jesús, Yaā ní jeni Yaā Dios jeē jnáma ya yohó ñáyuu Israel, chí súcuan ni jejnūhun ya. 24 Te nde ná tu quejéé Jesús nacani ya jñuhun nuū ñáyuu, te ni nacani Juan jñuhun nuū tāca jnáhan ñuu yō Israel jeē na nácani ni i jeē stóo i cuēchi i, te cuandute i. 25 Te nuū cuácuyajni jeē cúu Juan, te ni cahān de: Cándētu ró jéé quíji Cristo, te jéni ni rō jeē ruhū cúu, te nasūu rí cúu. Chí quíji ya, te cújéhnu ndasí yá jeē ni ndijēn yā tu cújéhnu ri tava rī, achí de.

26 'Amigo jijnáhan ní, tāca níhín jéé cácuu yó séhe yucūn Abraham jíin tāca níhín jéé suni cándiso İyo ní núū Yaā Dios, chí cuní Yaā Dios jeē na cuní yō jñuhun yáha jeē cáhán ndese jnáma ya yohó. 27 Chí

tāca ñāyuu ñuu Jerusalén jín tāca tée cácujuhnu nuū i, tu ní cájecūhun ni i jeē Jesús cúu Cristo, Yaā ní jeni Yaā Dios jeē jnáma ya yohó. Te ndijnahan quivī ndétātu ní cajini sōho i jnūhun ni cacahu jeē ní catee tēe ni canacani jnūhun Yaā Dios nde jenahán. Te vēsú súcuan te tu ní cájecūhun ni i, te ni candonda i ni cacahān i jeē na cúu yā. Te súcuan ni casquícu i siquī tāca jnūhun jeē ní cacahān tēe ni canacani jnūhun ya nde jenahán. <sup>28</sup> Vēsú tu ní cánihīn i ni ñn cuēchi siquī yā jeē cúu yā, te ni cacahān nīhin i jín Pilato jeē na cúu yā. <sup>29</sup> Te ná ni jīnu ni squícu siquī yā tāca jnūhun cáhán nuū tútu ī, te ni cashúu de ya jicā cruz, te ni cachindūji de ya ñn yaū ní jete jicā cáva. <sup>30</sup> Te ni sáha Yaā Dios jeē ní natecu yā. <sup>31</sup> Te ñayuu Galilea jeē ni jéngoo jín yá nde Jerusalén nde na técu yā, nuū maá i ni steén ndijin yā maá yá cuehē quivī ná ni natecu yā, te ñayuu un cácuu jeē cánacani cájí jnūhun ya nuū tāca gá jnáhan yó hebreo vijna.

<sup>32</sup> Te maá ná jijnáhan ná cánacani ná jnūhun vāha yáha núu ni jijnáhan ní jéē súcuan ni jejnūhun ya nuū tāca jíí yō. <sup>33</sup> Te jnūhun yáha ní squícu Yaā Dios nuū maá yó jeē cácuu yó séhe yucūn de, chi ni nastécu yā Jesús. Chi suhva cáhán salmo uū jeē cahán yā jín Séhe ya Jesús: Máá ró cúu Séhe ri, te vijna ni sajéhu ri rohó jéē cúu ri Tatá rō, achí yá. <sup>34</sup> Te ni nastécu yā Séhe ya Jesús návāha ma tehyú cuítī yā, chi suhva cáhán tutu ī jeē ni cáhān Yaā Dios nde jenahán: Te nihīn maá ró tāca jéē váha ni jejnūhun ri nuū David, achí. <sup>35</sup> Te suni súcuan cáhán ñnga salmo jeē ní tee David jnūhun jeē cahán Jesús jín Yáa Dios: Ma cuáha ní jnūhun tehyū ná, chi

jéjníñu ná núū ní te manī ni jíín ná, achí. <sup>36</sup> Te David chí jíín yō jeē ní jejníñu de nuū ñáyuu ní cotecu de jíín, nájnūhun ní cuni Yaā Dios. Te ni jihī de, te ni quindūji de nájnūhun ní quindūji tāca jíí yō, te ni tehyū de. <sup>37</sup> Te Jesús, Yaā ní nastécu Yaā Dios, chí tu ní téhyú cuiti yā. <sup>38</sup> Jeē yúcuan jííní ñúhún jecūhun ní ní, amigo, jeē Jesús cúu Yaā cóne cáhnu ní nuū tāca cuéchi yó. <sup>39</sup> Chí ni canducú ní ndahva ní cuéchi ní jéē squícu ní ley jeē ní jéhe ya nuū Moisés, te tu ní cúu ndahvā cuēchi ní súcuan. Te Jesús cúu Yaā ndáhva ndihí cuēchi ñayuu jeē cácandíje i tāca jéē ní sáha ya jehē i. <sup>40</sup> Núu súcuan te coto ní jíínáhan ní jéē ma ndóho ní tāca castigo jeē ní cacahān tēe ní canacani jnūhun Yaā Dios nde jenahán, chí suhva ní cahān Yaā Dios:

<sup>41</sup> Tāca róhó ñáyuu jeē casácatā, na cóto ró na castigo xeēn quiji siquī rō, te naa ní rō coto ró, te cuu rō. Chí tiempo maá ró te sáha ri jniñu xeēn jeē ma cándíje cuiti rō jeē súcuan sáha ri vēsú nacani ñayuu jnūhun un núū rō, achí yá.

Achí Pablo.

<sup>42</sup> Te ni quendacoo Pablo jíín táca jnáhan de vehe iī sinagoga jnáhan hebreo de. Te ñayuu sín nación ní cacahān ndahú i jíín de jeē inga quiṽi ndétátú nacani tucu de jnūhun yáha núū i. <sup>43</sup> Te ni jitē ñayuu un cuángoo i. Te cuehē ñayuu hebreo jíín ñáyuu sín nación jeē ní cacandíje sahān hebreo te cáchiñúhún i nuū Yaā Dios, cuangoo i jíín Pablo jíín Bernabé. Te ni cacahān níhin de jíín i jeē na cuiñi níhin i jíín jnúhun jeē maní Yaā Dios jíín i.

<sup>44</sup> Te quiṽi ndétátú inga semana te je yajni ndihí ñayuu ñuu un ní candutútú i jeē cúni nahín i jnūhun



Yaā Dios. <sup>45</sup> Te nuū ní cajini tēe hebreo jeē ní candutútú cuéhē ñayuu, te ni cacucuésún ni de, te ni cacahān de jeē násūu jnúhun vāha cúu jeē steén Pablo, te ni cacahān neé de nuū Pablo. <sup>46</sup> Yūcuán na te jéhnū-ni ni cacahān Pablo jíin Bernabé, áchí de:

Cánuú jéē xíhna gā nuū maá ní jeē cácuu ní jnáhan ñuu yō hebreo nacani ná jnúhun Yaā Dios, te tu ní cájetáhú ní. Núu súcuan te cuēchi máá ní cúu jeē ma nihín tahu ni cotecu ni ní cáni. Te vijna te quinacani ná jnúhun ya nuū ñáyuu tācá nación jeē tu cájini i jnúhun ya. <sup>47</sup> Chi suhva ni ndacu máá Jítóho yō jniñu nuū na jíjnáhan ná:

Ni jeni ri rohó jéē cúu ró nájnūhun luz jeē steén ini  
 anuá ñayuu tācá nación,  
 chi ní ñayūvi stéén rō jnúhun ri nuū ñáyuu jeē jnáma  
 ri i, áchí yá.

Achí de.

<sup>48</sup> Te ñayuu sín nación, nuū ní cajini sōho i jnúhun yáha te ni cacusiñ teyí ni i. Te ni cacahān i jeē yōhyo vāha jnúhun cúu jnúhun máá Jítóho yō, te tāca ñáyuu jeē ní nacāji Yaā Dios i jeē cótecu i ní cáni, ni cacandíje i. <sup>49</sup> Te ni jité jnúhun máá Jítóho yō cuahān ní región yūcuán. <sup>50</sup> Te ñuu Antioquía cáyūcú ñahan cácuu nuū te cáchiñúhún ña Yaā Dios. Te tēe hebreo ni cascáhán de ña, te suni ni cascáhán de tēe cácujeñu ñuu ún, te ni cajito xeēn i Pablo jíin Bernabé te nde ni cascúnu i de cuango de. <sup>51</sup> Te ni cascóyo de ticachā jehē de jeē steén de jeē iyó cuéchi i. Te ni jinūcoo de ñuu Iconio. <sup>52</sup> Te vēsú súcuan te ñayuu cácuandíje un ní cunuú Espiritu Santo jíin i, te cacusiñ teyí ni i.

*Jeē ní coyūcu Pablo jíin Bernabé ñuu Iconio*

## 14

<sup>1</sup> Te ñuu Iconio ni quivicoo Pablo jíin Bernabé ini vehe iī sinagoga jnáhan de hebreo. Te jíin jnúhun jeē ní canacani de te ni cacandíje cuehē jnáhan de hebreo, te suni súcuan cuehē ñayuu sñn nación ni cacandíje i. <sup>2</sup> Te jnáhan de hebreo jeē tu ní cácandíje, ni cascáhán de ñayuu sñn nación, te ni cajeni ni i jeē násūu ñáyuu váha cácuu ñayuu cácandíje. <sup>3</sup> Te ni caquendōo Pablo jíin Bernabé yūcuan cuehē gā quivī. Te jéhnū-ni ni canacani de jnúhun Jitoho yō, chi cácucahnu ni de ya jeē váha quihīn jniñu un sáha ya. Te máá yá chi ni steén yā jeē iyó ndáa jnúhun jeē yóhyo váha ni yā jíin i jeē cánacani de, chi ni jēhe ya jeē sáha de jniñu jéhnū jeē steén jeē cujéhnū ya. <sup>4</sup> Te ñayuu ñuu un ní cacusñn ni i jíin náhan i, sava i jíin tée hebreo jeē tu cácandíje de Jesús, te sava ga i jíin tée apóstol. <sup>5</sup> Te ñayuu hebreo jíin ñáyuu sñn nación jíin tée cácuu tohō ni casquíjnáhan jnúhun jeē sáha xeēn jíin Pablo jíin Bernabé, jíin jéē cuáha yuū xinī de núú. <sup>6</sup> Te ni cajini de jeē súcuan cácuu sáha, te ni cajinu de cuangoo de nde ñuu Listra jíin ñuu Derbe ndañúu Licaonia jíin táca ñuu yajni yūcuán. <sup>7</sup> Te yūcuan ní canacani de jnúhun jeē jnáma ya yohó.

*Jeē ní cajēhe i yuū xinī Pablo ini ñuu Listra*

<sup>8</sup> Te ñuu Listra néne ñn tēe jeē tu cúu caca, te tu jíca cuiti de chi nde quivī ní cacu de cácójó de. <sup>9</sup> Tēe un ní jini sōho de jnúhun jeē cahán Pablo, te ni jito váha Pablo nuū de, te ni jini de jeē candíje váha tēe un jéē ndúvāha de. <sup>10</sup> Te ni cahán jee Pablo jíin de:

Ndocuññī, condichi rō, achí de.

Te ni scándā tēe un máá de ni nucōndichi-ni de, te ni quejéé de caca de. <sup>11</sup> Te ni cajini ñayuu ún jniñu jéhnū jeē ni sáha Pablo, te ni cacahān jee i jín yuhu máá i jeē cúu yuhu Licaonia:

Ni cuun yaā ni quecoo nuū yō, te cájica nájnūhun cájica tēe, achí i.

<sup>12</sup> Te ni cacahān i jeē Bernabé cúu yaā Júpiter, te Pablo cúu yaā Mercurio chí Pablo cúu tēe nácani jnūhun. <sup>13</sup> Te yajni yuñúū un néne veñūhun yaā Júpiter. Te máá sūtū jejniñu ini veñūhun un ní quihin de stiquī jijnáhan tī te ni scutú de tī ita te vēji de nde nuū quívī i yuñúū, te máá de jín ñáyuu ñuu un cácuni de cahni de stiquī un sócō de nuū Bernabé jín Pablo nuú. <sup>14</sup> Te Bernabé jín Pablo, tēe cácuu apóstol, ni cajito de jeē súcuan cácuni ñayuu un sáha i, te ni candatá de sahma de jeē steén de jeē castívī ndasí i jeē casáha i súcuan. Te ni quenendava de ni quívīcoo de mēhñu ñáyuu cuehē ún, te ni cacana jee de:

<sup>15</sup> Tátā jijnáhan ní, ma sáha cuítī ni súcuan, chí sãñá suni tēe-ni cácuu ná nájnūhun máá ní jijnáhan ní. Te vējicoo ná nacani ná jnúhun vāha Yaā Dios nuū ní, chí cahān na jín ní jeē ma sáha ga ni táca jniñu yáha jéē tu ndé jéjniñu cuítī, chí sa suhva na chíñúhún ní maá Yáā Dios, Yaā técu, Yaā ni sáha andívī jín ñáyīvī jín ndute mar jín táca gá jeē iyó ní cáhnu. <sup>16</sup> Te nde jenahán ní jēhe ya jnūhun jeē na sáha táca ñáyuu modo cácuni máá i. <sup>17</sup> Te vésú súcuan te níni stéén yā ndese Yaā cúu ya, chí máni sáha ya jniñu vāha jín yó, chí scúun ya saū, te sáha ya jeē cúu vāha itu yō, te jēhe ya jeē jini ñúhún yó návāha caji yō te coo sñī ni yō, achí ndíndúú de.

18 Te vēsú súcuan ni cacahān de, te yōh̄yo uhū ni cajesi de nuū ñáyuu un nāvāha tú socō i stiquī un nuū de jeē chiñúhún i ndindúú de.

19 Yūcuán na te ni quecoo jecu tēe hebreo ñuu Antioquía jíin ñuu Iconio, te ni cascáhán de ñayuu cuehē ún, te ni cajēhe i yuū xinī Pablo. Te ni caquenehen i de yatā ñúú ún, chi ni cajeni ni i jeē jé ni jihī de. 20 Te tēe cácondíje ni cacondúú de Pablo, te ni ndonda Pablo, te ni ndīvi de ini ñuu. Te inga quivī ni quihin de ichi cuahān de jíin Bernabé nde ñuu Derbe.

21 Te ini ñuu un ní canacani de jnūhun jeē jnáma ya ñayuu, te ni cacandíje cuehē ñayuu ni casáha de. Te ni canandicó de cuanuhun de ñuu Listra jíin ñuu Iconio jíin ñuu Antioquía. 22 Te ni cahije ga ni ñayuu cácondíje yūcuan ní casáha de. Te ni castíhvī ní de i jeē na cuíñi nīhin i jíin jnúhun ya, chi ni cacahān de jeē niní quiji cuehē jnūndóho siquī yō te yūcuán na te jinū yō ñuu nuū ndácu Yaā Dios jniñu. 23 Te tācá ñuu ni cajeni de tēe jéhn̄u cándiso jníñu condito de ñayuu cácondíje. Te ni cahīyo ndite ni Pablo jíin Bernabé nuū yā, te ni cajicān tahú de, te ni cacahān de jíin máá Jítóho yō jeē na cóto ya ñayuu ún chi cácondíje i máá yá.

*Jeē cuánuhun tucu Pablo jíin Bernabé ñuu Antioquía ndañúú Siria*

24 Te ni cayāha de cuangoo de región Pisidia, te ni najinūcoo de región Panfilia. 25 Te ni canacani de jnūhun ya ini ñuu Perge región Panfilia, te sáá te cuangoo de ñuu Atalia. 26 Te yūcuan ní quivīcoo de barco, te ni najinūcoo de ñuu Antioquía. Te ñuu yūcuan cúu nuū ní cajicān tahú ñayuu nuū

Yaā Dios jehē de jeē na chíndéé ñáhán yá de jeē quíngoo de nacani de jnūhun. Te ni jīnu jniñu, te ni najinūcoo de ñuu ún. <sup>27</sup> Te nuū ní najinūcoo de yūcuán, te ni casáha de junta jíin ñáyuu cácandíje, te ni canacani de jnūhun tācá ndese cuehē jeē váha ni sáha Yaā Dios jíin de, chi ni jēhe ya jnūhun jeē suni candíje ñayuu tācá nación jeē tu ní cájini i jnūhun ya. <sup>28</sup> Te ni caquendōo de yūcuan cuéhē quivī jíin ñáyuu cácandíje.

### *Siquī junta ñuu Jerusalén*

## 15

<sup>1</sup> Yūcuán na te jecu tēe Judea ni quijicoo de ñuu Antioquía, te ni castéén de nuū tācá hermano jeē núu tu sáha i circuncidar, nájnūhun cáhán ley jeē ni jēhe ya nuū Moisés, te tú na modo cācu i. <sup>2</sup> Te Pablo jíin Bernabé ni catejnáhan de jíin tēe ún, te tu ní cúndaā. Te jeē yūcuan ní candajnūhún de jeē quíngoo Pablo jíin Bernabé jíin jecu gā tēe cácandíje un ndé ñuu Jerusalén, te yūcuán ndajnūhún de siquī jnūhun yáha jíin tēe cácuu apóstol jíin tēe jéhnú cándīso jníñu nuū ñáyuu cácandíje yūcuán.

<sup>3</sup> Te ñayuu cácandíje un ní canachuhun íchí i de. Te ni cayáha de ichi Fenicia jíin Samaria, te cánacani de jnūhun jeē suni ñayuu tāca gá nación jeē tu ní cájini i jnūhun ya, ni castóo i jniñu jeē tu íyó ndáā te ni cacandíje i Yaā Dios. Te yōhyo ni cacusī ni tācá hermano jeē ní canihīn de jnūhun jeē súcuan ni cacandíje ñayuu ún.

<sup>4</sup> Te ni najinūcoo de ñuu Jerusalén, te ñayuu cácandíje yūcuan jíin tēe apóstol jíin tēe jéhnú cándīso

jniñu nuū ñáyuu un, ní cacusī ni de jeē ní natinūcoo jnáhan de ún. Te Pablo jiín Bernabé ni canacani de tāca jnúhun ndese cuehē jeē váha ni sáha ya siquī jniñu jeē ní canacani de jnúhun ya.  
<sup>5</sup> Te sava tēe grupo fariseo jeē cácanđije ni candocuñī te ni cacahān:

Ñayuu sīn nación jeē cácanđije i Jesús, jini ñúhún jēē sáha i circuncidar nájnūhun cásáha máá yó, te cánuú ndacu yó jniñu nuū i jeē na squícu i ley jeē ni jēhe ya nuū Moisés, áchí.

<sup>6</sup> Te tāca tēe apóstol jiín táca tēe jéhnu cándiso jniñu nuū ñáyuu cácanđije, ni candutútú de junta návāha ndajnūhún de te sándaā de siquī jnúhun yáha. <sup>7</sup> Te tācá de ni cacahān de ndese cájeni ni de. Yūcuán na te ni ndocuñī Pedro, te ni cahān de:

Hermano jijnáhan ní, je cájini vāha ni jēē je íyó tiempo jeē ní nacāji Yaā Dios sāña jēē quihín na núū ñáyuu sīn nación te nacani ná jnúhun nuū i jeē jnáma ya i, návāha candíje i Jesucristo. <sup>8</sup> Te Yaā Dios chi jini yā ndese cáa ánuá ndihí ñayuu, te ni steén yā jeē jetáhú yá i, chi suni ni jēhe ya Espíritu Santo nuū i jijnáhan i, nájnūhun ni jēhe ya nuū maá yó. <sup>9</sup> Te inuú-ni sáha ya jiín yó jiín máá i, chi siquī jeē suni ni cacandíje i jnúhun jeē jnáma ya i, te jeē yúcuán ní sándoo ya anuá i nuū tāca cuéchi i. <sup>10</sup> Te vijna ¿naun cáconi ní ndacu ní jniñu jeē na squícu i ley un? Chi tu nújnahan ni Yaā Dios jeē súcuán. Chi cáconi ní tee ní jniñu yí yáha siquī ñáyuu cácanđije ún, te ni tāca jí yō tu ní cácondeyí de squícu de, te ni máá yó. <sup>11</sup> Chi sa suhva cácanđije yó jēē jnáma ya yohó súcuán-ni siquī jeē yóhoyo vāha ni maá Jítoho yō Jesús jiín yó, te suni súcuán-ni jnáma ya maá i, nasūu siquī jeē squícu i ley un, áchí de.

12 Yūcuán na te tēe cuehē un ní cacuu nayúú de, te ni cajini nahín de jnūhun cácahān Bernabé jíin Pablo. Chi ni cacastūhún de jeē ni jéhe ya poder jeē ní casáha de tācá jniñu jéhu jeē steén jeē cujéhu ya, ni cajito ñayuu tācá nación jeē tu cájini i jnūhun ya. 13 Te nuū ní jínu ni cacahān Pablo jíin Bernabé, te ni cahān Jacobo:

Hermano jijnáhan ní, cuni sōho ní na cáhán na.

14 Ni nacani Simón Pedro jnūhun ndese ni quejéé nuú jniñu jeē jnáma Yaā Dios ñayuu tācá nación jeē tu cájini i jnūhun ya, chi suni mēhñu máá i nácāji ya ñayuu jeē ndúu i ñayuu maá yá. 15 Te quíjnáhan jnūhun ni cahān de yāha jíin jnūhun ni catee tēe ni canacani jnūhun Yaā Dios nde jenahán jeē yosó núu tútu i:

16 Achí Yáā Dios:

Nájnūhun ni cotúú vehe David cúu jeē tuá ndácu sēhe yucūn de jniñu,

nájnūhun ni ndacu máá de jniñu nde jenahán.

Te ñn quivī te ndee rī

te jeē nasáha ri vehe de cúu jeē sáha ri jeē nandacu Sēhe yucūn de jniñu.

17 Súcuan sáha ri návāha tāca gá ñayuu na nánducú i ruhū

nde jíin ñayuu tācá nación jeē tu cájini jnūhun ri, tācá i jeē cána ri i candíje i ruhū.

18 Súcuan cáhán maá Jítoho yō, te nde jenahán ní steén yā jnūhun yāha núu ñáyuu.

Achí tutu i.

19 Jeē yúcuan jéni ni na jéē ñáyuu tāca gá nación jeē ní castóo i jniñu jeē tu íyó ndáá te ni cacandíje i máá Yáā Dios, ma stáhān yō i jeē ndácu yó jniñu jeē squícu i ley Moisés. 20 Chi sa suhva na tēe yó

carta quihĩn nuū i jeē ma cáji i ndeyu jeē ni sócō nuū ídolo, te ma cáca jnéni i, te ma cáji i cūñu quiiti jeē jihí jeē tu jéti niñĩ tĩ, te ni ma cáji i niñĩ. <sup>21</sup> Jnūhun yáha-ni tee yó quihĩn nuū i nájnūhun je cástéén nde jenahán. Chi nde jenahán je íyó téé cástéén jnūhun ley jeē ni jéhe ya nuū Moisés, te ndijnahan quiivĩ ndétātu cácahu de ley un ini vehe iĩ sinagoga táca ñuu, áchí Jacobo.

<sup>22</sup> Yūcuán na te tēe apóstol, jín téé jéhnū cándiso jniñu, jín ndivii ñayuu cácandíje, ni cacundaā ni de jeē nácāji de tēe quingoo jín Pablo jín Bernabé nde ñuu Antioquía. Te tēe ni canacāji de un cácuu Silas jín Judas, te inga sihví de cúu Barsabás. Te cándiso jniñu de nuū táca hermano cácandíje. <sup>23</sup> Te ni cajendēca de carta jeē cahán suhva:

Máa ná cácuu tēe apóstol, jín táca téé jéhnū cándiso jniñu nuū ñáyuu cácandíje, jín táca gá hermano yō. Te cátee ná carta yáha cuájeē nuū ni jijnáhan ní, hermano, jeē cácuu ní ñáyuu sín nación jeē cáyūcu ní ñuu Antioquía jín Siria jín Cilicia. Cuandeyí ni ni jijnáhan ní. <sup>24</sup> Ni cajini jnūhun ná jéē ní quendacoo sava jnáhan ná yáha ní jengoo nuū ní, te jín jnúhun jeē ní cacahán de te ni casáha jeē ní canacani ndasí ni ní, te ni cacuxii ni ní, chi cándacu de jniñu jeē sáha ní circuncidar jín jéē squícu ní jniñu cáhán ley jenahán jéē ni jéhe ya nuū Moisés. Te nasūu sáña ní cátají téé un jéē jeé de nuū ní. <sup>25</sup> Jeē yúcuán ní cajeni ni ná, te inuú-ni ni cacundaā ni ná, te ni nacāji ná téé cuajēcoo nuū ni jín úu hermano yō jeē maní yō jín, cúu Bernabé jín Pablo. <sup>26</sup> Te ndíndúú de je ni catana de máa de nuū jnúndóho vēsú na cúu de jeē siquí jnūhun



Jitoho yō Jesucristo. <sup>27</sup> Núu súcuan te cátají ná Judas jíin Silas jeē nuū ní, te suni nájnūhun cáhán carta yáha suni súcuan castūhún de nuū ni jíjnáhan ní. <sup>28</sup> Chi máá Espíritu Santo ni steén yā ñn modo jeē ní cacundaā ni na jéē ma téé ná táca jniñu yí ley Moisés siquī ní, chi máá-ni jniñu yáha jéē cánuú gá: <sup>29</sup> Ma cáji ni táca jéē ní casocō nuū ídolo, ni ma cáji ni níñī ni quitī jeē jihí jeē tu jétī níñī tī, te ma cáca jnéni ní. Te vāha squícu ní núu tuá sáha ní táca jéē yáha. Súcuan na cóo te sándeýí ni ní, áchí carta.

<sup>30</sup> Yūcuán na te tēe quingoo un cuángoo de nde ñuu Antioquía. Te ni cacana de xinī ñáyuu cácandíje ni candutútú de junta, te ni cajēhe de carta un núu i. <sup>31</sup> Te ni cacahu i, te ni candusī ni i jeē ni níhīn i jnūhun ndeyí ni nuū carta ún. <sup>32</sup> Te suni tēe cácanani jnūhun Yaā Dios cácuu Judas jíin Silas, te jíin cuéhē jnūhun ni cacahān de te ni candundeyí ni tācá hermano un, te ni cahije ga ni i jíin jnúhun ya. <sup>33</sup> Te ni coyūcú de yūcuán jecu quivī. Yūcuán na te hermano yúcuan ní canacuatáhú i nuū de jeē quinuhun de nuū téé jeē ní catají de. <sup>34</sup> Te Silas ni nujnahan ni de ni quendōo de yūcuán. <sup>35</sup> Te suni ni caquendōo Pablo jíin Bernabé ñuu Antioquía, te máá de jíin sava ga tēe ni castéén de te ni canacani de jnūhun vāha máá Jítoho yō.

*Jeē quihín Pablo ñga jínu nacani de jnūhun ya*

<sup>36</sup> Te ni cuu ga quivī, te ni cahān Pablo jíin Bernabé:

Vijna te na quícondēhe yó tācá hermano yō ndijnahan ñuu nuū ní nacani yó jnúhun máá Jítoho yō, na cóndēhe yó ndese cáhiyo i, áchí de.

<sup>37</sup> Te Juan jeē suni nání de Marcos, cúní Bernabé jeē quihín tēe un jíin de. <sup>38</sup> Te tu ní cúní Pablo jeē quihín tēe un jíin de, chi nde Panflia ni cusín Marcos nuū Pablo jíin Bernabé, chi tuá ni chindéé ñáhán de ndindúú tēe un síquī jniñu ya nde saá. <sup>39</sup> Te nahán ní candajnūhun Pablo jíin Bernabé, te tu ní cácula ni de síquī Marcos, te ni cacusín de. Te Bernabé ni jeca de Marcos, te ni quivicoo de barco cuango de nde Chipre, ñuhun jeē íne sín nuū ndúte. <sup>40</sup> Te Pablo ni nacāji de Silas quihín jíin de. Te tācá hermano cáculáje ni cajicān tahu de nuū maá Jítoho yō jeē síquī jeē váha ni yā te na chindéé ñáhán yá Pablo. Te cuahān Silas jíin Pablo. <sup>41</sup> Te ni cajica cuu de ní Siria jíin Cilicia. Te tāca grupo ñayuu cáculáje ni cahije ga ni i jíin jnūhun ya ni casáha de.

### *Jeē cuahán Timoteo jíin Pablo jíin Silas*

## 16

<sup>1</sup> Yūcuán na te sáa te ni jinū Pablo jíin Silas ñuu Derbe jíin ñuu Listra. Te yūcuán néne ñin tēe suchí cáculáje, nání i Timoteo. Sēhe yí ñin ñahan hebreá cúu i, te ñahan cáculáje cúu ña. Te tátá i chi tēe griego cúu de. <sup>2</sup> Te tācá hermano ñuu Listra jíin ñuu Iconio cáculáje de Timoteo. <sup>3</sup> Te cúní Pablo condeca de Timoteo quihín de jíin i. Te ni cahān Pablo jeē quihín i cuu i circuncidar, chi tu cúní Pablo jeē cahān ñayuu hebreo jeē tu ní squícu Timoteo costumbre un, chi ndihí ñayuu cáculáje i jeē tēe griego cúu tátá i. <sup>4</sup> Te tācá ñuu nuū cuango de te ni cacastūhún de nuū ñayuu cáculáje jeē na squícu i máá jniñu jeē ní casácula tēe apóstol jíin táca tēe

jéhnū cáyūcú ñuu Jerusalén jeē cándiso jníñu nuū ñáyuu cácandíje. <sup>5</sup> Te ñáyuu cácandíje ni cahije ga ni i. Te ndijnahan quivī ni cacandíje cuehē gā ñayuu.

### *Jeē ní jito ndijin Pablo ñn tēe ñuu Macedonia*

<sup>6</sup> Te tu ní jéhe Espíritu Santo yā jnūhun jeē nácani de jnūhun ya ní Asia. Jeē yúcuan ní cayāha de ichi Frigia jíin Galacia cuango de. <sup>7</sup> Te ni jinūcoo de nuū quijnáhan Misia jíin Bitinia. Te cácani de quingoo de Bitinia, te máá Espíritu Jesús tu ní jéhe ya jnūhun quingoo de. <sup>8</sup> Te ni cayāha de ñn lado Misia cuango de ñuu Troas jeē íne yajni yumar. <sup>9</sup> Te ñn jecuāa te nájnūhun ñn jēni ni jito ndijin Pablo, te ni jito de jeē índichi ñn tēe ñuu Macedonia nuū de cáhán ndahú jíin de: Nehen ní ñuu ná Macedonia te chindéé ñáhán ní sãña jíjnáhan ná, áchí. <sup>10</sup> Te súcuan ni jito ndijin de. Yūcuán na te sãña, Lucas, ni quijnáhan ná jíin de. Te ni casátūhva ná jíin de jíjnáhan de jeē quingoo ná Macedonia, chi ni cajini cají ná jeē maá Yáa Dios tájí yá sãña jíjnáhan ná jēe castūhun ná nuū ñáyuu yúcuan jnūhun jnama ya i.

### *Jeē ní coyūcu Pablo jíin Silas ñuu Filipos*

<sup>11</sup> Te jíin barco ni quendacoo ná ñuu Troas, te cuango ndaā-ni ná ndé Samotracia, ñuhun jeē íne sñn nuū ndúte. Te ñnga quivī ni jinūcoo ná ñuu Neápolis. <sup>12</sup> Te yúcuan ní quendacoo ná, te ni jinūcoo ná ñuu Filipos jeē cúu ñuu kujéhnū ga íne Macedonia, chi máá ñáyuu ñuu Roma ni casáha i ñuu i ún. Te ni coyūcu ná ñuu Filipos jecu quivī. <sup>13</sup> Te ñn quivī ndétātu ní quendacoo ná ñuu ún, te ni jengoo ná ñn yuyúte, chi yúcuan cúu ñn lugar nuū cájicān tahu ñayuu. Te ni cacucōo ná, te ni canacani

ná jnúhun ya nuū tācá ñahan ní canataca yūcuán.  
 14 Te ñn ña nání Lidia jeē véji ña ñuu Tiatira, xíco ña sahma ndihí jēē yáhu ga ndeé. Te máá ña níní chíñúhún ña Yaā Dios. Te ni jini sōho ña jnúhun cánacani ná, te máá Jítóho yō Jesús ni sáha ya jeē ní candíje ña jnúhun jnáma ya ña jeē ni cáhān Pablo.  
 15 Te ni jendute ña nde jíin ñáyuu cáyūcú vehe ña, te ni cahān ndahú ña jíin ná:

Núu cá cucáhnu ni ni jēē candíje ndije ná máá Jítóho yō, te cuajeē ní coyūcu ní vehe ná, áchí ña.

Te ni cana fuerza ña sãña jíjnáhan ná.

16 Te ñn quivī te cuango tucu ná suu lugar nuū jéngoo ñayuu cájicān tahu. Te ni canajnáhan ná jíin ñn sūchi síhí jēē ñúhun tachī ini i, te máá un sáha jeē cahán i tācá ndese coo te cúndaā jeē cahán i. Te sūchí un ní cajeen patrón i, návāha nihīn de cuehē xūhun síquī jeē cástūhún i nuū ñn ñn ñayuu ndese coo ichi núu. 17 Te sūchí un ndíquín i sãña jíjnáhan ná cána jee i:

Tēe yáha cájejníñu de nuū Yaā Dios, Yaā kujéhnú téyí, te cácastūhún de ndese cācu ní núu cuéchi ní jíjnáhan ní, áchí i.

18 Te cuehē quivī ni cuu súcuan te nde ni jnaniní ni Pablo. Te ni ndió cóto de nuū i, te ni cahān de jíin táchí ún:

Jíin poder maá Jesucristo ndácu ri jniñu nuū rō jeē na quénda ró ini i quihīn rō, achí de.

Te hora un ní quenda-ni cuahān.

19 Yūcuán na te ni cajini patrón i jeē ma níhín gā i xūhún cuu de, te jeē yúcuán ní cajñi de Pablo jíin Silas cuango jíin de nde vehe juzgado nuū cáyūcu

tóhō. <sup>20</sup> Te ni cajeni ún de nuū juez, tēe cásándaā jniñu, te ni cacahān:

Tēe hebreo cácuu tēe yáha, te cástónnda de ñayuu ñuu yō cúvaā i. <sup>21</sup> Te cájequin de inga costumbre jeē ma cúu cuatáhú cuiti yō, ni ma cúu sáha yó, chí tu jéhe ley nación yō jnūhun, chí ñayuu nación Roma cácuu yó, áchí.

<sup>22</sup> Te suni ni candonda ñayuu siquī Pablo jíin Silas. Te tēe cácuu juez ni candacu de jniñu jeē na quéndá sahma ndíndúú de te caní yujnu siquī de.

<sup>23</sup> Te nuū ni jínu ni cacani téyí un de, te ni casquíví de vecāa. Te ni candacu jniñu nuū tēe ndíto vecāa jeē na cóndito ndasí de jeē ma cácu ndíndúú tēe ún.

<sup>24</sup> Te jeē súcuán ni tahū jniñu nuū tēe ndíto vecāa te ni squíví de Pablo jíin Silas nde ichi íni gā, te ni squíví jehē de tīsin yujnu ndéé yaū te ni cajihni de.

<sup>25</sup> Te nuū ní cuu sava ñuú, te cájicān tahu Pablo jíin Silas, te cájita de yaa íi nuū maá Yāa Dios. Te ñayuu cáhīn jíin de vecāa un ní cajini nahín i. <sup>26</sup> Te sanaa-ni te ni jnāa nīhin téyí, te nde nuū cimientó vecāa un ní canda. Te ni canune-ni yéhyí vécāa ún, te ni canandajī-ni cadena jeē cánuhnī tāca ñáyuu ún. <sup>27</sup> Te ni natahū ni tēe ndíto vecāa, te ni jito de jeē núne yéhyí vécāa ún. Te ni tava de espada jeē cáhni de máá de núú, chí ni jeni ni de jeē ndívii cuiti ñayuu cáhīn vecāa un cuángoo i. <sup>28</sup> Te ni cana jee Pablo:

Ma cáhni ni máá ní, chí cáhīn ndihí ná, áchí de.

<sup>29</sup> Yūcuán na te máá tēe ndíto vecāa ni cana de jeē na quíndeca i ñuhūn, te yachī ni quíví de ini vecāa. Te ni jecuíñī yití de nuū Pablo jíin Silas, te quísi i de jeē yūhú de. <sup>30</sup> Te ni quenehen de Pablo jíin Silas, te ni cajnūhún de:

Tátā, ¿na vé cánuú sáha ná te jnama ya sãñá? áchí de.

<sup>31</sup> Te ni cacahān de jín tée ún:

Candíje ní táca jéē ni sáha Jitoho yō Jesucristo jehē ní te cācu ní, te suni súcuan cācu ndihī ñayuu cáyūcú vehe ní, áchí de.

<sup>32</sup> Te ni canacani de jnūhun máá Jítoho yō nuū tée un jín núū táca ñáyuu cáyūcú vehe de. <sup>33</sup> Te suu máá jecuáā yúcuan ní nacate tēe ndíto vecāa un núū ní catujī Pablo jín Silas jeē ní cacani yujnu siquī de. Yūcuán na te ni jendute de jín ndihī ñayuu cáyūcú vehe de. <sup>34</sup> Te ni jeca de Pablo jín Silas cuahān de jín vehe de, te ni jēhe de staā ni cayejī de, te cácusī ni ndihī de vehe de jeē ní cacandíje de Yaā Dios.

<sup>35</sup> Te nuū ní cundijin, te tēe cácuu juez ni catajī de policía cuango jín jnūhun jeē na siáá tēe ndíto vecāa un Pablo jín Silas quingoo de. <sup>36</sup> Te tēe ndíto vecāa un ní castūhún de jnūhun yáha núū Pablo:

Tēe cácuu juez ni catajī de jnūhun vēji jeē na siáá na níhín quingoo ní. Núu súcuan te quendacoo ní quíhīn ní, te cuandeyí ni ní, áchí de.

<sup>37</sup> Te ni cahān Pablo jín policía:

Cuehē ñayuu ni cajito i jeē ní cacani de sãñá, te ni tu ní cásandaā de xīhna gā núu ndaā jeē iyó cuéchi ná. Te ni cachuhun de sãñá vecāa, vēsú cácuu ná séhe nación Roma, te iyó ley jeē ma cúu sáha súcuan jín ñáyuu cácuu sēhe nación Roma. Te vijna ¿á quenehen sáhi de sãña cácuni de naún? Ma cúu cui. Na quícoo máá de quenehen de sãña jínáhan ná, áchí Pablo.

<sup>38</sup> Te ni canandió cóo policía ni castūhún de jnūhun yáha núū tée cácuu juez, te ni cayūhú de jeē

ní cajini sōho de jnūhun jeē séhe nación Roma cácuu Pablo jíin Silas. <sup>39</sup> Te ni quecoo tēe cácuu juez ún, te yōhyo ni cacahān ndahú jíin Pablo jíin Silas jeē na cóne cáhnu ni de. Te ni caquenehen de vecāa ún, te ni cacahān ndahú jíin de jeē na quéndacoo de ñuu un quíngoo de. <sup>40</sup> Yūcuán na te ni quendacoo de vecāa, te ni jengoo tucu de vehe Lidia, te ni cacahān de jnūhun ndeyí ni jíin táca hermano. Te ni caquihin de ichi cuangoo de.

*Jeē ní cacuvaā ñayuu Tesalónica*

## 17

<sup>1</sup> Te Pablo jíin Silas ni cayāha de ñuu Anfípolis jíin ñuu Apolonia cuangoo de, te ni jinūcoo de ñuu Tesalónica nuū iyó in vehe iī sinagoga jnáhan de hebreo. <sup>2</sup> Te ni coyūcú de yūcuan únī semana, te táca quívī ndétātu jéhén Pablo vehe iī sinagoga, nájñūhun sáha sáha de, te ni nacani de jnūhun ya nuū téé un. <sup>3</sup> Te jíin jnúhun cáhán tutu iī ni steén de jeē súcuan ni jini ñúhún ndoho Cristo jeē cúu yā te natecu yā. Te ni cahān de:

Jnūhun nácani ná núū ni cúu jnūhun Jesús, te máá yá cúu Cristo, Yaā ní jeni Yaā Dios jeē jnáma ya yohó, áchí de.

<sup>4</sup> Te ni cacandíje sava jnáhan de hebreo jíin cuéhē ñayuu griego jeē cáchiñúhún i Yaā Dios, jíin cuéhē ñahan cácuu nuū, te ni nduu inuú ni i jíin Pablo jíin Silas. <sup>5</sup> Yūcuán na te yōhyo ni cacucúésún ni jnáhan de hebreo jeē tu cacandíje, te ni castútú téé cunéé jéé cájica cúxí-ni, te ni quejéé cácana ndee cuangoo. Te súcuan ni casaca núu de xinī ñáyuu ñuu ún. Te ni jengoo de vehe Jasón cánanducú de Pablo jíin Silas

jeē jñí de tēe un quíndēca de nuū ñáyuu cuehē. <sup>6</sup> Te tu ní cánanihīn de, te ni cañuhun de Jasón jíin sava ga hermano cuango de jíin núū tohó ñuu ún. Te jeē siquí Pablo jíin Silas ni cacana jee de:

Tēe jeē castívi xínī ñáyuu ní ñáyīví, je ni quecoo de nde yāhá. <sup>7</sup> Te máá Jasón ni jēhe núu vehe cáyūcu tēe ún. Te tēe ún tu cájetáhú de ley maá rey yohó ñáyuu Roma, chi sa suhva cácahān de jeē cájetáhú de nuū inga rey jeē naní Jesús, achí de jíjnáhan de.

<sup>8</sup> Te ñayuu jíin tēe cácuu tohō ni cajini sōho i jñūhun yáha, te ni cacuvaā i siquí. <sup>9</sup> Te Jasón jíin táca gá hermano ni castóo de xūhún de, chi ni cacahān tohō un jíin de jeē nde núu tají de Pablo jíin Silas quingoo de inga ñuu, yūcuán na te nacuaaha tohō un xūhun de. Te súcuan te ni casiáá de Jasón jíin táca gá hermano cuango de.

### *Jeē ní coyūcu Pablo jíin Silas ñuu Berea*

<sup>10</sup> Yūcuán na te tēcá hermano un, yachī-ni ni cascáca de Pablo jíin Silas jecuáā un, cuángoo de nde ñuu Berea. Te nuū ni jínūcoo de yūcuán, te ni quívicoo de vehe i sinagoga jnáhan ñuu de hebreo.

<sup>11</sup> Te jnáhan ñuu de hebreo cáyūcu yúcuan, vāha ga ni maá de vēsú jnáhan ñuu de hebreo cáyūcú ñuu Tesalónica, chi vāha ni cacusi ni de jíin jñūhun ni cacahān Pablo jíin Silas. Te ndijnahan quívi cánanducú yúcún de nuū tútu i núu súcuan cáhán chí tuú. <sup>12</sup> Jeē yúcuan ní cacandíje cuehē jnáhan ñuu de hebreo te suni nde jíin cuéhē ñayuu griego, cúu tēe cúu ñahan cácuu nuū. <sup>13</sup> Te jnáhan ñuu de hebreo cáyūcú ñuu Tesalónica ni cajini jñūhun de jeē suni nde ñuu Berea nácani Pablo jñūhun Yaā Dios, te ni



caquihin de ichi cuangoo de Berea, te suni yūcuan ní castónnda de ñayuu siquī Pablo. <sup>14</sup> Yūcuán na te tǎcǎ hermano ni catajǎ-ni de Pablo cuahān de nde yumar. Te ni ndōo Silas jín Timoteo ñuu Berea. <sup>15</sup> Te jecu hermano ni cajendēca de Pablo nde ñuu Atenas. Te ni cahān Pablo jín de jeē cahān de jín Silas jín Timoteo jeē na quíngoo yachī de nuū Pablo. Te vendicoo de ñuu Berea.

### *Jeē ni íne Pablo ñuu Atenas*

<sup>16</sup> Te níní ndétu Pablo jeē jinúcoo Silas jín Timoteo nuū de ñuu Atenas, te ni jini de jeē ñáyuu ñuu ún yōhyo cáchiñúhún i ídolo, te ni nacani cuíhyá ni de. <sup>17</sup> Te ini vehe iī sinagoga ni cahān de jnūhun ya jín jnáhan ñuu de hebreo jín táca gǎ tē cáchiñúhún Yáa Dios. Te suni tǎca quívī ni nacani de jnūhun ya nuū tǎca ñáyuu cáhīn nuū yáhu. <sup>18</sup> Te sava tē cáscuáha jnūhun jeē castéén grupo epicúreo, jín inga sava tē cáscuáha jnūhun jeē castéén grupo estoico, ni caquejéé cácahān jín Pablo. Te sava ni cacahān:

¿Na jnūhun cáhán tē tǎlólhlé yāha? áchí.

Te sava ga de ni cacahān:

Tē nácani jnūhun tǎca yáa jeē tu cánevāha yó cúu de, áchí.

Súcuan ni cacahān de, chi nácani Pablo jnūhun vāha Jesús jeē ní natecu yā mēhñu ndíyi. <sup>19</sup> Te ni cajeca de Pablo cuangoo de, te ni jinūcoo de nde lugar nuū naní Areópago nuū cándutútú ñáyuu cándacu jniñu, te ni cacahān de:

Cácuni ná cachi ni núu na jnúhun jeé jéē steén ni. <sup>20</sup> Chi cáhán ni jnúhun jeē ná tu cuni cuítí na

jíjnahán ná, te jeē yúcuán cácu ni ná jecūhun ni na síquī tāca jnúhun yáha, áchí jíin de.

<sup>21</sup> Chi tāca ñáyuu ñuu Atenas jíin táca ñáyuu inga ñuu jeē cáyūcu núu i yūcuán, tuá na inga jniñu cácusī gā ni i jíin chi máá-ni jeē cuni nahín i jnūhun jeé chí jéē cahán i jnūhun jeé.

<sup>22</sup> Te índichi Pablo mēhñu ñáyuu ní candutútú núu naní Areópago, te ni cahān de:

Tēe ñuu Atenas jíjnahán ní, jíto ná jéē yóhoyo cáchiñúhún ní yaā maá ní. <sup>23</sup> Chi ni jica nuu ná, te ni jecondēhe ná nuū jeē cáchiñúhún ní, te ni jito ná ñin altar jeē yosó jnúhun yáha: Yáha cúu altar yaā jeē ná tu cuni yō jnūhun ya, achí. Te máá Yáa un jéē cáchiñúhún ní, vēsú ná tu cuni ni jnúhun ya, suu jnūhun Yaā un cúu jeē nácani ná núu ní vijna.

<sup>24</sup> Chi Yaā un cúu Yaā jeē ni sáha ñayīví jíin táca ndihi jeē iyó, te máá yá cúu Jitoho andiví jíin ñayīví, te tu ndéé yá ini veñūhun cásáha ñayuu. <sup>25</sup> Te ni tu cúmanī ni ñin nuū yā jeē cuáha ñayuu nuū yā, chi máá yá sáha jeē técu ñayuu, jíin jéē stáa i tachī i, jíin jéē nihín i ndihi jeē jíni ñúhún i.

<sup>26</sup> Te ni sáha ya jeē chíji ñin-ni yucūn ni tahū tāca ñáyuu jeē ní nduu tācá nación, návāha coyūcú i níí cáhnu ñayīví, te ni tana yā cuiyā cotecu ñayuu jíin lugar coyūcú i jíjnahán i. <sup>27</sup> Te súcuán ni sáha ya chí cúni yā jeē nanducú yó yā, chí núu nanducú yó yā te cuni yō jeē iyó yá, chí yajni-ni cúu ya jíin ñin ñin yó. <sup>28</sup> Chi máá yá sáha jeē iyó yó jíin jéē cátecu yō jíin jéē cácanda yō. Chi suni súcuán ni cacahān sava tēe ñuu ni jéē cátava yaa: Suni nde yucūn maá yá cácuu yó, áchí. <sup>29</sup> Te núu yucūn Yaā Dios cácuu yó, te ma cáni ni yō jeē ídolo oro chí plata chí yúu cúu

ya, chi cájeni ni ñayuu jeē súcuan cáa ya, te súcuan cásavāha i ídolo. <sup>30</sup> Te ni jendeyí ni yā siquī jeē tu ní cájecūhun ni i ní ndé saá, te vijna chi ndácu ya jniñu jeē ñáyuu ní cáhnu ñayīví na nácani ni i jeē stóo i cuēchi i. <sup>31</sup> Chi Yaā Dios, je ni jeni ya quivī jeē ndaā sándaā yā siquī ñayuu ñayīví, te ni jeni ya Jesús jeē maá yá sándaā. Te je ni steén cají Yaā Dios nuū tāca ñáyuu jeē maá yá ni jeni Jesús, chi ni nastécu yā Jesús, achí Pablo.

<sup>32</sup> Te jeē ní cajini sōho i jnūhun jeē nátecu ndīyí te sava i ni cacahān catá i, te sava ga i ni cacahān i:

Vāha te núu cuu cuni sōho na jnúhun cáhán ni ndé inga jínu, áchí i.

<sup>33</sup> Te ni quenda Pablo mēhñu ñáyuu un cuáhān de. <sup>34</sup> Te cuahān jecu ñayuu jíin Pablo, te ni candíje. Te ñn de cúu Dionisio, tēe ndútútú jíin tēe cácujeñu cásáha junta nuū naní Areópago, jíin ñn ñahan nání Dámaris, jíin jecu gā i.

### *Jeē ni íne Pablo ñuu Corinto*

## 18

<sup>1</sup> Yūcuán na te ni quenda Pablo ñuu Atenas, te cuahān de nde ñuu Corinto. <sup>2</sup> Te yūcuan ní jito de nuū ñn jnáhan ñuu de hebreo, nání Aquila, te tēe región Ponto cúu de. Te sáá jecu-ni tiempo ni quee de jíin ñasihí de Priscila jeē ní quenda de Italia, chi rey Claudio ni ndacu de jniñu jeē na quéndacoo tāca ñáyuu hebreo ñuu Roma, jeē cúu capital Italia. Te ni jinū Pablo vehe Aquila jíin Priscila jeē cáyūcú de ñuu Corinto. <sup>3</sup> Te suni jniñu sáha tēe un sáha Pablo, chi cáquīcu de ññ cuu vehe. Te ni quendōo Pablo jíin tēe ún, te ni casájniñu de. <sup>4</sup> Te tāca quivī

ndétātu ní jehēn Pablo vehe iī sinagoga ni nacani de jnūhun ya, te ni nducú ndéyí de jeē na cándíje ñayuu jnūhun Jesús, cúu jnáhan ñuu de hebreo jíin ñáyuu tǎcá nación jeē tu ní cájini i jnūhun ya.

<sup>5</sup> Te ni jinūcoo Silas jíin Timoteo ñuu Corinto jeē véjicoo de nde Macedonia. Yūcuán na te tuá na inga jniñu ní sáha Pablo, chi máni jnūhun ya nácani cájí de nuū ñáyuu cácuu jnáhan de hebreo, jeē maá Jesús cúu ya Cristo, Yaā jeē cáñūhun ni i quiji ya.

<sup>6</sup> Te ni caquejéé i ni cacahān i siquī jnúhun ún, te ni cacahān xeēn i nuū Pablo. Te máá de ni caja de sahma de jeē cúu seña jeē stóo de i jíin cuéchi i, te ni cahān de jíin i:

Cuéchi máá ní cúu jeē jnahnū ndetū ni núu súcuan, te nasūu cuéchi máá ná cúu. Nde vijna te quihīn na núu ñáyuu tǎcá nación jeē tu cájini i jnūhun ya, te nacani ná jnúhun ya nuū i, áchí de.

<sup>7</sup> Te ni quenda de ini vehe iī sinagoga, te ni jinū de vehe ñn tēe nání Justo ni condee de. Te chíñúhún tēe un Yáā Dios, te vehe tēe un néne yajni xiin véhe iī sinagoga. <sup>8</sup> Te Crispo, tēe cújéhnú ini vehe iī sinagoga, ni candíje de máá Jítóho yō nde jíin ndihí ñayuu vehe de. Te cuehē ñayuu ñuu Corinto ni cajini nahín i jnūhun nácani Pablo, te ni cacandíje i, te ni cajendute i. <sup>9</sup> Te ñn jecuáā ni sáha máá Jítóho yō jeē ní jito ndijin Pablo yā ni cahān yā jíin de:

Ma yūhu ró ni ma cási rō yuhu ró, chi níní nacani ró jnúhun ri. <sup>10</sup> Chi ndító ri rohó, te ma cúu sáha xeēn ni ñn ñayuu jíin ró. Nacani ró jnúhun ri, chi coo cuehē ñayuu candíje jnūhun ri ñuu yáha, áchí yá.

11 Te ni condee Pablo yūcuán ñn cuiyā yosáva ni steén de jnūhun Yaā Dios nuū ñáyuu ún.

12 Te ná cúu Galión gobernador Acaya, te ñayuu hebreo jeē cúu jnáhan ñuu Pablo, ñn cáhnu-ni ni candonda i siquī Pablo. Te ni cajeca i de cuangoo i jín de nde vehe juzgado. 13 Te ni cacahān i jín Galión:

Tēe yáha yōhyo scáhán de tāca ñáyuu jeē inga modo chiñúhún i Yaā Dios, suu ñn modo jeē cúu contra siquī ley, achí i.

14 Te quejéé Pablo cahān de núú, te ni cahān-ni Galión jín ñáyuu hebreo un:

Ñayuu hebreo jijnáhan ró, núu ñn cuēchi xeēn cúu, te cánuú cuni nahín rí jnūhun cácahān rō núú. 15 Te tuú, chi máni siquī jnúhun-ni jín siquī ley maá ró jín siquī tée cástéén cúu. Te na sándaā maá ró siquī jníñu yáha, chi tu sándaā rī siquī maá ñn jeē súcuan-ni, achí de.

16 Te ni cahān de nuū i jeē na quíngoo i fuera.

17 Yūcuán na te ñayuu griego ni cajñi i Sóstenes, tēe cújéhnú ini vehe ñi sinagoga, te máá fuera yehyí vehe juzgado ni cacani i de, te Galión chi tu ní sáha cuiñi de cuenta.

*Jeē ní najinū Pablo ñuu Antioquía, te cuahān de vuelta unī jeē nacani de jnūhun ya*

18 Te cuehē gā quivī ni condee Pablo ñuu Corinto. Yūcuán na te ni nacuatáhú de nuū tācá hermano yúcuan, te Aquila jín ñasihí de Priscila cuangoo de jín Pablo, te ni jinūcoo de ñuu Cencrea. Te yūcuan ní saté ñi Pablo xinī de, te súcuan stéén de jeē squícu de nuū Yaā Dios jeē ni jéjnūhun de. Te ni quivícoo de barco jín Aquila jín Priscila quihñ de

región Siria. <sup>19</sup> Te ni jinūcoo de ñuu Efeso, te yūcuan ní caquendōo Aquila jíin Priscila. Te ni jehēn-ni Pablo vehe iī sinagoga, te ni cahān de jnūhun ya jíin jnāhan ñuu de hebreo jeē cándutútú yūcuan. <sup>20</sup> Te ni cacahān ndahú i jíin de jeē na cōnēne de jecu gā quivī jíin i, te tu ní jéhe de jnūhun. <sup>21</sup> Chi ni nacuatáhú de nuū i, te ni cahān de:

Cánuú jēē nuhūn ná ñuu Jerusalén cone ná vico. Te núu cúni Yaā Dios te ndee tucu ná núu ní, áchí de.

Te ni quenda de ñuu Efeso, te ni quivī de barco cuahān de. <sup>22</sup> Te ni jinū de ñuu Cesarea, te ni jehēn de ñuu Jerusalén. Te nuū ní ndihī ni cahān de jíin grupo ñayuu cácandíje yūcuán, te cuanuhun de ñuu Antioquía. <sup>23</sup> Te ni coyūcú de yūcuán jecu quivī, te sáa te ni quenda tucu de cuahān de ni jica cuu de ní Galacia jíin Frigia. Te ñayuu cácandíje ni cahije ga ni i jíin jnūhun ya ni sáha de.

### *Jeē ní nacani Apolos jnūhun Jesús ñuu Efeso*

<sup>24</sup> Te ñuu Efeso ni quee iin tēe hebreo nání Apolos, te tēe ñuu Alejandría cúu de. Te vāha nācani de jnūhun ya, chi vāha jíní de jnūhun jeē cahán tutu iī. <sup>25</sup> Te je ni cutūhva vāha tēe un jíin jnūhun máá Jítoho yō Jesús, vēsú jiní de máni máá jnūhun ya jeē ni stéen Juan ná ni scuándute de ñayuu, te ndíhvī ni de stéen cají de jnūhun ya nuū ñayuu. <sup>26</sup> Te jéhu-ni ni nacani de jnūhun ya ini vehe iī sinagoga. Te ni cajini sōho Aquila jíin Priscila jnūhun nācani de, te ni cajeca de Apolos cuangoo sīn de, te ni cacastūhun yúcún ndíndúú de jnūhun ya jeē ná tu cuni Apolos. <sup>27</sup> Te cúni Apolos quihīn de nde región Acaya. Te je cácandíje sava ñayuu yūcuan ní sáha

Yaā Dios siquī jeē váha ni yā. Te tācá hermano ñuu Efeso ni cachindéé ñáhán i de, chi ni catee i carta quihīn de jín nū ñáyuu cá candíje cá yūcú Acaya jeē na cuátáhú i Apolos. Te nuū ni jínū de yūcuán, te váha ni chindéé ñáhán de tāca ñáyuu cá candíje un jín jnúhun ya. <sup>28</sup> Te nuū tāca ñáyuu ñuu un ndé jín jnáhan ñuu de hebreo jeē cá yūcu yúcuán, ní steén cají de ndese cástívi táca jnáhan hebreo de siquī jnúhun ya. Te tu ní cánihīn jnáhan de un jnúhun cahān siquī jeē ni steén de, chi jín jeē cahān tutu īi ni steén de jeē Jesús cúu Cristo, Yaā jeē cáñūhun ni de quiji ya.

*Jeē ni íne Pablo ñuu Efeso*

## 19

<sup>1</sup> Te níní néne Apolos ñuu Corinto, te ni yāha Pablo ichi síquī ñuu Efeso, te ni nanuu de ni jinū de máa ñuu ún. Te yūcuán ní nijnáhan de jín tijni tēe cá candíje. <sup>2</sup> Te ni cajnúhún de tēe ún:

¿A ní canihīn ní Espíritu Santo ná ni cacandíje ní, chí ná tuú? áchí de.

Te ni cacahān de jín Pablo:

Tuú, chi ni ná tu nihīn na jnúhun jeē iyó Espíritu Santo, achí de.

<sup>3</sup> Yūcuán na te ni cahān Pablo:

¿Na siquī ni cajendute ní núu súcuán? áchí de.

Te ni cacahān de:

Ni cajendute ná síquī jnúhun ni steén Juan, achí de.

<sup>4</sup> Te ni cahān Pablo:

Jeē ní scuándute Juan ñayuu cúu jeē ni steén de jeē na nácani ni i jeē stóo i cuēchi i, te ni cahān de

jeē na cándíje i máá Yáā quiji jeē cúu Cristo Jesús, áchí Pablo.

<sup>5</sup> Te nuū ní cajini sōho tēe un jnúhun yáha, te ni cajendute de jeē ní cacandíje de máá Jítóho yō Jesús. <sup>6</sup> Te ni soó Pablo ndíndúú ndaha de xinī tāca tée ún, te ni quiví ni Espíritu Santo ini anuá de jíjnáhan de, te ni cacahān de sín sín yuhu te ni canacani de jnúhun ya. <sup>7</sup> Te ni Iyo nájnūhun uxī uū jnahán tēe.

<sup>8</sup> Te unī yoō ni jehēn jehēn Pablo vehe iī sinagoga. Te jéhnú ni nacani de jnúhun ya, te ni nducú ndéyí de jeē na cándíje ñayuu jnúhun ndese ndácu Yaā Dios jniñu. <sup>9</sup> Yūcuán na te sava i ni cacunīhni ni i te tu ní cácaandíje i, chí sa ni cacahān neé i síquī jnúhun vāha Yaā Dios jíín ñáyuu cánataca. Jeē yúcuán ní cujiyo-ni Pablo nuū ñáyuu ún, te ñayuu cácaandíje cuangoo i jíín de. Te ndíjnahan quiví ni steén de nuū ñáyuu ún ini escuela ñn tēe nání Tiranno. <sup>10</sup> Te súcuan ni sáha de uū cuiyā, te tāca ñáyuu cáyūcu Asia, cúu ñayuu hebreo cúu ñayuu tāca gá nación, ni cajini sōho i jnúhun máá Jítóho yō Jesús. <sup>11</sup> Te ni jēhe Yaā Dios poder nuū Pablo jeē sáha de cuehē jniñu jéhnú téyí. <sup>12</sup> Te nde pañú jíín sahma jeē ní jni de ni cajengoo jíín núu ñáyuu cácuñu, te ni canduvāha-ni i cuehyí cándoho i, te ni quendacoo tachī ini i cuangoo.

<sup>13</sup> Te jecu tēe hebreo cájica cuu de jeē quénehen de tachī ini ñayuu, te ni cajeni síquí ni de jeē suni jíín poder maá Jítóho yō Jesús quenehen de tachī, te suhva ni cacahān de jíín táca táchī:

Jíín poder Jesús jeē nácani Pablo jnúhun ya, cáhán nīhin ri jíín ró jeē na quénda ró quíhīn rō, achí de.



<sup>14</sup> Te súcuan ni casáha uxā sēhe yí ñn tēe hebreo nání Esceva, cúu de ñn sutū cujéhnú. <sup>15</sup> Te ná ni casáha de, te ni cahān-ni tachī ún:

Je jíní rī Jesús, te suni jíní rī Pablo. Te róhó jínáhan ró ¿ndé tēe cácuu ró jeē cuatáhú rí rohó? áchí jín de.

<sup>16</sup> Te tēe ndóho tachī un ní ndonda de, te ni cundeyí de siquī ndihúxá tēe ún. Te ni sáha xeē ndasí de jín ndé ni catujī te ni cacuvichí lí ni quen-dacoo vehe un ní cajinu cuangoo. <sup>17</sup> Te jnūhun yáha ní cajini tāca ñáyuu cáyūcú ini ñuu Efeso, cúu ñayuu hebreo cúu ñayuu tāca gá nación, te yóhoyo ni cayūhú i, te ni cacahān i jeē yóhoyo cújéhnú máá Jítoho yō Jesús.

<sup>18</sup> Te cuehē ñayuu jeē ní cacandíje ni quijicoo i nuū Pablo ni nacani ndaā i jnūhun tācá jniñu neé ní casáha i. <sup>19</sup> Te cuehē i jeē ní casáha jniñu tásí ní jinūcoo i cándiso i tutu i, te ni cajehmu i tutu un jító nuū tāca ñáyuu. Te ni catava i cuenta nasaa ndéé tutu ni cáyū ún, te ni cajini i jeē uú xico uxī mil xūhun plata cúu. <sup>20</sup> Te ni jitē jnūhun máá Jítoho yō cuahān, te ndihí ñayuu ni cajini i jeē cujéhnú ndasí jnūhun ya.

<sup>21</sup> Te nuū ní ndihí tācá jniñu yáha, te jéni téyí ni Pablo jeē quihīn de Macedonia jín Acaya, te sáa te najinū de ñuu Jerusalén. Te ni cahān de jeē na najinū de ñuu Jerusalén, yūcuán na te jíní ñúhún quihīn de nde ñuu Roma. <sup>22</sup> Te uū tēe jeē cáchindéé ñáhán jín Pablo cúu Timoteo jín Erasto, te ni scándu de ndindúú tēe yāhá cuángoo de nde Macedonia, te ni quendōo máá de Asia jecu gā quivī.

*Jeē ní cacuvaā ñayuu ñuu Efeso*

<sup>23</sup> Te suu quiṽi ún yōhyo ni candonda ñayuu siquī jnūhun ya. <sup>24</sup> Chi ní Iyo ñn tēe sájniñu siquī plata, nání de Demetrio. Te máa de jín ndihī tēe cásájniñu jín de, cánihīn de cuehē xūhún, chi jín plata casáha de vehe lulí jēe modo veñūhun ídolo i jeē cúu yaā Diana. <sup>25</sup> Te Demetrio ni nastútú de tēe cásájniñu jín de jín táca gá tēe jeē suni jniñu yúcuan casáha, te ni cahān de:

Tátā, cájini ni jēe siquī jniñu casáha yó yáha vāha cánihīn yō xūhún. <sup>26</sup> Te cájito ní te cájini sōho ní jēe ñn tēe nání Pablo chi cáhān de jeē násūu yāā cácuu jeē casáha ñayuu. Te je ni scandíje de cuehē ñayuu, nasūu máa ñn-ni ñuu Efeso yāhá chi ní cáhnu Asia. <sup>27</sup> Te quiyūhú ni na jēe cahān ñayuu jeē tu ndé jéjníñu jeē casáha yó. Te sanaa te suni súcuan cahān i coto i máa veñūhun yaā sihí Diana jeē kujéhnu, te suni sájēe ni i nuū yaā Diana, te ma cúu ga kujéhnu ya vēsú ndivii ñayuu Asia jín ñáyuu ní cáhnu ñayṽi cáchiñúhún i ya vijna, áchí de.

<sup>28</sup> Súcuan ni cajini sōho de jnūhun yáha te yōhyo ni caquitī ni de, te ni cacana jee de:

Cujéhnu téyí Diana, yaā cúu patrona ñuu yō Efeso, achí de.

<sup>29</sup> Te ñayuu ñuu Efeso ni cacuvaā i, te ñn cáhnu-ni ni candonda i ni cajniñi i Gayo jín Aristarco cuango i jín de nde vehe nuū cándutútú ñáyuu casáha i junta. Te ndindúú tēe un cácuu tēe Macedonia, te cájica de jín Pablo. <sup>30</sup> Te cúní Pablo quiṽi de nuū ñáyuu cuehē un cáhān de jín i, te ñayuu cácdíje tu ní cájēhe i jnūhun quihīn de. <sup>31</sup> Te suni sava tohō jeē cácuu amigo de cáyūcu Asia, ni catají

jnūhun cuahān nuū de, cácahān ndahú jíin de jeē ma quihín de nuū ní cacutútú ñáyuu ún. <sup>32</sup> Te ñayuu ní cacutútú un, sava i ni cacana jee i ñn jnūhun te sava ga i ñnga jnūhun, te súcuan ni cacuvaā teyí i, te cuehē i ni tu cájini cuiti i na siquī cúu jeē ní cacutútú i. <sup>33</sup> Te sava tēe hebreo ni cajeni de ñn jnáhan de jeē naní Alejandro nuū ñáyuu cuehē ún, te ni cacastūhún de nuū tēe ún na siquī cúu jeē cacuvaā i. Yūcuán na te Alejandro ni sáha de seña jíin ndaha de jeē na cúnayúú ñáyuu, chi cúní de cahān de jíin i jeē násūu cuéchi táca ñáyuu hebreo cúu. <sup>34</sup> Te ni canacuni ñayuu un jēe tēe hebreo cúu de, te jeē yúcuan ní cacana jee téyí gá i nájñūhun uū hora:

Cújehnu téyí Diana, yaā cúu patrona ñuu yō Efeso, achí i.

<sup>35</sup> Yūcuán na te ni cacunahín ñáyuu ni sáha tēe cúu secretario ñuu ún, te ni cahān de:

Níhín ñáyuu ñuu yō Efeso, ndíhi ñayuu chi je cájini i jeē cándito vāha yó veñūhun yaā Diana jíin imagen Diana jeē ní ñnga nde andiví. <sup>36</sup> Te ni ñn chi ma cúu cahān jeē tú ndaā jnūhun yáha. Núu súcuan te vāha ga na cási ní yuhu ní, te ma sáha yachí ní ñn jeē tu ní nácani vāha ni ni siquī. <sup>37</sup> Chi tēe yáha ní caquindeca ní de yáhá vēsú tu ní cásáha de ni ñn cuéchi siquī Diana yō, ni tu ní cácahān ndevāha de ni ñn jnūhun siquī. <sup>38</sup> Te Demetrio jíin táca gá tēe jeē ñn-ni jniñu cásáha jíin de, núu cācuni de cahān de cuéchi siquī ñn tēe, te na quíngoo de nde vehe juzgado nuū cáyūcu juez, tēe cásándaā jniñu, te yūcuán cundaā siquī de jíjnáhan de. <sup>39</sup> Te núu íyó jnūhun jeē ma cúu cundaā yūcuán, te jíni ñūhún cundaā nuū ñn junta nájñūhun tájnúní ley.

40 Chi yúhú ná jeē sanaa te cahān tāca tóhō Roma jeē siquí gobierno de ni candonda yó, chi ma nihín yō jnūhun castūhun yó na siquí cúu jeē ní cacutútú yó ni cacuvaā yō vijna, áchí de.

41 Te nuū ní ndihi ni cahān secretario jnūhun yáha, te ni cajitē ñayuu un cuángoo.

### *Jeē ni jéhēn Pablo Macedonia jín Grecia*

## 20

1 Te ná ni yāha jéē ní cacuvaā ñayuu, te ni cana Pablo ñayuu cácandíje, te ni jeni ichí de i. Te ni cañunundee jnáhan de jín Pablo jeē ní nacuatáhú de, te cuahān de Macedonia. 2 Te ni jica cuu de tācá ñuu yúcuan. Te jín cuéhē jnūhun ní stihví ni de tācá hermano cácandíje. Te ni jinū de Grecia. 3 Te ni condee de yúcuan úní yoō. Te je yajni quihín de jín barco nde Siria nuú, te máá quíví ún te ni nihín de jnūhun jeē jnáhan ñuu de hebreo ni casquíjnáhan jnūhun jeē ndonda siquí de ichi nuū quihín de, te jeē yúcuan ní nacani ni de te cuahān tucu de ichi Macedonia. 4 Te ni cahīyo sava tēe cájica jín Pablo, te cánaní de Sópater ñuu Berea, Aristarco jín tēe nání Segundo nde ñuu Tesalónica, Gayo ñuu Derbe, Tíquico jín Trófimo nde Asia, jín Timoteo. 5 Te ni cacandu tēe yáha, te cándētu de Pablo jín sáña, Lucas, nde ñuu Troas. 6 Te nuū ni yáha vico jeē cáyeji i pan jeē tu yíhi levadura, te jín barco ni quendacoo ná ñuu Filipos, te nde nuū uhún quíví te ni canajnáhan ná jín de nde ñuu Troas. Te ñuu yúcuan ní coyūcu ná uxā quíví.

### *Jeē ni íne Pablo ñuu Troas*

7 Te máá quiv̄i domingo ni candutútú ñáyuu cácanđije jeē caji i pan, nájñuhun ni steén maá Jítóho yō jeē núcūhun ni yō siquī yā. Te ni steén Pablo jñūhun nuū ñáyuu ún. Te siquī jeē inga quiv̄i un jíni ñúhún quenda de quih̄in de, te nahán ní nacani de jñūhun nde ni cuñuú. 8 Te vehe yósó jnáhan cúu vehe ún. Te nde cuarto xinī nuū ní candutútú ná un ní iyo cuehē lámpara ni cundijin. 9 Te ñin sūchi yí nání i Eutico, néne i yuhu ventana. Te jeē ní cunahán nácani Pablo jñūhun, te yōhyo jíi i máhná, te ni quixi-ni i. Te nde piso unī un ní ñinga i nde nuū ñúhun. Te je ni jihī i ni candonehen de i. 10 Yūcuán na te ni nuu Pablo te ni jita ndeyi de ni canehen de i ni ñunundee de i, te ni cahān de:

Ma yūhu ní jíjñáhan ní, chi ni natecu i, áchí de.

11 Te ni ndaa Pablo, te ni yeji de pan jíin i jíjñáhan i jeē cánucūhun ni de siquī yā. Te nahán gá ni nacani de jñūhun nde cuacundijin. Yūcuán na te ni quenda de cuahān de. 12 Te Eutico chí íyó váha i cuanuhun i jíin de jíjñáhan de, te ndivii ñayuu ún yōhyo cácusī ni i.

### *Jeē ní quenda Pablo ñuu Troas cuahān de ñuu Mileto*

13 Te ni quiv̄i coo ná ini barco cuango ná. Te Pablo chí cúní de caca jéhé de, te ni cundaā jeē najnáhan ná jíin de nde ñuu Asón. 14 Te nuū ní canajnáhan ná jíin de ñuu Asón, te ni quiv̄i de barco te cuango ná jíin de nde ñuu Mitilene. 15 Te yūcuan ní quendacoo tucu ná jíin barco te inga quiv̄i ni jinūcoo ná xiin Quío, ñuhun jeē íne sīn nuū ndúte. Te quiv̄i uní ni jinūcoo ná Samos jeē súni nuū ndúte íne, te ni caquendōo ná Trogilio. Te quiv̄i cuún ni

jinūcoo ná ñuu Mileto. <sup>16</sup> Te tu ní jéngoo ná ñuu Efeso, chi jéni ni Pablo jeē yáha-ni de ñuu un quihīn de, návāha ma cucuéé de Asia te naa tiempo nuú, chi núu de jinū yachī de ñuu Jerusalén cone de máá quívī Pentecostés núu na cúu.

*Jeē ní jeni ichí Pablo tēe jéhnu cándiso jníñu nuū ñáyuu cácandíje ñuu Efeso*

<sup>17</sup> Te ná íne ga Pablo ñuu Mileto, te ni tají de jnūhun cuahān nde ñuu Efeso jeē na quíjicoo tēe jéhnu cándiso jníñu nuū ñáyuu cácandíje yūcuán.

<sup>18</sup> Te nuū ní quecoo tēe ún, te ni cahān de:

Je cájini vāha ní ndese ni jica ndaā na ndé ná ni quee nuú ná Asia te nde vijna. <sup>19</sup> Chi ní tiempo jeē ni íne ná jíin ní te nde vijna, jéjníñu vāha na síquī jnūhun máá Jítóho yō, te tu ní sándúxí ná maá ná. Te íyó jínu ni ndahyū na jéhē ñáyuu. Te ni ndoho ná jnúndóho ni casáha jnáhan ñuu ná hebreo, chi ni casquíjnéhan jnūhun i síquī ná. <sup>20</sup> Te cájini ni jéē tu ní táñúhún ná ni ñn, vēsú ndese ga cácahān ñayuu síquī ná, chi ni nacani ná ndihī jnūhun ya jeē quéndō vāha ní sáha. Te ni steén na jnúhun ya nuū ni jíjnéhan ní, cúu nuū chitú cúu tācá vehe ní.

<sup>21</sup> Te ñnuú-ni jnūhun ni nacani ná núu ndihī ní, cúu jnéhan ñuu ná hebreo cúu ñayuu tāca gá nación, chi ni cahān na jéē na nacani ni ni jéē stóo ni cuéchi ní te na cándíje ní máá Jítóho yō Jesucristo. <sup>22</sup> Te vijna chi ñúhun ichí ná quihīn ná ñuu Jerusalén, chi stáhvī ni Espíritu Santo sãña quihīn ná. Te tu jíiní ná ndese ga coo jíin ná yūcuán. <sup>23</sup> Te íyó ñn jeē jíiní na, cúu jeē chune i sãñá vecāa te quiiji jnúndóho síquī ná, chi Espíritu Santo súcuan cáhán jíin ná ndíjnahan ñuu nuū jíca ná. <sup>24</sup> Te ni tu sáha ná

cuenta vēsú na cáhni i sãñá, chi jeē cuní na cúu jeē na sínu vāha ná jniñu jeē ní tee máá Jítóho yō Jesús siquī ná, te súcuan cusī ni ná. Te jniñu un cúu jeē nácani ná jnúhun vāha ya nuū tāca ñáyuu ndese vāha ni Yaā Dios jiín yó.

<sup>25</sup> 'Te je ni jica cuu ná, ní nacani ná jnúhun ya nuū ní ndese ndácu Yaā Dios jniñu. Te vijna chi jíní na jéē ni ñn ní ma najnáhan ga yō nuū ñáyiví yáha. <sup>26</sup> Jeē yúcuan cástúhun cájí ná nuū ni jínáhan ní vijna jeē násūu cuéchi ná cúu núu ndé ñn ní stívi. <sup>27</sup> Chi ni nacani ná núu ní ndihí jnúhun Yaā Dios jeē ni sándaā yā ndese coo, te tu ní quéndōo ni ñn jnúhun. <sup>28</sup> Núu súcuan te coto vāha ní máá ní jiín ndihí ñayuu cá candíje, chi Espíritu Santo ni jeni ya nihín jéē cóndito ní ñáyuu maá Jítóho yō, chi ni nacuaan ya i jíín nñī yā. <sup>29</sup> Chi jeē quihín na te jíní na jéē quijicoo tēe cástáhú quívicoo mēhñu ní, te nducú de snāa de jnúhun ni cajetáhú ñáyuu cá candíje, te xeēn sáha jnúhun stáhú de nájnúhun xeēn sáha yihí jeē cájehni tī lanchi. <sup>30</sup> Te suni nuū grupo maá ní quejéé sava de cahān de jnúhun stáhú, te stáhú de sava ñayuu cá candíje jeē na cóndiquīn i jnúhun stáhú stéén de. <sup>31</sup> Jeē yúcuan condito ní jéē ma cóo súcuan. Te ma náā ni ní jéē uní cuiyā ndiquiví ndíñuu ni condihvī ndasí ni na ndé ndahyú na jéhē ni, ní jeni ichí ná ñn ñn ní jínáhan ní.

<sup>32</sup> 'Te vijna, hermano, jícán tahu na núu Yaā Dios jeē coto ya nihín. Chi jnúhun jeē váha ni yā ndíso poder sáha jeē íje ga ni jíín, te suu sáha jeē ñn quiví te cuāha ya tahū jeē ndujéhnú luu ní ndé jíín ndihí ñayuu ní nacāji ya jeē cóo ndoo coo ñi i nuū yā. <sup>33</sup> Tu

ní ndúcú ná jeē nihín na xúhun chí sahma nuū ní ìn i. <sup>34</sup> Chi je cájini vāha ni jēē sa suhva ni sájniñu nīhin ná návāha nihīn na jēē cótecu na ndé jíin táca téē cájica jíin ná. <sup>35</sup> Te níni ní steén na núū ni jēē súcuan jíni ñúhún sájniñu yó návāha nihīn yō jeē cuáha yó núū ñayuu cúmanī nuū. Te ma náā ni ni jnúhun jeē ni cáhān maá Jítóho yō Jesús, chí suhva ni cahān yā: Ndetū gā quendōo yó jēē cuáha yó vēsú jeē nihín yō, achí yá. Achí Pablo.

<sup>36</sup> Te ni ndihí ni cahān de tāca jnúhun yáha, te ni jecuiñī yití de, te ni jicān tahu de jíin ndihí tēe ún.

<sup>37</sup> Yūcuán na te ndihí de ni cajecunundee jnáhan de jíin Pablo ni catechūhú de jeē cánacuatáhu de, te ni candahyū de. <sup>38</sup> Chi cācucuíhyá ndasí ni de jíin jnúhun ni cahān Pablo jeē ma ndácoto jnáhan ga de. Te cuangoo-ni de jíin Pablo nde núū ìn barco.

### *Jeē cuánuhun Pablo ñuu Jerusalén*

## 21

<sup>1</sup> Yūcuán na te ni caquendōo tācá hermano ñuu Efeso, te ni quivícoo ná barco, te cuangoo ndaā-ni ná ndé Cos. Te ìnga quiví ni jinūcoo ná Rodas, te yūcuan ní quendacoo ná te ni jinūcoo ná ñuu Pátara. <sup>2</sup> Te ni cane ìn barco jeē quihín Fenicia, te ni quivícoo ná cuángoo ná. <sup>3</sup> Te nuū ní cajito ná núū Chipre jeē ìne sīn nuū ndúte, te ni quendōo ichi lado jecó barco, chí ni cayāha ná cuángoo ná nde Siria. Te ni jinūcoo ná ñuu Tiro, chí yūcuan ndóo jeē ndíso barco ún. <sup>4</sup> Te ni jenanducú ná ñayuu cācandíje, te ni caquendōo ná jíin i uxā quiví. Te máá Espíritu Santo ni steén nuū i jeē quíji jñūdóho siquí Pablo ñuu Jerusalén, te jeē yúcuan ní cacahān



i jín de jeē ma quihín de. <sup>5</sup> Te ni yāha uxā quivī ún, te ni quendacoo ná. Te tāca tēe cá candíje jín ñasihí de jín séhe de ni cachuhun ichí de sãña ní jengoo de jín ná nde yatā ñúū, te ni cajecuiñī yití ná jín de yumar te ni cajicān tahu na. <sup>6</sup> Te ni cañunundee jnáhan ná ní canacuatáhú ná yūcuán, te ni quivícoo ná barco cuangoo ná. Te ni canandió cóo de cuanungoo de vehe de.

<sup>7</sup> Te ni quendacoo ná ñuu Tiro cuangoo ná jín barco, te ni jinūcoo ná ñuu Tolemaida ni quendacoo ná ini barco. Te yūcuan ní jengoo ná ní cacahān na jín táca hermano, te ni caquendōo ná jín de ñn quivī. <sup>8</sup> Te ñnga quivī un ní cajica jéhé ná jín Pablo, te ni jinūcoo ná ñuu Cesarea, te ni quivícoo ná vehe Felipe, tēe nácani jnūhun vāha ya. Tēe un cúu jnáhan jeē ndihúxá tēe jeē ní casaja staā nuū ñáhan viuda. Te ni caquendōo ná jín de. <sup>9</sup> Te tēe un íyó cúun sēhe síhí de jeē cáhiyo máá i, te cánacani i jnūhun Yaā Dios. <sup>10</sup> Te ni coyūcu ná yūcuán tijni quivī. Te ichi Judea ni quiji ñn tēe nácani jnūhun Yaā Dios, nání de Agabo. <sup>11</sup> Te ni quee de nuū ná. Te ni quihin de sanchí Pablo, te ni jihni de ndaha de jín jéhé de, te ni cahān de:

Suhva cáhán Espíritu Santo. Jnáhan yó hebreo súcuan cuhni i tēe chíi sanchí yáha ini ñuu Jerusalén, te nastúu i de nuū ñáyuu sñn nación, áchí de.

<sup>12</sup> Te jeē ní cajini sōho na jnúhun yáha te máá ná jín táca tēe cá candíje cáyūcú ñuu Cesarea ni cacahān ndahú ná jín Pablo jeē ma quihín de ñuu Jerusalén. <sup>13</sup> Yūcuán na te ni cahān Pablo:

¿Najehē cándahyū ni jín náhan ní, te cásáha ní jēe cucuíhyá ni ná? Chi sãñá je íyó túhva ná jēe násūu

maá jéē cónuhnī ná ini ñuu Jerusalén, chi suni jeē vēsú na cúū na jéē siquí maá Jítóho yō Jesús, áchí de.

<sup>14</sup> Te jeē tu ní cúu cuiṭi casícoo ná, yūcuán na te sa suhva ni cacahān ná:

Na cóo ndese cúní maá Jítóho yō nuu sūcuan, áchí ná.

<sup>15</sup> Yūcuan na te sáá te ni casátūhva ná, te cuangoo ná ñuu Jerusalén. <sup>16</sup> Te suni jecu tēe ñuu Cesarea jeē cácanḍíje cuangoo de jíín ná. Suni cuahān in tēe Chipre nání de Mnasón, te je ni cuu cuehē cuiyā candíje de. Te ná ni jinūcoo ná ñuu Jerusalén, te ni cacoyūcu ná vehe de.

### *Jeē ni jécondēhe Pablo Jacobo*

<sup>17</sup> Te nuū ni jínūcoo ná ñuu Jerusalén, te hermano cáyūcú ñuu ún yōhyo ni cacusī ni de jeē ni jínūcoo ná. <sup>18</sup> Te inga quivī un ní cajengoo ná jíínáhan ná jíín Pablo vehe Jacobo, te yūcuan ní candutútú táca tēe jéhnū cándīso jníñu nuū ñáyuu cácanḍíje. <sup>19</sup> Te Pablo ni sáha de saludar tēe ún jíínáhan de. Yūcuán na te ni castūhún de ndihī jniñu ní sáha Yaā Dios ná ni nacani de jnūhun ya nuū ñáyuu tācá nación jeē tu cájini i jnūhun ya. <sup>20</sup> Te ni cajini sōho de jnūhun yáha, te ni cacahān de jeē yóhyo cújéhnū Yaā Dios. Te ni cacahān de jíín Pablo:

Hermano, vijna te jííní ni náa cuehē mil jnáhan ñuu yō hebreo ni cacandíje i Jesús, te cácahān nīhin i jeē cánuú squícu yó ley jeē ni jéhe ya nuū Moisés. <sup>21</sup> Te ni canihīn i jnūhun cácahān jeē stívī ní steén ni núū tāca jnáhan yó ñáyuu hebreo cáyūcu jíca i tāca gá nación, chi ní steén ni núū i jeē ma cuatáhú gá i nuū ley Moisés, ni ma sáha ga i circuncidar sēhe

i, ni ma cuatáhú gá i tāca gá jeē tajnúni jenahán. <sup>22</sup> ¿Ndeese sáha ní núu súcuan? Chi cuni ñayuu un jēē ní ndee ní te cutútú cuéhē i. <sup>23</sup> Suhva sáha ní núu súcuan. Yāha iyó cūn tēe jeē ní cajejnūhun de ñin jeē squícu de nuū Yaā Dios. <sup>24</sup> Cueca ní tēe yáha quíhīn ní jíin de templo, te cuchi ní nasándoo ní máá ní jíin de nuū yā, te cuaan ní jeē socó de nuū Yaā Dios jijnáhan de. Yūcuán na te cuu sāté de xinī de, te suu stéén jeē ní casquícu de ndihī jeē ní cajejnūhun de nuū yā. Yūcuán na te cuni ndihī ñayuu jeē tú ndaā tāca jnūhun ni cajini sōho i síquī ní, chi coto i jeē suni máá ní sa squícu ní ley yā. <sup>25</sup> Te ñayuu tācá nación jeē násūu ñáyuu hebreo cácuu i te ni cacandíje i ya, je ni catee ná carta cuahān nuū i jeē tu cánuú squícu i ley un, chi máá-ni jeē ma cáji i cūñu jeē ni sóco nuū ídolo ni ñiñī ni quiti jeē jihí jeē tu jéti ñiñī tī, te ni ma cáca jnéni i, áchí de.

### *Jeē ní cajni de Pablo ini templo*

<sup>26</sup> Yūcuán na te ni jeca Pablo tēe ún, te ñnga quivī un ní cajichi de ni canasándoo de máá de nuū yā. Te ni quivī Pablo ini templo ni cachi de nuū sutú na quivī jínu jeē nasándoo tēe un máá de nuū yā, te quindecas de quiti jeē socó de nuū yā.

<sup>27</sup> Yūcuán na te cácuu de jeē sínu de ndihúxá quivī jeē cándundoo de nuū yā, te sava jnáhan hebreo de jeē véjicoo Asia ni cajini de jeē íne Pablo ini templo, te ni cascáhán de ndihī ñayuu, te ni cajni i Pablo.

<sup>28</sup> Te ni cacana jee i:

Tēe ñuu yō Israel, cuāha núú ní ndaha jijnáhan ní na jni yó tēe yáha. Chi máá de cúu tēe jíca cuu ní cáhnu stéén de nuū tāca ñáyuu, te cáhán de síquī nación yō jíin síquī ley jeē ní jéhe ya nuū Moisés

jíin síquī templo yáha. Te suni je ni quīvicoo de jíin jecu tēe griego ini templo iī yāhá, te súcuan stívi de jnūhun iī jeē cahán jeē ma cúu quīvi ñayuu ini templo te núu nasūu ñáyuu hebreo cúu i, áchí.

<sup>29</sup> Chi nde na íne Pablo ini ñuu un ní cajini tēe hebreo jeē jíca de jíin Trófimo, tēe ñuu Efeso jeē násūú hebreo cúu de, te cájeni ni de jeē ni quívi tēe un jíin Pablo ini templo.

<sup>30</sup> Te ndihí ñayuu ñuu un ní cuvaā, te ni cacutútú-ni i, te ní cajni i Pablo, te ni castáa i de ni quenehen i de ini templo un, te ni canacasi-ni i yéhyí. <sup>31</sup> Te ni cacuni i cahni i de núú. Te general, tēe cújéhnú nuū ndíhi soldado, ni nihín de jnūhun jeē ndihí ñayuu ñuu Jerusalén ni candonda i cácuvaā i. <sup>32</sup> Te ni jeca general tācá soldado jíin capitán, te cájinu de cuango de nde nuū cáhín ñayuu cuehē ún. Te ná ni cajito ñayuu jeē ni jínūcoo general jíin soldado, te ni cajecuiñí i jeē cácani i Pablo. <sup>33</sup> Yūcuán na te ni quīvi general mēhñu ñáyuu, te ni jni de Pablo, te ni ndacu de jniñu jeē conuhni de jíin úu cadena. Yūcuán na te ni cajnūhún general ndé tēe cúu Pablo te na cuēchi ni sáha de. <sup>34</sup> Te ni cacana ñayuu cuehē ún, sava i ñn jnūhun te sava ga i ñnga jnūhun, te tu ní cúu cuni de na cuēchi ni sáha Pablo, chi cácuvaā i. Te ni ndacu de jniñu cuahán Pablo nde cuartel. <sup>35</sup> Te nuū ni jínū Pablo escalera cuartel ún, te soldado ni cajni de Pablo cándiso de síquī jeē cácani ñayuu ún jni i Pablo sáha xeēn i jíin de. <sup>36</sup> Chi ndihí i vējicoo i ichi yátá soldado, te cácana jee i:

Cahni ni tēe jíñá, achí i.

*Jeē ni cáhán Pablo jehē maá de nuū ñáyuu*

<sup>37</sup> Te cásquívī de Pablo ini cuartel nuū, te jíin jnúhun griego ni cahān Pablo jíin general:

¿A cuáha ni jnúhun cahān ná ìn jnúhun jíin ní? achí de.

Te ni cahān general jíin de:

Te jíiní rō cahān rō yuhu griego jeē súcuan. <sup>38</sup> Núu súcuan te nasūu rōhó cúu tēe Egipto jeē jé ni cuu quívī ni ndonda síquī gobierno te ni quenehen cuūn mil tēe jéhni ndīyī cuango jíin de nde nuū ñúhun téhé, achí.

<sup>39</sup> Yūcuán na te ni cahān Pablo:

Tuú, chí tēe hebreo cúu ná, te ni cacu ná ñuu Tarso, ìn ñuu jeē kujéhnu ndañúū Cilicia. Te quiñúhun ni ni cuáha ní jnúhun na cáhán na jíin ñáyuu yáha jíináhan i, achí de.

<sup>40</sup> Te general ni jēhe de jnúhun jeē cahān de. Te ni jecondichi Pablo nuū escalera, te ni sáha de seña jíin ndaha de jeē na cúu nayúú ñáyuu ún. Te nuū ní cuu nayúú-ni i, te jíin jnúhun yuhu ñúū de hebreo ni cahān de:

## 22

<sup>1</sup> Ndihi níhín jeē cácuu ní jnáhan ñuu yō jíin ndihi níhín jeē cákujéhnu ní núū ñúū yō, cuni sōho ní jnúhun cahān na jéhē maá ná, achí de.

<sup>2</sup> Te ni cajini sōho i jeē cahān Pablo yuhu hebreo jeē cúu yuhu ñúū i, te víhyá gā ni cacunahín i. Te ni cahān Pablo:

<sup>3</sup> Máá ná cúu jnáhan ñuu yō hebreo, te ni cacu ná ini ñuu Tarso ndañúū Cilicia. Te ini ñuu Jerusalén yáha ní jehnu ná, te ni cutūhva ná núū Gamaliel, te ni steén de nuū ná ndihi síquī ley jeē ni jēhe ya nuū jíi yō. Te nde jíin ini jíin ánuá na ní nducú ndéyí ná squícu ná súcuan nuū Yaā Dios, nájnúhun

cásaha máá ní vijna. <sup>4</sup> Te ni jito xeēn na ñáyuu cá candíje i jnūhun Jesús te nde cuní na jéē na cúu ndihí i núú. Chi cúu tēe cúu ñahan ni jni ná ni chuhun ná vecāa. <sup>5</sup> Te sutū cujéhnū ga jíin táca tēe jéhnū cándiso jniñū nuū ñúū yō, cácuu de testigo jeē súcuan ni sáha ná, te suni máá de ni cajēhe de tijni carta cuahān na jíin jéē cuáha na núū tāca jnāhan yó cáyūcú ñuu Damasco. Chi cuahān ná ñuu un jéē jni ná ñáyuu cá candíje i Jesús te quindeca ná i ñuu Jerusalén yāha, návāha ndoho i núú.

*Jeē ní cachi Pablo ndese ni sama ya de  
(Hch. 9.1-19; 26.12-18)*

<sup>6</sup> Te ni quihin ná ichi cuahān ná, te cuacuyajni ná ñuu Damasco, te nájnūhun caxū cúu. Te ichi ándiví ní quiji ñn nduva ní ndindēé ndaxín núū ná. <sup>7</sup> Te ni cotúú-ni ná núū ñūhun, te ni jini sōho ná ñn jnūhun cáhán jíin ná: Saulo, Saulo, ¿najehe jíto xeēn rō ruhū? achí. <sup>8</sup> Yūcuán na te ni cahān ná: ¿Na nihín cúu jeē cahán, Tátā? achí ná. Te ni cahān yā jíin ná: Máá rí cúu Jesús jeē ní jehnu ñuu Nazaret, te jeē jíto xeēn rō ñayuu cá candíje i ruhū cúu jeē jíto xeēn rō ruhū, achí yá. <sup>9</sup> Te tēe cuangoo jíin ná ni cajini ndije de jeē ndindēé, te ni cayūhú de, te tu ní cájini sōho de ndese ni cahān yā jíin ná. <sup>10</sup> Yūcuán na te ni cahān ná: Tátā, ¿na vé cuní ni jéē sáha ná? achí ná. Te ni cahān maá Jítoho yō jíin ná: Ndocuñi te quihīn rō ñuu Damasco, te yūcuan íyó ñn tēe jeē cachi nuū rō na vé cúu jeē cánuú sáha ró, achí yá jíin ná. <sup>11</sup> Te jeē ní ndindēé un ní sacuaá núū ná, te tēe cuangoo jíin ná un ní cajni de ndaha ná cuángoo de jíin ná ní jinūcoo ná ndé ñuu Damasco.

12 'Te yūcuan ní condee ñn tēe nání Ananías, te tāca jnáhan yó hebreo yūcuan cácahān jeē tēe vāha cúu Ananías, chi vāha squícu de ley jeē ni jéhe ya nuū Moisés. 13 Te ni quee tēe un núū néne ná, te ni cahān de jíin ná: Hermano Saulo, na ndúndijin tinūu ní, achí de. Te ni ndundijin-ni tinūu ná, te ni jito ná núū de. 14 Te ni cahān Ananías: Máá Yāā Dios tāca jíi yō, je ni nacāji ya nihín návāha cuni ní na vé cuní yā jeē sáha ní, te coto ní núū maá Cristo, Yāā ndaā, te cuni sōho ni jnúhun jeē cahán yā. 15 Te nacani ní jnúhun ya nuū ndivii ñayuu tāca jéē ní jito ní jíin jéē ní jini sōho ní. 16 Ma cúhuun ni ni núu súcuan. Ndocuiñí ní, te cuandute ní te cahān ndahú ní jíin máá Jítóho yō, návāha nacate ya anuá ni núū cuéchi, achí de jíin ná.

*Jeē ní cachi Pablo ndese ni tají Yāā Dios de nuū ñáyuu tāca gá nación*

17 'Te ni nandió cóo na ní ndee ná ñuuu Jerusalén. Te jícan tahu na ini templo, te ni sáha máá Jítóho yō jeē ní jito ndijin ná. 18 Te ni jini na núū yā ni cahān yā jíin ná: Yachí quenda ró ñuuu Jerusalén yāhá, chi ma cuatáhú ñáyuu yáha jéē nácani ró jnúhun ri nuū i, achí yá. 19 Te ni cahān na jíin yá: Tuú, chi cuatáhú i, Tātā, chi je cájini i jeē ni quiví ná ndijnahan vehe ñi sinagoga ni jñi ná táca ñáyuu cácaandíje i níhín, te ni cani ná i, te ni chuhun ná i vecāa. 20 Te je cájini i jeē quiví ní cajehni i Esteban, tēe ni nacani cáji jnúhun ní, suni ni indichi na yūcuan, te ni jejnúhún ná jeē na cúu de, chi ni condito ná sahma tēe ni cajehni Esteban, achí ná jíin yá. 21 Te ni cahān yā jíin ná: Cuáhán, chi máá rí tají rí rohó quíhín jicá

ró nde nuū ñáyuu tācá nación jeē tu cájini i jnūhun ri, achí yá jíin ná. Achí Pablo.

*Jeē ni íne Pablo nuū general*

<sup>22</sup> Te tāca ñáyuu ún vāha-ni ni cajini sōho i te nde jnūhun sandīhi yáha jéē ní tají yá de nuū ñáyuu tāca gá nación. Yūcuán na te ni cacuvaā i, te ni cacahān jee i:

Na cúu tēe jíiná, chi tú vāha jeē cótecu gā de, achí i.

<sup>23</sup> Te súcuan cácana jee i, te ni cascándoó i ticāchí i, te ni cascánda i ticachā. Te súcuan cástéén i jeē cáquitī xeēn ni i. <sup>24</sup> Te ni ndacu general jniñu jeē na quívi Pablo ini cuartel, te ni cahān de jeē na stíchí soldado Pablo nde jíin cuarta ñi, návāha cujnúní ni general na síquī cúu jeē ní candonda ñayuu un síquī de. <sup>25</sup> Te ni cajihni de Pablo návāha súcuan te caní de. Te ni cahān Pablo jíin capitán jeē índichi tūhva:

¿A jéhe ley jnūhun jeē caní ní cuarta tēe cúu sēhe nación Roma núu ná tu sándaā ní núu íyó cuéchi de? achí de.

<sup>26</sup> Te ni jini sōho capitán jnūhun yáha, te ni jecahān jíin general:

Coto vāha ní jéē ma stívi ní sáha ní jíin tēe yáha, chi cúu de sēhe nación Roma, achí.

<sup>27</sup> Yūcuán na te ni jinū general nuū Pablo, te ni cajnūhún de:

Cachi núu jendaá cúu jeē séhe nación Roma cúu ró, achí.

Te ni cahān Pablo:

Suu cúu ndije ná, achí de.

<sup>28</sup> Te ni cahān general:



Ruhū chi nde jeē ni jéhe ri cuehē xūhún te ni nduu ri sēhe nación Roma, áchí.

Te ni cahān Pablo:

Te sãñá chi nde quivī ní cacu ná cúu ná séhe nación yō Roma, achí de.

<sup>29</sup> Yūcuán na te tãca tée jeē cáconi caní Pablo nuú, ni cacujiyo-ni cuango, te suni nde general ni yūhú de, chi ni stívi de jeē ní jihni de Pablo, chi tu iyó váha sáha súcuan jíin séhe nación Roma.

*Jeē ni índichi Pablo nuū junta cujéhnu ga jnáhan ñuu de hebreo*

<sup>30</sup> Te inga quivī un cúní general cundaā vāha ni de na siquī cúu jeē ní candonda tēe hebreo siquī Pablo. Te ni ndají de cadena jeē nuhní Pablo, te ni ndacu de jniñu ni cacutútú táca sūtū cácujeñnu jíin táca tēe cásaha junta cujéhnu ga, te ni quenehen de Pablo, te ni jeni de nuū tēe ni candutútú un.

## 23

<sup>1</sup> Yūcuán na te ni ndacoto Pablo nuū tēe ni candutútú junta un, te ni cahān de:

Tátā jijnáhan ní, ní ndé vijna vāha iyó ni anuá na jéé tú na cuēchi ná, jíto jínúū Yaā Dios, áchí de.

<sup>2</sup> Yūcuán na te Ananías, sutū cujéhnu ga, ni cahān jíin tēe cáhīn yajni nuū de jeē na cátu maá yuhu de.

<sup>3</sup> Te ni cahān Pablo jíin sūtū cujéhnu ga ún:

Yaā Dios stóho ya nihín chi tēe stáhú-ni cúu ní, chi néne ní jéé sándaā ni núu ni stívi ná ley yā, ¿te naun stívi máá ní ley jeē ndácu ní jniñu jeē cáni de sãñá? áchí de.

<sup>4</sup> Te ni cacahān tēe cáhīn nuū de ún:

¿Naun cáhán rō súcuan jíin sūtū cujéhnu ga? Chi nuū Yaā Dios jejniñu de, áchí jíin de.

<sup>5</sup> Te ni cahān Pablo:

Tátā jijnáhan ní, tu ní jíní na jéē sutú cujéhnū ga cúu de, chi núu ní jíní na te ma cahán na súcuan núú, chi yósó núú tútu ìi jeē ni cáhān yā jeē ma cahán neé yó coto yó táca téē cácujehnū nuū yō, áchí Pablo.

<sup>6</sup> Te nuū ní jini Pablo jeē sava de cácuu grupo saduceo te sava ga de cácuu grupo fariseo, te ni cahān jee de:

Tátā jijnáhan ní, máá ná cúu ìn jnáhan grupo fariseo, te suni súcuan ni ìyo tátá na. Chi suni máá ná ñúhun ni na jéē nastécu yā ndīyí, te síquī yúcuan cúu jeē cácahān ni cuéchi síquī ná, áchí de.

<sup>7</sup> Te jeē súcuan ni cahān de te ni cacusín ni tēe junta jeē cácuu grupo fariseo jín grupo saduceo, te ni cacahān ñihin. <sup>8</sup> Chi cácahān tēe grupo saduceo jeē ma nátecu ndīyí, ni tu cáhīyo ndajéhé yā ni ánuá, te tēe grupo fariseo cájejnúhún de ndínúní jnúhun yáha. <sup>9</sup> Te yōhyo ni cuvaā. Te sava tēe cástéén jnúhun cáhān tutu ley yā jeē cácuu jnáhan grupo fariseo, ni candocuiñí de, te ni cacahān de:

Tú ni ìn cuéchi cánihīn na síquī téē yáha. Sanaa te ni cahān ndije ìn ánuá jín de chí ìn ndajéhé yā. Ma sánīhni ni yō nuū Yaā Dios nuu súcuan, áchí.

<sup>10</sup> Te yōhyo ni catejnéhan, te yúhú general jeē quende i chiyō Pablo, te ni ndacu de jniñu jeē na quívi soldado te quenehen de Pablo sava mēhñú i, te na ndívi de ini cuartel.

<sup>11</sup> Te jecuáā un ní quee-ni máá Jítóho yō nuū de, te ni cahān yā jín de:

Pablo, cuandeyí ni rō, chi nájnūhun ni nacani ró jnúhun ri ini ñuu Jerusalén yāhá, suni súcuan nacani nahín ró jnúhun ri ini ñuu Roma, achí yá.

*Jeē ní casquíjnáhan jnūhun cahni Pablo*

<sup>12</sup> Te nuū ní cundijin te ni cacutútú sava ñayuu hebreo, te ni casquíjnáhan jnūhun, te ni cacahān teyí i jeē ma cáji cuiṭi i ni ñn ni ma cóho cuiṭi i nde núu tu cahni i Pablo. <sup>13</sup> Te víhyá gā uū xico tēe hebreo ni cacahān teyí jnúhun yáha. <sup>14</sup> Te ni jengoo nuū sutú cácujuhnu jíin núu tēe jénu cándiso jníñu nuū ñáyuu hebreo, te ni cacahān jíin tēe ún:

Ni cacahān teyí ná jeē ma cáji cuiṭi ná ni ñn níni nde ná tu cahni na Pablo. <sup>15</sup> Núu súcuan te máá ní jijnáhan ní jíin táca gá tēe cásaha junta cujénu ga, cuácáhān ni jíin general jeē quenehen de Pablo na jéé de nuū junta sajnē, chí cachi ni jéé cácuñi ni stíchí vāha ga ní de. Te máá ná jijnáhan ná cotūhva ná cahni ná de nde ná tu quee de nuū cáhīin tútú ní, achí.

<sup>16</sup> Te sēhe yí cuáha Pablo ni nihīn i jnūhun jeē súcuan ni cacahān, te ni jehēn i cuartel, te ni castūhún i nuū Pablo. <sup>17</sup> Te ni cana Pablo xinī ñn jnáhan capitán, te ni cahān de:

Condeca ní súchi yáha quíhīn ni jíin i nuū general, chí íyó ñn jnūhun castūhún i nuū de, achí de.

<sup>18</sup> Te capitán un ní jeca de i cuahān i jíin de nuū general, te ni cahān de:

Pablo, tēe íne vecāa, ni cana de sañá, te ni cahān de jíin ná jeē quíndeca ná súchi yáha núu ní, chí íyó ñn jnūhun cahān i jíin ní, achí de.

<sup>19</sup> Te ni jñi general ndaha i cuahān de jíin i ñn lado, te yuhu-ni ni cajnúhún de i:

Na jnūhun cúní rō cahān rō jíin rí, achí de.

<sup>20</sup> Te ni cahān i:

Tēe hebreo ni casquíjnáhan jnūhun de jeē cahān ndahú de jíin ní quenehen ní Pablo sajnē quíhīn de

nuū tāca tēe cásaha junta cujéhnua ga, chi cahān-ni de jíin ní jeē cácuini de jeē stichí vāha ga de Pablo. <sup>21</sup> Te ma cuáha ni jnúhun, chi víhyá gā uū xico de cándētu sáhí de ichi, te ni cacahān teyí de jeē ma cáji cuíti de ni ñn ni ma cóho cuíti de nde núu tú cahni de Pablo, te vijna je cándētu tūhva de jeē cuáha ni jnúhun quihīn Pablo nuū junta, áchí i.

<sup>22</sup> Te ni cahān general jíin i jeē ma cáchi i nuū ní ñn ñayuu jeē ni cáhān i jnúhun yáha jíin de, te ni tají de i cuanuhun i.

*Jeē ní tají general Pablo cuahān de nuū Félix, tēe cúu gobernador*

<sup>23</sup> Yūcuán na te ni cana general uū capitán de, te ni ndacu de jniñu jeē sátūhva de uū ciento soldado cájica jéhe jíin úní xico uxí jeē cáyōsó caballo jíin úu ciento jeē cándāha lanza, chi cahīn jecuáā ún quendacoo de jíin Pablo quingoo de nde ñuu Cesaarea. <sup>24</sup> Te suni ni ndacu de jniñu jeē coo tūhva caballo jeē cóso Pablo, te condito vāha soldado un Pablo quingoo de nde nuū Félix, tēe cúu gobernador. <sup>25</sup> Te ni tee de ñn carta jeē cahán jnúhun yáha:

<sup>26</sup> Máá ná cúu Claudio Lisias, te tēe ná carta yáha cuájeē nuū ní, señor Félix, gobernador cujéhnua. Ndeese tahū cúu ní. <sup>27</sup> Ñayuu hebreo ni cajñi i tēe yáha, te je yajni cahni i de núú, te ni jnama ná de jíin soldado, chi ni jini na jéē séhe nación Roma cúu de. <sup>28</sup> Te ni jendeca ná de nuū junta maá i jíjnáhan i jeē sándaā i núu na cuēchi ni sáha de. <sup>29</sup> Te ni jini na jéē siquí ley maá i cúu cuēchi cácahān i siquí de, te tu níhín na ni ñn cuēchi siquí de jeē cúu de ni jeē cóne de vecāa. <sup>30</sup> Te ni nihīn na jnúhun jeē sava tēe

hebreo ni casquíjnáhan jnūhun de jeē cahni de tēe yáha, te jeē yúcuan cúu jeē yachī ni tají ná de cuajeē de nuū ní. Te suni je ni cahān na jíin ñáyuu cájicān cuēchi siquī de jecoo i nuū ní, te jíinā cahān i jíin ní na cuēchi ni sáha de. Je ni cahān yō, achí carta.

<sup>31</sup> Te ni cajeca ñuú-ni soldado Pablo cuangoo jíin de nde ñuu Antípatris, nájnūhun ni tahū jniñu nuū de. <sup>32</sup> Te inga quiṽi ni canandió cóo-ni soldado cájica jéhé cuánungoo nde cuartel, te soldado cáyōsó caballo cuangoo de jíin Pablo. <sup>33</sup> Te ni jinūcoo ñuu Cesarea, te ni cachihí carta ndaha gobernador, te suni ni cajeni Pablo nuū de. <sup>34</sup> Te ni cahu gobernador carta un. Te ni cajnūhún de ndé ñuu cúu Pablo, te ni jini de jeē tēe ndañū Cilicia cúu Pablo. <sup>35</sup> Te ni cahān de:

Nde na quécōo tēe cájequin cuēchi siquī rō te cuni nahín rí jnūhun cahān rō, achí de.

Te ni cahān de jeē na quíndihyū Pablo ini palacio ndīyi Herodes.

*Jeē ni cáhān Pablo jehē maá de nuū Félix*

## 24

<sup>1</sup> Te nuū uhún quiṽi te Ananías, sutū kujéhnū ga, ni quee de ñuu ún. Te suni ni quecoo sava tēe jéhnū cándiso jniñu nuū jnáhan ñuu de hebreo jíin in tēe cúu abogado, nání de Tértulo. Te ni quiṽicoo de nuū gobernador jeē cahān de cuēchi siquī Pablo. <sup>2</sup> Te ni cana gobernador Pablo ni quee de. Te ni quejéé Tértulo cahán de cuēchi siquī Pablo, chi suhva ni cahān de jíin Félix:

Tátā gobernador, siquī jeē cúu ní tóhō jeē váha ndíchí ndácu ní jniñu, te jeē yúcuan tú na jnūhun

cájejnáhan íyó, chi cáyūcu váha yó. <sup>3</sup> Te na cútahū ná, chi tāca quíivī vāha cúu tāca núū ndácu ní jniñu jeē váha sáha ní, tátā Félix. <sup>4</sup> Te tu cúní na snáā na cuéhē tiempo ni, te cáhán ndahú ná jíin ní cuni nahín ní jecu-ni jnūhun cahān na jíin ní. <sup>5</sup> Chi ni cajini na tée yáha jéē cúu de ñn tēe tíxín, te sáha de jeē cánacuajnáhan máá jnáhan ñuu ná hebreo níí cáhnu-ni tāca lado, te cúu de tēe cújéhnū nuū ñáyuu cascuáha jnūhun tēe nání Jesús jeē ní jehnu ñuu Nazaret. <sup>6</sup> Te suni je ndúcú de jeē stívi de tācá jniñu ini templo iī, te ni cajni ná de. Te cácuni na sándaā na síquī de núú, nájnūhun cáhán ley ñuu ná. <sup>7</sup> Te ni jinū-ni general Lisias, te ni quende fuerza de tēe yáha núū na jíjnáhan ná. <sup>8</sup> Te ni ndacu de jniñu jeē tāca ná jeē cácahān na cuéchi síquī tēe yáha quijicoo ná ndé nuū ní. Te vijna cuu stíchí maá ní de, te jíin jnúhun cahān maá de te cuni ni jéē ni sáha de cuéchi jeē cácahān na jíin ní, áchí Tértulo.

<sup>9</sup> Te suni ni cacahān tēe hebreo jeē ni jínūcoo jíin de jeē iyó ndáā jeē súcuan cúu cuéchi Pablo. <sup>10</sup> Yūcuán na te ni sáha gobernador seña nuū Pablo jeē na cáhán de, te ni cahān Pablo:

Je jíiní na jéē cuehē cuiyā cúu ní gobernador ñuu yáha, te jeē yúcuan nújnahan ni na jéē sándaā ní síquī ná. <sup>11</sup> Chi máá ní cuu nanducú ní te cuni ni jéē sáá máá úxī uū quíivī ni cuu jeē ni jéhēn ná ñuu Jerusalén jeē chiñúhún ná Yaā Dios. <sup>12</sup> Te tu ní stáhān jnáhan ná jíin ni ñn ñáyuu, ni tu ní stóna ná ñáyuu ini templo ni ini vehe iī sinagoga ni ini maá ñuu. <sup>13</sup> Ni tú na jíin stéén de jeē iyó ndáā jnūhun cácahān de síquī ná. <sup>14</sup> Te jnūhun cáhán cají ná jíin ní cúu jeē chiñúhún ná Yaā Dios tāca jíí na, te suu

cúu jeē chiñúhún ná maá Jesucristo, te máá jnúhun yáha-ni cúu jeē cácahān de jeē stívī ná. Te cándíje ná táca jnúhun yósó núū tútu ley yā jíin núū tútu jeē ní catee tēe ni canacani jnúhun ya nde jengahán. <sup>15</sup> Te inuú ñúhun ni na jíin de jeē sáha Yaā Dios jeē nátecu tāca ndíyī, cúu ñayuu ní casáha vāha jíin ñáyuu ní casáha néé. <sup>16</sup> Te jeē yúcuan máni jeē vāha ndíhvī ni na sáha ná. Súcuan te vāha íyó ni anuá na jéé tú na cuēchi ndéé siquī na núū Yaā Dios ni nuū ñáyuu.

<sup>17</sup> Te ni jica cuu ná táca ñuu jicá jecu cuiyā, te sáá te ni ndee na jíin xúhun jéé ní cajēhe tāca ñáyuu jeē chindéé ñáhán i jnáhan ñuu na cáyūcú Jerusalén. Te suni ni ndee na jéé socó na quitī nuū Yaā Dios. <sup>18</sup> Te íne ná ini templo siquī jeē cuchi ná ndundoo ná núū Yaā Dios te socó ná. Te jecu jnáhan ñuu ná hebreo jeē véjicoo Asia ni cajito de sañá ini templo, te tú na ñayuu cuehē ni cóyūcu jíin ná jeē sávaā i. <sup>19</sup> Te núu ni stívī ná ¿te naun tu ní quíjicoo tēe Asia un návāha suni cahān de ndese ni stívī ná? <sup>20</sup> Chí téé ni quecoo yāhá na cáhán maá de núu na cuēchi ni canihīn de siquī na ná ni indichi na núū junta tēe cácujuhnu ini ñuu ná. <sup>21</sup> ¿Te chí cájequin de cuēchi siquī na jéé ni cáhán jee ná suhva ná ni íyo ná nuū junta naún? Chi ni achi na jéé cándíje ná jéé nátecu tāca ndíyī, te jeē yúcuan cájequin ni cuéchi siquī ná, ni achi na jíin de. Achí Pablo.

<sup>22</sup> Te Félix chi je jíiní vāha de ndese cácañdíje ñayuu Cristo. Te jeē ní jini sōho de jnúhun yáha te ni stétu de un jíinán, te ni cahān de:

Nde na quée general Lisias te cajnúhun gá rī siquī jniñu yáha, áchí de.

<sup>23</sup> Te ni ndacu de jniñu nuū capitán jeē na cóne ga

Pablo vecāa, te ma cásì jeē sáha de jeē cuní de, te ni ma cásì jeē quíjicoo jnáhan de jeē chindéé ñáhán i de.

<sup>24</sup> Te ni cuu jecu quiṽī, te ni quiji tucu Félix jíin ñasihí de Drusila, te ñahan hebrea cúu ña. Te ni ndacu de jniñu jeē na quiji Pablo návāha nacani de jnūhun ndese candíje yó Jesucristo. <sup>25</sup> Te ni cahān Pablo jíin de jeē cánuú sáha yó jniñu ndaā, te cánuú coto yó máá yó jeē ma sáha yó jniñu stívi, chi quiṽī sándihí te sándaā Yaā Dios jniñu ndivii ñayuu ndese ni casáha i. Te ni yūhu Félix te ni cahān de:

Vijna te cuáhán, te inga quiṽī jeē núne ri te cana ri rohó quiji ró, áchí de.

<sup>26</sup> Te ñúhun ni de jeē cuāha Pablo xūhun núū de te siáá de quenda de vecāa. Jeē yúcuan tijni jínu ni cana de Pablo ni candajnūhún de. <sup>27</sup> Te súcuan ni cuu uū cuiyā, te sáa te ni nucuñi Porcio Festo nuū Félix. Te cúní Félix jeē na cúsiñ ni ñayuu hebreo jíin de, te jeē yúcuan ní squéndōo de Pablo vecāa.

### *Jeē ni índichi Pablo nuū Festo*

## 25

<sup>1</sup> Te sáá únī quiṽī jeē ni quiṽī Festo cuu de gobernador Judea, te ni quenda de ñuu Cesarea cuahān de ñuu Jerusalén. <sup>2</sup> Te tāca sūtū cácujuhnu jíin tée cácujuhnu nuū ñáyuu hebreo ni jinūcoo nuū Festo, te ni cajicān cuēchi siquī Pablo. <sup>3</sup> Te ni cacahān ndahú jíin Festo jeē núu vāha ni de te na nátají de Pablo ndiji ñuu Jerusalén. Súcuan ni cacahān, chi je ni casquíjnáhan jnūhun jeē cahni Pablo ichi. <sup>4</sup> Te ni cahān Festo jeē yíndesi vāha Pablo nde ñuu Cesarea, te je jéni ni de jeē jecu na quiṽī te nuhūn



maá de ñuu Cesarea. <sup>5</sup> Te jeē yúcuan ní cahān de jíin táca téé ún:

Tāca níhín jeē cándiso jníñu, na quíngoo yó nde Cesarea, te yúcuan cácan ni cuēchi síquī de te núu íyó cuēchi de, áchí de.

<sup>6</sup> Te ni ine de yúcuan únā chí úxī-ni quivī, te ni ndee de ñuu Cesarea, te inga quivī ni cucōo de mesa nuū sándaā de jniñu, te ni cahān de jeē na quíji Pablo. <sup>7</sup> Te je cáhīn tēe hebreo jeē ní quijicoo nde ñuu Jerusalén. Te ni quee Pablo, te ni cajicó ndūū nuū de, te ni caquejéé-ni casájnúhún téyí síquī de, te tú na jíin ní cástéén jeē iyó ndāā jnūhun cácahān.

<sup>8</sup> Te ni cahān Pablo jehē maá de:

Tu ní sáha ná ni ñn cuēchi síquī ley ñuu na jéé cácuu ná ñayuu hebreo, ni síquī templo, ni síquī rey nación Roma, achí de.

<sup>9</sup> Te Festo chi cúní de jeē cusī ni ñayuu hebreo jíin de, te ni cajnūhún de Pablo:

¿A tu cúní rō quínuhun rō Jerusalén te yúcuan sándaā rī síquī rō? achí de.

<sup>10</sup> Te ni cahān Pablo:

Je índichi na núū cúndaā jniñu jeē ndácu máá téé cúu rey nación Roma, te yāha cúu nuū cánuú cundaā jniñu ná. Máá ní je jíiní vāha ni jéé tú na cuēchi ní sáha ná síquī tāca jnáhan ñuu ná hebreo.

<sup>11</sup> Chi núu ni sáha ná ñn cuēchi xeēn jeē jíiní ñúhún cuu ná, te íyó váha jeē cúū na núu súcuan. Te núu tu íyó ndāā jnūhun jeē casájnúhún téé yáha síquī ná, te ni ñn tēe ma cúu chihí de sñá ndaha tēe yáha jíjnáhan de. Núu súcuan te cúní na quíhīn na núū maá rey nación Roma sándaā de síquī na, achí de.

<sup>12</sup> Te ni cajnūhun Festo ndese cájeni ni tēe cándiso jniñu jíin de. Yūcuán na te ni cahān de jíin Pablo:

Je ni cahān rō jeē cuní rō quihīn rō nuū maá rey nación Roma sándaā de siquī rō. Núu súcuan te quihīn nahín ró nuū de, áchí de.

*Jeē ni índichi Pablo nuū rey Agripa*

<sup>13</sup> Te ni cuu jecu quiṽī, te rey Agripa jíin Berenice ni jecondēhé de Festo nde ñuu Cesarea. <sup>14</sup> Te tijni quiṽī ni coyūcú de yūcuán. Te ni nacani Festo jñūhun siquī Pablo nuū rey un. Te suhva ni cahān de:

Félix jeē ní cuu de gobernador, ni stóo de ñn tēe íne vecāa yāhá. <sup>15</sup> Te ná ni jehēn ná ñuu Jerusalén, te sutū cácujuhnu jíin ñáyuu jéhu cándiso jníñu nuū ñáyuu hebreo ni jinūcoo i nuū na cájequin i cuēchi siquī tēe ún, te cácuñi i jeē na cúu de. <sup>16</sup> Te ni cahān na jíin i jeē tu íyó costumbre tāca tóhō Roma jeē cahni de ñn tēe súcuan-ni, chi jíni ññuhún condichi de jíin ñáyuu cájequin cuēchi siquī de, návāha cahān de jehē maá de te cundaā núu íyó cuēchi de. <sup>17</sup> Yūcuán na te ni quecoo tūtú i yāhá. Te inga quiṽī ún tu ní cúcuéé ná, chi ni cucōo na mesa nuū sándaā na siquī cuēchi, te ni ndacu ná jniñu jeē na quíji tēe ún. <sup>18</sup> Te cáhīn ñayuu cájequin cuēchi siquī de. Te ni jeni ni na jēe íyó cuēchi xeēn cahān de siquī tēe un núu, te tú cuítí. <sup>19</sup> Chi jeē cácahān de cúu máni siquī jñūhun cácuñije-ni máá de, jíin siquī ñn tēe nání Jesús jeē jé ni jihī de, te Pablo cahán ñihin de jeē ní natecu ndije tēe ún. <sup>20</sup> Te tu ní cújnúní cuítí ni ná ndese sándaā ná, te ni cajñūhun ná de núu cuní de quihīn de ñuu Jerusalén te yūcuán cundaā siquī de. <sup>21</sup> Te máá Pablo ni cahān de jeē cuní de quihīn de nuū Augusto, rey yō nación Roma, te yūcuan sándaā rey

cuēchi de, ni achi de. Te ni cahān na jēē na cōne de vecāa nde tají ná de quihīn de nuū rey un, áchí Festo.

<sup>22</sup> Yūcuán na te ni cahān Agripa jíin Festo:

Suni cúní maá ná cuni sōho ná jēē cahán tēe un, áchí de.

Te ni cahān Festo:

Sajnē te cuni sōho ní jēē cahán de núu súcuan, áchí de.

<sup>23</sup> Te inga quivī un ní quecoo Agripa jíin Berenice. Te cáñuhun de sahma cújéhnū de, ni quivīcoo de ini vehe juzgado jíin táca general jíin tée cácujuhū ini ñuu ún. Te ni ndacu Festo jniñu jeē na quíji Pablo. <sup>24</sup> Te ni cahān Festo:

Cahán na jíin ní, tátā rey Agripa, jíin ndihī níhín jēē cáyūcu jíin yó yāhá vijna. Yāha cúu tēe jeē síquī de ni candonda ndivii jnāhan de hebreo ñuu Jerusalén jíin ndé ñuu Cesarea yāhá, te máni cácahān i jeē tú vāha jeē cótecu gā de. <sup>25</sup> Te jéni ni maá ná jēē tú na cuēchi xeēn ni sáha de jeē cúu de. Te je ni cahān de jeē cuní de quihīn de nuū rey Augusto jeē sándaā rey un síquī de, te jeē yúcuan ní cahān na jēē tají ná de quihīn de nuū rey un. <sup>26</sup> Te tu cúcáhnū ni ná na jnūhun tee ná núu tútu quihīn jíin de nuū rey yō. Jeē yúcuan ní ndacu ná jniñu ni quee de nuū yō jijnāhan yó, te cánuú gá nuū maá ní, tátā rey Agripa. Te stíchí ni de návāha nihīn na jnúhun tee ná síquī de, te quihīn jnūhun un jíin de nuū rey. <sup>27</sup> Chi tu jéjniñu cuiñi jeē tají ná ñn preso quihīn te núu tú castūhun ná nuū tútu na cuēchi ni sáha de, áchí Festo.

*Jeē ni cáhān Pablo jehē maá de nuū rey Agripa*

## 26

<sup>1</sup> Yūcuán na te ni cahān rey Agripa jíin Pablo:

Vijna te jéhe ri jnūhun cahān rō jehē maá ró, achí de.

Te Pablo ni sáha de ndaha de jeē ní quejéé de cáhán de, te suhva ni cahān de:

<sup>2</sup> Tātā rey Agripa, cúsiñ ni ná vijna jeē cúu cahān na jíin ní siquī ndīhi jeē casájnúhún ñayuu ñuu yō hebreo siquī ná. <sup>3</sup> Chi je jíiní vāha máá ní tāca jéé ní tajnúni ñayuu ñuu yō hebreo jíin táca jnūhun jeē tu cáhīn inuú i jíin. Jeē yúcuan cáhán ndahú ná jíin ní jeē coo paciencia ni cuni sōho ní jnūhun cahān na jíin ní.

*Jeē ní cachi Pablo ndese ni sáha de nde ná tu sama ya ini de*

<sup>4</sup> 'Je cájini tāca jnáhan ñuu yō hebreo ndese ni sáha ná ini ñuu nuū ní cacu ná jíin ini ñuu Jerusalén nde ná lulí ná. <sup>5</sup> Te núu cácuni maá de cahān ndaā de, te je cájini de sãña jéé ndé lulí ná ni quiví ná nuū grupo fariseo, te grupo un ñihin ga cánducú ndéyí de squícu de ley yā vēsú tāca gá grupo tēe nación yō. <sup>6</sup> Te ñūhun ni na jnūhun ni jejnūhun Yaā Dios nuū tāca jíi yō jeē nastécu yā ndīyí, te máá síquī tāca jnūhun yáha-ni cúu jeē cájequin de cuēchi siquī ná. <sup>7</sup> Chi máá yó jeē cácuu yó jnáhan ndihúxí uū yucūn ñayuu Israel, cáñūhun ni yō jnūhun ni jejnūhun ya jeē nastécu yā ndīyí, te jeē yúcuan nduú ñuú cáchiñúhún yó Yaā Dios te cájéñíñu yó núu yā. Te suni súcuan ñūhun ni maá ná, tātā rey Agripa, te siquī jeē nácani ná jnūhun jeē natecu ndīyí cúu jeē cájicān jnáhan ñuu yō hebreo cuēchi siquī ná. <sup>8</sup> ¿Te chí má nastécu Yaā Dios tāca ndīyí cájeni ni ní naún?

*Jeē ní cachi Pablo ndese ni jito xeēn de ñayuu cá candíje*

<sup>9</sup> Te máá ná chi ni jeni ni na jéē jíni ñúhún ndonda ná síquī ñayuu cá candíje i Jesús, Yaā ní jehnu ñuu Nazaret. <sup>10</sup> Te súcuan ni sáha ná ini ñuu Jerusalén, chi tāca sūtū cá cujéhnu ni cajēhe de jnūhun jeē cóndiso jníñu ná chuhun ná cuéhē ñayuu vecāa síquī jeē cá candíje i Jesús, te íyó váha ni na núu cájehni de i. <sup>11</sup> Te tíjini jínu ni sáha ndevāha na jíin i ini tācá vehe īi sinagoga jeē ni sáha fuerza na i jeē na stóo i jnūhun cá candíje i. Te xeēn ni quitī ni na núu i, chi nde ñuu jicá ní jehēn ná ni sáha xeēn na jíin i.

*Jeē ní cachi tucu Pablo ndese ni sama ya ini de (Hch. 9.1-19; 22.6-16)*

<sup>12</sup> Te sutū cá cujéhnu ni cajēhe de jnūhun jeē cóndiso jníñu ná quíhīn na sáha xeēn na jíin ñáyuu cá candíje cá yūcú ñuu Damasco nuú. <sup>13</sup> Te cuahān ná ichi ún, tátā rey, te caxū cúu, te ichi ándiví ní quiji ñn nduva ni ndindēé ndaxín núu na jíin núu téé cuangoo jíin ná, te víhyá gā ndíi vēsú niāndii. <sup>14</sup> Te ndihī ná ní cacotúú ná nuū ñúhún. Te ni jini sōho ná ñn jnūhun ni cahān jíin ná jíin jnúhun yuhu yó hebreo: Saulo, Saulo, ¿najahē jito xeēn rō ruhū? Chi jeē sáha ró súcuan cúu nájnūhun stiquī jeē tu jéndije tí, te jéñú yatá tí xinī pulla, te súcuan stóho tí maá tí, áchí. <sup>15</sup> Yūcuán na te ni cahān ná: ¿Na nihín cúu jeē cahán, Tátā? achí ná. Te máá Jítoho na ní cahān yā jíin ná: Máá rí cúu Jesús, te jeē jito xeēn rō ñayuu cá candíje i ruhū cúu jeē jito xeēn rō ruhū. <sup>16</sup> Ndonda condichi rō, chi vēji ri nuū rō jeē tejníñu ri rohó sáha ró jniñu cúni rī, te nacani cájí ró jnūhun

tāca jéē ní jito ró vijna, jíin jéē steén gā rī nuū rō tāca quíivī quíji. <sup>17</sup> Te jnama ri rohó núū tāca jnáhan ñuu rō jíin núū ñáyuu tāca gá nación, chi nuū ñáyuu un tájí rí rohó quíhīn rō. <sup>18</sup> Te tájí rí rohó quíhīn rō nuū i, chi nájnūhun nanune ró tñnūú i cúu jeē steén rō jnūhun ri nuū i te jecūhun ni i. Chi ñáyuu ná tu candíje i ruhū, nájnūhun cájica i nuū néē. Te jeē candíje i ruhū, quíivī i nuū luz rī, te tuá quíhī i chíji jniñu jeē cuní jexeén jeē cúu Satanás, chi sa suhva quíhī i chíji jniñu cúní maá rí. Te tájí rí rohó quíhīn rō nuū i, návāha candíje i ruhū te cone cáhnu ni rī nuū cuéchi i. Yūcuán na te inuú níhīn tahú i jíin táca gá ñáyuu jeē ni sándoo ri anuá i, áchí yá jíin ná.

*Jeē ní cachi Pablo ndese ni jetáhú de jnūhun ni cahānyā*

<sup>19</sup> Jeē yúcuán tu ní sánīhni ni na núū jnúhun ni cahān yā ichi ándiví jíin ná, tátā rey Agripa. <sup>20</sup> Chi ni jetáhú ná, te ni nacani ná jnúhun ya xīhna gā nuū ñáyuu ñuu Damasco, te sáá te ni nacani ná jnúhun ya nuū ñáyuu ñuu Jerusalén jíin ní región Judea jíin núū ñáyuu tāca gá nación. Te jnūhun ni nacani ná núú i cúu jeē na nácani ni i jeē stóo i cuéchi i te nasāma ini i sáha Yaā Dios, te na sáha i jniñu váha jeē steén jeē ní nasāma ini i. <sup>21</sup> Te siquī jeē súcuán ni nacani ná jnúhun te ni cajni# jnáhan ñuu yō hebreo sāñá ini templo, te ni cacuni i cahni i sāña núú. <sup>22</sup> Te ni chindéé ñáhán Yáā Dios sāñá, te jeē yúcuán índichi níhin na ndé vijna nácani cájí ná jnūhun ya nuū ñáyuu cácujeñhu jíin núū tācá-ni ñáyuu. Chi tu chíso gá na jnúhun siquī jnúhun jeē ní nacani Moisés jíin táca gá tēe ni canacani jnūhun Yaā Dios nde jenahán. <sup>23</sup> Te ni cundaā jnūhun ni canacani

de un jēē cánuú ndoho Cristo nde cuu yā, te xīhna gā maá yá natecu vēsú tāca gá ndīyī, te súcuan stéén cají yá nuū ñáyuu jeē jnáma ya i, cúu ñayuu nación yō Israel jíin ñáyuu tāca gá nación, áchí Pablo.

*Jeē ní nducú ndéyí Pablo scandíje de Agripa jnūhun Jesús*

<sup>24</sup> Te súcuan ni cahān Pablo jehē maá de, te ni cahān jee Festo:

Ni nduloco rō, Pablo. Siqūī jeē ni scuáha ndasí ró te jeē yúcuan ní tīvī xínī rō, áchí de.

<sup>25</sup> Te ni cahān Pablo:

Tu ní tīvī xínī na, tátā Festo, chi sa suhva íyó cájí ndāā jnūhun cáhán na. <sup>26</sup> Te máá rey Agripa je jíiní vāha de tācá jniñu ní íyo jeē ní nacani ná, te tu yúhú ná cahān na tāca jnūhun yáha, chi je jíiní vāha na jēē jíiní de tāca jnūhun yáha, chi tú sāhi ní cúu tācá jniñu yáha. <sup>27</sup> Tátā rey Agripa, ¿á cándíje ní jnūhun jeē ní cacahān tēe ni canacani jnūhun ya nde jenahán? Jéni ni na jēē candíje ní, áchí Pablo.

<sup>28</sup> Yūcuán na te ni cahān Agripa jíin Pablo:

Va jéni ni rō jeē jíin jecu jnūhun ni cahān rō te sāha ró jeē candíje ri Cristo, achí de.

<sup>29</sup> Te ni cahān Pablo:

Vēsú jíin jecu-ni jnūhun chí jíin cuéhē, te jíicán tahu na jēē maá ní jíin táca gá tēe cájini sōho jnūhun cáhán na vijna, na cándíje ní nájñūhun cándíje máá ná, te tu cúní na jēē cónuhnī ni nájñūhun núhnī na.

<sup>30</sup> Te ni ndīhi ni cahān Pablo tāca jnūhun yáha. Te ni ndocuñī rey jíin gobernador jíin Berenice jíin táca gá tēe cácujuhnu cáyūcu jíin de. <sup>31</sup> Te ni cacujiyo de, te ni candajñūhun sīn máá de:

Tú ni ñin cuēchi ní sáha tēe yáha jēe cúu de ni jeē cóne ga de vecāa.

<sup>32</sup> Te ni cahān Agripa jíin Festo:

Cuu siáá ni tēe yáha núu jeē tu ní cáhán maá de jeē quihín de nde nuū rey yō nación Roma nuū, áhí de.

*Jeē ní catají de Pablo cuahān de ñuu Roma*

## 27

<sup>1</sup> Te ni cundaā jeē quihín Pablo jíin barco nde Italia, te suni quingoo ná jíin de. Te Pablo jíin sava ga tēe cáhīn vecāa ni quivicoo de ndaha ñin capitán naní Julio jeē quíndēca de tēe un ndé Italia. Te Julio cúu ñin jnáhan grupo soldado naní Augusto.

<sup>2</sup> Te nde ñuu Adramitio nuū cájecuññi barco ni quenda ñin barco ni quee, te ni quivicoo ná, te quihín barco un táca ñuu jeē yíhi chíji Asia jeē yúcu yumar. Te suni cuahān Aristarco jíin ná, te máá de cúu tēe ñuu Tesalónica región Macedonia. <sup>3</sup> Te inga quiví ni jinūcoo ná ñuu Sidón nuū cájecuññi barco. Te Julio ni cundáhú ni de Pablo, te ni jēhe de jñuhun ni jecondēhe Pablo tācá amigo de, te ni cachindéé ñáhán i de. <sup>4</sup> Te ñuu yúcuán ní quenda barco cuahān jíin ná. Te siquī jeē níhin yíhi tachí te tu ní cúu quihín yohó barco, te ni tee xín barco cuahān jíin ná xiin isla Chipre, ñuhun jeē íne sín nuū ndúte, te lado jecó barco ni quendōo Chipre.

<sup>5</sup> Te ni cayāha ná yumar Cilicia jíin Panfilia cuahān ná, te ni jinūcoo ná ñuu Mira ndañū Licia.

<sup>6</sup> Te ñuu yúcuán ní nihín capitán ñin barco jeē véji ñuu Alejandría te quihín ichi Italia, te ni cahān de jíin ná ni quivicoo ná barco un. <sup>7</sup> Te cuehē quiví ni



cahīn na núū ndúte jíin barco, chi cuéé ní jica, te fuerza-ni ni jinūcoo ná yuñúū Gnido. Te tuá ni jéhe tachī un jnúhun quihīn yohó barco, te ni cayāha ná núū jnúhma tachī xiin ñúū Salmón jeē íne nuū isla Creta. <sup>8</sup> Te yōhyo ni canducú ndéyí tée cáscáca barco un, ní yāha jíin ná ñí yumar xiin Creta. Te ni jinūcoo ná ñin lugar naní Buenos Puertos nuū cájecuiñī barco, te yajni un íne ñuu Lasea.

<sup>9</sup> Te je ni cuu cuehē quivī ni cajica ná jíin barco. Te je yajni quejéé vico míjin, te yūcuan cúu tiempo jeē yí jíca barco te sanaa te coo jnūndóho nuū mar. Te ni cahān ñihin Pablo jíin de:

<sup>10</sup> Tātā jijnáhan ní, jíiní na jéē yóhyo yí coo viaje yáha, te quiji jnūndóho siquī barco, te naa barco jíin ndajníñu, te nde maá yó sanaa te cuu yō, achí de.

<sup>11</sup> Te tu ní chúsóhó capitán jeē cahán Pablo, chi sa suhva jeē cahán tée scáca barco un jíin tée chíi barco. <sup>12</sup> Te siquī jeē tu íyó váha lugar nuū ni jécuiñī barco un jéē cóyūcú de ñí vico míjin, te ni cajeni ni cuehē gā de jeē vāha ga núu quendacoo de yūcuán. Chi cájeni ni de jeē núu cuu te jinūcoo de ñuu Fenice te yūcuán coyūcú de vico míjin. Chi Fenice suni íne yundúte isla Creta nuū cájecuiñī barco, te ndijin ichi noroeste jíin suroeste.

*Jeē ni jéquīhi ñin tachī ñihin jeē stónnda ndute mar*

<sup>13</sup> Te ni jequīhi vīta táchī ichi sur, te ni cajeni ni de jeē jinú de Fenice nuú, te ni cascáca ga de barco jíca jíin de xiin Creta. <sup>14</sup> Te ni cunúu jecu gā, te ni quejéé-ni ñin tachī ñihin ndasí jeē naní táchī nordeste. <sup>15</sup> Te tuá ni cúu ga quihīn yohó barco, chi ni chundahá-ni tachī cuahān jíin, te ni casiáá-ni de jeē cascáca de, te cháha chúcuan cuahān barco

jíin ndihi ná sáha tachī. <sup>16</sup> Te ni yāha jíin ná xiin isla lulí jeē naní Clauda, nuū jnúhma tachī. Te vēsú súcuan te yōhyo uhū ni cascáa ná barco lulí jeē ndiquín yatā barco cáhnu. <sup>17</sup> Te ni casquívī ná ini barco cáhnu. Te ni casucun núu de barco cáhnu jíin yoho. Te cáyūhú de jeē quihín barco nuū yaxín ndute nuū naní Sirte te jnī nuū ñíti, te jeē yúcuan ní casnúu de sahma cóquin jeē stechí te jíca barco. Te ni casiáa de jeē na quihín ndé chi chúndahá táchī. <sup>18</sup> Te tu jécuiñī cuiti jeē yáhi tachī níhin. Te inga quivī un ní caquejéé de cájete de ndajníñu ndíso barco, návāha nduñama gā barco te ma quée chíji ndute. <sup>19</sup> Te quivī uní ni cajēhe núu ná ndaha ni cajete ná máa ndajníñu jéjníñu barco. <sup>20</sup> Te cuehē quivī tu ní cájito ná níandii ni quimi siquī jeē ín vicō, ni tu jécuiñī cuiti tachī níhin ún, te tuá cáñūhun ni na cácu ná.

<sup>21</sup> Te ni cuu quivī jeē tuá cáyeji cuiti na stáa. Te ni jecondichi Pablo sava mēhñu téé ún, te ni cahān de:

Tátā jijnáhan ní, núu ní cájetáhú ní jnūhun jeē ni cahān ná te ma quéndacoo yó Creta nuú, te ni ma cóto yó jnúndóho yáha ni ma náa ndajníñu núu. <sup>22</sup> Te vijna cáhán níhin na jíin ní jeē cuandeyí ni ni jijnáhan ní, chi ni ñn ní má cúu ní, vēsú naa barco. <sup>23</sup> Chi jeē cúni ni quiji ñn ndajéhé jeē ní tají máa Yáa Dios nuū ná. Chi máa yá cúu Jitoho ná, te jéjníñu ná núu yā. <sup>24</sup> Te ndajéhé yā ún suhva ni cahān yā jíin ná: Pablo, ma yūhu ró, chi vāha-ni jinū rō nuū rey nación Roma, te jeē siquí rohó te sáha Yaā Dios jeē cácu ndihi téé cáhīn jíin ró ini barco yāhá, áchí yá jíin ná. <sup>25</sup> Tátā jijnáhan ní, ma yūhu ní núu súcuan, chi máa ná cúcáhnu ni na Yáa Dios jeē coo nájñūhun

ni cahān ndajéhé yā jíin ná. <sup>26</sup> Te jinū nahín yó ñn isla, te ma jinú yachī yō nuū quíngoo yó, áchí de.

<sup>27</sup> Te ni cuu uxī cuūn jecuáā nde jeē ní quejéé táchī, te jíca barco nuū mar Adria, te cháha chúcuan cuahān barco sáha tachī. Te máá jecuáā ún te jeē ní cuu sava ñuú te cájeni ni tēe cáscáca barco jeē jé cuacuyajni jinū barco ñuhun íchi. <sup>28</sup> Te ni casínga de ñn jeē cáchicuāhá de nasaa cúnú ndute, te ni cajini de jeē iyó ócō xahūn ñn metro. Te ni jica barco jecu gā te ni casínga tucu de, te ni cajini de jeē iyó ócō uxā na metro. <sup>29</sup> Te cáyūhú de jeē jécujnáhan barco jíin toto, te ni cajihni de cuūn cāa gancho náhnu yatā barco un, te ni cascáne de nde jehē ndúte návāha chituu te jecuññi barco. Te yōhyo jnāā de jeē na cúndijin yachī. <sup>30</sup> Te tēe cáscáca barco un ní canducú de cunu de quíngoo de jíin barco lulí te cācu de nuū jnúndóho quiiji siquī barco cáhnu núú. Jeē yúcuan ní casnúu de barco lulí un núū ndúte, te cásáha-ni de nájñuhun jeē snúu de ینگa cāa gancho ichi núú barco návāha tú cuni ñayuu jeē cácuni de cunu de quíngoo de. <sup>31</sup> Te ni cahān Pablo jíin capitán jíin táca soldado:

Núu tú coyūcu tēe yáha ini barco cáhnu jíin yó, te ma cácu cuiṭi maá ní jijnáhan ní, áchí de.

<sup>32</sup> Yūcuán na te soldado ni cajehnde de yoho núhni barco lulí, te ni jneni-ni cuahān.

<sup>33</sup> Te nuū cuácundijin te ni cahān Pablo jíin táca tēe un jeē na cáji de staā. Te suhva ni cahān de:

Vijna íyó úxī cuūn quiṽi jeē cándito ní te tu cáyeji cuiṭi ni stáā. <sup>34</sup> Te cáhán ndahú ná jíin ní jeē na cáji ni stáā, návāha nanihñn ni ní te cācu ní, chi ni ñn yó má cúū, ni ma tují cuiṭi yō, achí de.

<sup>35</sup> Te ni ndihî ni cahān de jnūhun yáha, te ni quihin de ñn staā, te mēhñu táca ñáyuu un ní nacu-atáhú de nuū Yaā Dios, te ni tahú sáva de staā ún, te ni quejéé de yéji de. <sup>36</sup> Yūcuán na te ni candusî ni ndihî de, te suni ni cayeji de staā. <sup>37</sup> Te ndivii na jéē cáñūhun ná ini barco cúu uū ciento unî xico xahūn ñn ná. <sup>38</sup> Te ni cayeji vāha ndihî ná. Yūcuán na te ni cajete de trigo cuahān nuū ndúte un, návāha na ndúñama gā barco.

### *Jeē ni quée barco chîji ndute*

<sup>39</sup> Te nuū ní cundijin te ni cajito de ñuhun, te tu ní cánacuni de ndé nuū cúu. Te ni cajito de nuū íne cuñî ndute, te suni máá ñîti cúu, te cájeni ni de jinū de yūcuan jín barco núu na cúu núú. <sup>40</sup> Te ni cajehnde de yoho núhni cāa gancho yūcuan, te ni caquendōo cāa un núú mar. Te ni canandají de yujnu jeē scotú chíi barco, te ni nacata caa de sahma cóquin ichi núú návāha chundahá táchî barco, te ni quejéé caca quihî jín de ichi núú iyó ñîti. <sup>41</sup> Te ni jinū barco nuú níhin náquijnáhan ndute. Te ni quée barco nuū ñîti ñūhun chîji ndute, te ni jnî-ni ichi núú te tuá ni jíca cuiti, te yatā barco un ní cahya-ni jeē níhin ni cani suhmā ndute mar. <sup>42</sup> Yūcuán na te ni candajnūhún soldado jeē cáhni de táca preso návāha ma sūte i te cunu i quingoo i. <sup>43</sup> Te cúni capitán un jéē cācu Pablo, te ni jesicoo de. Chi sa ni cahān de núu ndé ñáyuu jinî sūtē te xîhna gā i na núngoo i sūtē i nuū ndúte, te na quénda-ni i quihî i nuū ñūhun íchi. <sup>44</sup> Te suni sūcuan na quécoo ndihî i quihî i, sava i coso candá i jín yujnu cúnu te sava ga i jín pedazo yujnu barco. Te sūcuan ni cacācu ndihî ná ní jinūcoo ná ñuhun íchi.

*Jeē ni íne Pablo isla Malta***28**

<sup>1</sup> Te nuū ní cacācu ná te ñayuu cáyūcu yúcuan ní cacachi i nuū na jéē isla un nání Malta. <sup>2</sup> Te ñayuu un ní cacundáhú ni i sãña jíjnáhan ná, te ni cascáyú i ñn ñuhūn cáhnu, te ni cacahān i jíin ná jeē nasaā ná, chi mījin sáha jeē cúun saū. <sup>3</sup> Te ni stutú Pablo jecu tujnu íchi. Te jeē jnāā de tujnu un núū ñuhún te ñn coō xeén jínu tī ni quenda tī tujnu un jéē ní cujihní, te ni chiyuhú-ni tī ndaha de. <sup>4</sup> Te ñayuu cáyūcu yúcuan ní cajito i jeē ndíta caa coō un yíyuhú tī ndaha de, te ni cacahān i:

Tēe yáha vā sanaa te ni jehni de ndīyī núu súcuan, te vēsú je ni cācu de nuū mar, te máá yāā sándaā jniñu ñayuu tu jéhe ga yā jnūhun jeē cótecu de, áchí i.

<sup>5</sup> Te ni caja Pablo ndaha de, te ni ñinga coō un núū ñuhún, te tú na vé ni ndóho de. <sup>6</sup> Te cándētu tāca ñayuu jeē chūhun i cuiñi de chí cotúú-ni de te cuu de. Te ni cunahán téyī cándētu i, te ni cajito i jeē tú na vé ni ndóho de. Yūcuán na te ni nasāma cájeni ni i, te ni cacahān i jeē ñn yaā cúu Pablo.

<sup>7</sup> Te yajni yūcuan íyó ñuhun tēe cújéhnu ga Malta un, nání de Publio. Te ni cana tēe un sãña jíjnáhan ná, te ni jēhe núu de vehe de ni coyūcu ná jíin de unī quivī, te ni jito yúcún de sãñá. <sup>8</sup> Te tátá Publio cáa de, chi ndóho de cuehyī quīji jíin cuéhyī niñī. Te ni jecondēhe Pablo tēe ún, te ni jicān tahu de te ni soó de ndaha de siquī tēe ún, te ni nduvāha-ni de. <sup>9</sup> Yūcuán na te ni quijicoo ndihī ga ñayuu cácuñū yūcuán, te suni súcuan ni canduvāha-ni i. <sup>10</sup> Te ñayuu un ní cajēhe i cuehē ndajniñu ni cacutahū

ná. Te nuū ni jínū quiṽī jeē quíngoo tucu ná jín barco, te ni cajēhe i tācá ndajniñu cuu ná ichi.

### *Jeē ni jínū Pablo ñuu Roma*

<sup>11</sup> Te unī yoō ni coyūcu ná Malta. Te ñn barco jeē véji ñuu Alejandría ni ine Malta ní vico míjin, te ichi núú barco un ndéé uū figura ídolo ñuu de nání Cástor jíin Pólux. Te ni quiṽicoo ná barco un cuángoo ná. <sup>12</sup> Te ni jinūcoo ná ñuu Siracusa, te yūcuan ní coyūcu ná unī quiṽī. <sup>13</sup> Te ni quenda barco cuahān jíin ná nduu nduu yundúte, te ni jinūcoo ná ñuu Regio. Te inga quiṽī ún vāha ni quiji tachī ichi sur, te ni quendacoo ná ñuu Regio, te uū quiṽī te ni jinūcoo ná ñuu Puteoli. <sup>14</sup> Te yūcuan ní caquijnáhan ná jíin jecu hermano cá candíje, te ni cacana de sāña ní coyūcu ná jíin de ñn semana. Yūcuán na te ni quendacoo ná jēē quihīn ná ñuu Roma. <sup>15</sup> Te hermano cáyūcú ini ñuu Roma, je ni canihīn de jnūhun jeē jinúcoo ná, te ni quendacoo de, te sava de ni caquijnahan de sāña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jíinahan de, te ni nacuatáhú de nuū Yaā Dios, te ni ndundeyí ni de. <sup>16</sup> Te sáa te ni jinūcoo ná ini ñuu Roma, te capitán ni squívi de tāca preso ndaha tēe cújéhnu nuū tācá soldado ñuu Roma. Te ni cajēhe de jnūhun jeē cone sīn Pablo te condito ñn soldado de.

### *Jeē ní nacani Pablo jnūhun ya ini ñuu Roma*

<sup>17</sup> Te nuū uní quiṽī te ni cana Pablo tāca tēe cácujuhnu nuū jnahan ñuu de hebreo cáyūcú ini ñuu Roma. Te ni cacutútú de, te ni cahān Pablo jíin de:  
Tátā jijnahan ní, tú cuiti na vé ni sāha ná síquī jnahan yó hebreo ni síquī tācá jniñu ní catajnúní

jií yō. Te vēsú súcuan te ni cajni i sãña ndé ñuu Jerusalén ni casquívī i sãñá ndaha tēe ñuu Roma jijnáhan de. <sup>18</sup> Te tēe ñuu Roma jeē cácujuhnu cáyucú Cesarea ni castíhí de sãñá, te cácu ni de siáá de sãña núú, chi ni cajini de jeē tú na cuēchi ná jēe cúu ná. <sup>19</sup> Te jnáhan ñuu yō hebreo tu ní cájēhe de jnūhun. Jeē yúcuan ní cahān na jēe quiji ná núu maá rey cujéhu ga nde ñuu Roma yāhá te sándaā maá de siquī ná. Te tú vēji ná jēe cáquin na cuēchi siquī ñayuu nación yō. <sup>20</sup> Jeē yúcuan ní cana ná níhín jijnáhan ní, návāha cuni na táca ní te ndajnūhun yó. Chi yóhó ñayuu Israel cáñūhun ni yō jeē nátecu ndīyī, te suu jnūhun un nácani ná, te jeē yúcuan cúu jeē nuhní na jíin cadena yáha, áhí de.

<sup>21</sup> Te ni cacahān tēe un jíin Pablo:

Tú ni ñn carta ni cátají ñayuu cáyucú Judea nuū na jēe cástūhún de jnūhun ní, te táca jnáhan yó Judea jeē ní quiijicoo yāhá, tú ni ñn jnūhun née ní cacahān de siquī ní. <sup>22</sup> Te cánujnahān ni ná cuni sōho ná ndese cúu jnūhun jeē cahán ni, chi je cájini na jēe tācá-ni lado cacahān ñayuu contra siquī jnúhun jeē jēe steén ni, áhí de.

<sup>23</sup> Te ni cajeni de ñn quivī, te ni quiijicoo cuehē de vehe nuū néne Pablo. Te ni nacani de jnūhun ndese ndácu Yaā Dios jniñu, te ni steén cají de jnūhun nde jenéhen te nde ni ini. Te súcuan ni nducú ndéyí de scándíje de táca tēe un jnúhun Jesús, te ni steén de jeē suni súcuan cáhán ley jeē ní jēhe ya nuū Moisés jíin jnúhun jeē ní catee tēe ni canacani jnūhun Yaā Dios nde jenahán. <sup>24</sup> Te ni cacandíje sava de jnūhun ni cahān Pablo, te sava ga de tu ní cájetáhú de.

<sup>25</sup> Chi tú ñnuú cáhīyo ni de. Te sáá cánducú de

quingoo de te ni cahān Pablo:

Ndaā cahán jnūhun jeē ni cáhān Isaías, tēe ni nacani jnūhun Yaā Dios nde jenahán, chi suhva ni cahān de jíin táca jíi yō ni sáha Espíritu Santo:

<sup>26</sup> Ni cahān Yaā Dios:

Cuáhán núu jnáhan ñuu rō yāhá te cahān rō jíin i:  
Vēsú cuni nahín váha ró te ma jécūhun ni rō,  
te vēsú coto vāha ró te ma cúni rō.

<sup>27</sup> Chi yōhyo nīhni ni rō,

chi tu cácuni rō cuatáhú ró.

Te yōhyo uhū cájini sōho ró,

chi tu cánujnahān ni rō cuni sōho ró jnúhun ri.

Te nájnūhun cájesi rō tinūu ró

cúu jeē tu cácuni rō nanducú ró ndese cúu,

te tu cácuni rō jeē násāma ini rō

návāha nasávāha ri anuá rō nuū cuéchi ró, ní achi  
Yaā Dios.

Achí tutu. <sup>28</sup> Núu súcuan te na cástūhun ná nuū ni jēe jnúhun ni taji Yáā Dios jeē jnáma ya yohó, nde vijna te táji yá jnūhun yáha quíhīn nuū ñáyuu tācá nación jeē tu cájini i jnūhun ya, te máá i chi cuni sōho i, áchí de.

<sup>29</sup> Te ni jínu ni cahān de jnūhun yáha, te cuangoo jnáhan de hebreo, te yōhyo ni cacahān de siquī jnúhun yáha jíjnáhan de.

<sup>30</sup> Te ni condee Pablo uū cuiyā vehe jeē ní quihin núu de ún. Te ni cusī ni de cahān de jíin táca ñáyuu ní quijicoo nuū de. <sup>31</sup> Te jéhnū-ni ni nacani de jnūhun ndese ndácu Yaā Dios jniñu, te ni steén de jnūhun máá Jítoho yō Jesucristo, te tú ni ñni ní jési jeē nácani de jnūhun.



**Nuevo Testamento en mixteco**  
**New Testament in Mixtec, Atatláhuca (MX:mib:Mixtec,**  
**Atatláhuca)**

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

**Copyright Information**

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Atatláhuca

**© 1973, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

9665e546-39d0-5bd5-8b10-38916a94951f